

# TATÒPANSI NA SURAT REFO

NA

## KABIO WINDÈSI.

PANDĪTA WINDÈSI:

J. A. VAN BALEN.

BIUI SI TO NA 1908

MA SIJOORTAWAN SI JA NA 1915.



Sendurpai kawàsa sensanöpaja Refo na Wolanda, diòne nini to.  
1915.

**2e HERZIENE UITGAAF**  
**BIJBELSCH E GESCHIEDENISSEN**  
**IN DE**  
**WINDÈSISCHE TAA L.**  
**(Ned. Nieuw-Guinea).**

**Uitgegeven door het Nederlandsch Bijbelgenootschap.**  
**AMSTERDAM. — 1915.**

Tatòpan na:

Sjen Alla nianari rora ma utan . . . . .	misoï na raum	1
Rom Eden . . . . .	" " "	2
Adam ma Efa sunbetatar . . . . .	" " "	3
Kain ma Abel . . . . .	" " "	4
Reiru baba . . . . .	" " "	6
Sennanari aniose Babel . . . . .	" " "	9
Sjen Alla diria Abraham . . . . .	" " "	10
Abraham dinòta ma sanètiaar . . . . .	" " "	11
Sodom ma Gomòra sunei . . . . .	" " "	13
Abraham, Isäak tamaan . . . . .	" " "	15
Isäak ririoot . . . . .	" " "	17
Isäak ma niè aantum kasusir Esau ma Jakob . .	" " "	20
Jakob ria so Laban . . . . .	" " "	22
Jakob misoï so Laban . . . . .	" " "	23
Jakob sijoer Esau . . . . .	" " "	24
Josef tuter niè babaisiat . . . . .	" " "	26
Josef na pandjaran rarò . . . . .	" " "	28
Farao sanèpai Josef ma riüt i be mananir baba na utan Mitsir . . . . .	" " "	30
Josef babasiat senda so Mitsir . . . . .	" " "	31
Josef babasiat senda so utan Mitsir ja tuter Benjamin	" " "	32
Josef tiòpan mitauni . . . . .	" " "	34
Israel ria so Mitsir . . . . .	" " "	35
Israel biòru . . . . .	" " "	37
Job . . . . .	" " "	38
Moses na Mitsir, to dipaira berusua Mitsir . . .	" " "	40
Sjen siaaw Moses . . . . .	" " "	42
Moses ma Aäron maso Farao . . . . .	" " "	44
Pisjaan Paska ma Israelsiat senda berusua Mitsir.	" " "	46
Israelsiat na utan biro . . . . .	" " "	49
Sjen Alla diònè prentasi maso Israelsiat . . . .	" " "	51
Karwaar sàpiaantum na brawen . . . . .	" " "	53

Tatòpan na:

Sennanari Jaba Alla, ma senkasjo so pisjaan. . .	misoi na raum	55
Israelsiat senkai utan Kanään . . . . .	" " "	56
Israelsiat sentadjawaba. Korak birarui tuter Moses	" " "	58
Israelsiat senda so utan Kanään . . . . .	" " "	60
Bileam . . . . .	" " "	62
Moses biòru . . . . .	" " "	63
Josua kioor Israelsiat so utan Kanään . . . . .	" " "	64
Akan . . . . .	" " "	67
Josua tipapisan, ma diaas utan Kanään maso Israelsiat. Josua biòru. . . . .	" " "	68
Hakim Gideon . . . . .	" " "	69
Hakim Simson . . . . .	" " "	71
Rut . . . . .	" " "	73
Eli ma Samuel . . . . .	" " "	75
Saul bièradja rètenam na Israel. . . . .	" " "	78
Saul kiòrusaarba, so nini Sjen kiai i. . . . .	" " "	80
Sjen diria Dəfid nani bièradja . . . . .	" " "	81
Dafid ma Goliat. . . . .	" " "	82
Dafid ma Jonatan . . . . .	" " "	85
Saul siserei mium Dafid . . . . .	" " "	86
Saul biòru . . . . .	" " "	87
Dafid bieradja . . . . .	" " "	88
Radja Dafid bietatar ma biètobat . . . . .	" " "	90
Absalon . . . . .	" " "	91
Dafid biemansaar ma biòru . . . . .	" " "	93
Radja Salomo. . . . .	" " "	95
Radja Salomo nianari Anio Alla . . . . .	" " "	96
Salomo niè diteen, ma tanè biekariria . . . . .	" " "	99
Karadjaän Israel diaas bemònu: Jerobeam radja na usapui sura, Rehabeam radja na Juda ma Benjamin . . . . .	" " "	101
Nabi Elia tiòpan: nani babisi baba . . . . .	" " "	104
Elisa ma imamsiat Baäl . . . . .	" " "	105
Elia na wis Horeb. . . . .	" " "	107
Nabi Elia kibeo bedjoor anio Akab . . . . .	" " "	107
Elia siaji so rora . . . . .	" " "	109
Elisa besiksa ma sanəpai . . . . .	" " "	110

Tatòpan na:

Elisa ma Naāman . . . . .	misoi na raum	111
Elisa ma maroba tuter Siriësiat. . . . .	" " "	112
Nabi Jona . . . . .	" " "	114
Karadjaän Israel niei. . . . .	" " "	115
Radja Hiskia . . . . .	" " "	116
Radja Josia ma Nabi Jeremia . . . . .	" " "	118
Jerusalem niei . . . . .	" " "	119
Nabi Esekiel . . . . .	" " "	121
Nabi Daniel ma manëtasiat . . . . .	" " "	122
Nabi Daniel diniau Nebukadnesar witoi dienamia	" " "	123
Sinjontu tòru na adia baba rarò . . . . .	" " "	124
Nebukadnesar biëpisabir. . . . .	" " "	125
Radja Belsasar, ma aniose Babel niei . . . . .	" " "	126
Daniel na singasi sinè kamberepai. . . . .	" " "	128
Jehudisiat sensobera so sennè utan . . . . .	" " "	129
Radja bwiniempi Ester. . . . .	" " "	130
Nehemia . . . . .	" " "	133
Ambeersiat senbeprenta Jehudisiat. . . . .	" " "	134
Eleasar . . . . .	" " "	135
Sinjani tuter niè aantummuan 7 . . . . .	" " "	136
Judas Måkabea . . . . .	" " "	137
Judas biëtapapisan ja, ma biòru . . . . .	" " "	139
Romësiat senbeprenta Jehudisiat . . . . .	" " "	140



## § 1. Sjen Alla nianari rora ma utan.

1. Rètenam Alla nianari rora ma utan. Bape utan biro rami, kakòpa misubat; utan mimaan, ma Rwanunum Alla kiabé dunja.

Raria 1. Ma Alla tiòpan: bie sasaarpai! ma sisaar to. Ma Alla sijoos sasaarpai, sisaar diteen to. Ma Alla diaas sasaar ma mamaan, ma diap sasaar be raria; ma diap mamaan be diru. Ma rawiniena to, ma kausapa to, anina raria rètenampai.

Raria 2. Ma Alla tiòpan: kambo diaas, ma wana nia na rabwan! Ma tapèna to. Ma pi nia na babo, Alla diap i: rora. Ma rawiniena to, ma kausapa to, raria bemònu.

Raria 3. Ma Alla tiòpan: kambo wabar rora riur na utan siri, abo kakòpa sinaja. Ma tapèna to. Ma Alla diap kakòpa sinaja: utan, ma diap kambo sirurè to: rawanam. Ma Alla tiòpan: na utan siwara, samuen, raun, airabosi ma pi sasera wura! ma tapèna to. Ma rawiniena to, ma kausapa to, raria betòru.

Raria 4. Ma Alla tiòpan: sasaarpai riur na rora, abo diaas raria ma diru, ma bjerwana rariasi, paiksi, ma taunsi! Ma Alla nianari sasaarpai baba mònu, sasaarpai biba wàtan, abo biprenta raria, ma sasaarpai biba esi, abo biprenta diru; ma sibèrèresi kòta. Ma rawiniena to, ma kausapa to, raria beat.

Raria 5. Ma Alla tiòpan: pi betenam pau sina na kambo! Ma Alla nianari diaansi wura, baba ma katu, ma nianari ajasi kòta. Ma Alla biberkat si, tiòpan: mentawin ma menbepau! Ma rawiniena to ma kausapa to, raria berim.

Raria 6. Ma Alla tiòpan: pi betenam pau sina na utan, pimuna rina, ma pimuna sianiaar, ma pimuna pisabir! Inèni Alla tiòpan: tannanari sinjontusiat tapè tatat abo senbeprenta diaansi na kambo, ma ajasi na rora, ma pimuna wura na utan wura, ma pimuna sianinaar na kakòpa! Ma Alla nianari sinjontu tapè I, tapè Alla mitauni; ma nianari muan ma bwawin. Ma Alla biberkat sanu, ma tiòpan so sanu: munrawin ma munbepau, ma munrònu dunja, ma munrònè dunja kiòrusaar miat; ma munbeprenta diaansi na kambo,

ma ajasi na rora, ma pimuna wura! Ma Alla sijoer piwura nianarisi to, ma sijoer si wura sitateen besiri. Ma rawiniena to, ma kausapa to, raria berimsiri.

Raria 7. Tapèna Sjen Alla nianari piwura na rora ma na dunja, ma pi betenam wura keito, minau na raria berimmònu. Ma Alla bikerkat raria berimmònu ma besreen i, so mitauni minau to na raria nini, na niè nanaripi wura.

---

## § 2. Rom Eden.

1. Tapèna Sjen Alla nianari sinjontu: nianari niè tèrai na kakòpa, ma siobewana tenampai na swom kambère, ma tapèna sinjontu tienam pena. Ma Sjen Alla tianam rom kòta na Eden, ma diònè i maso sinjontu nianari i to. Sjen Alla diònè airabo wura sisiwara to na rom Eden; si wura siteen, ma si bebo bosì siteen besiri; ma na rom rabwan diòsa airabo tenam, ma kòta airabo bierwana witoi diteen, witoi kiriria.

2. Sjen Alla diònè sinjontu nia na rom Eden, abo tianam i, ma sijoriaat i. Ma Sjen Alla tiòpan maso sinjontu: munraan aibo wura sarèdjeu; bape munraan pènai bosì na airabo bièrwana witoi diteen ma witoi kiriria; munraan na niè bosì, nani, munbòru wàtan.

3. Ma Sjen Alla tiòpan kòta: nini diteenba sinjontu misoi mièsèri; nani jònè siri tapè i, tiuter i. So Adam sijoer to mièsèri, bape pimuna wura, ma ajasi, ma pimuna sianiaar, Sjen dimis si so i abo sijoer ma diap si, si wura si bemònu, muan ma bwawin; bape mièsèr niè esi tuter i ba. Inèni Sjen Alla diònè Adam dienasjat, ma Sjen kioor suran siri na Adam ma riwani i tuter tèrai. Ma Sjen nianari na Adam niè suran bwawin siri, ma kioor i maso Adam. Ma Adam tiòpan: nini anina sina na inè sina, ma tèrai na inè tèrai! ma siaaw i be bwiniempi. So nini nani sawani bibur niè tamaan ma sinjani, ma sanèpai bwiniempi. Ma Adam ma bwiniempi Efa sunkakawin, bape sunrin ba sunkakawin.

---

### § 3. Adam ma Efa sunbetatar.



1. Tawai bepande raiwain pimuna esi wura, tiòpan maso bwawin : Alla tiòpan te, munraan aibo wura na rom nini pènai? Efa riar so tawai: pibai! amunraan aibo wura na rom nini sarèdjeu. Bape Alla tiòpan: munraan pènai na airabo diòsa na rom rabwan; mundut i pènai, abo munbòru ba. Bape tawai tiòpan so bwawin: nani munbòru ba! bape Alla rin munraan aibo nini, nani mundèmi sisajoor wàtan, ma manu nani muntapè Alla, munrin pi diteen ma pi kariria. Ma bwawin sijoor airabo nini diteen, ma niè bosi siteen, sipa siònè pande, piòtu aibo nini, diaan i, ma diònè i kòta maso sawani; diaan i kòta.

2. Ma kabò sundèmi sisajoor wàtan, ma sunsajoor kòta sunkawin; so nini sunrawar araraunsi besisèpai. Inèni Adam ma Efa sunradjawa na wanapai Sjen Alla riama maso sanu, bape sunmateit, sun-



raniwar sanu na mumi. Bape Sjen Alla siaaw Adam tiòpan so i Adam! au nua nò? Ma Adam riar so Sjen: idjawa ruama ma imateit so ikakawin, so nini janiwar jau! Sjen tiòpan so i: tei tiòpan so au kukawin? Buaan to te na airabo Itòpan so au: buaan i penai? Ma Adam riar so Sjen: bwawin buònè so jau, diònè aibo nini so jau, ma jaan i pana. Ma Sjen diutan so bwawin: buòtò? so nunari tapèna? Bwawin riar so Sjen: tawai diawi jau, ma jaan aibo pana.

3. Inèni Sjen Alla tiòpan so tawai: so nunari tapèna, nani au kuriria raiwain pimuna esi wura; bunanaar na sanemwaba tawana ma buaan kakòpa be wabu, to buòru. Ma jònè au ma bwawin munkapiap babera manu, ma nuè aantumsi ma bwawin niè aantumsiat kòta. Ma bwawin niè aantum nani tiapori rumu, ma kuripapori niè aitopapui.

4. Inèni Sjen Alla tiòpan maso bwawin: nani na pòta baba buawin, ma nani budjawa sawamu, ma nani sawamu biprenta au. Ma maso Adam Sjen Alla tiòpan: so budjawa maso bwiniemu, nani dunja kiriria, ma suèmuai tawana pisjaan na i na marioor wàtan, ma nani siwara maso au kandai ma mumi; ma buaan witoi mantaunau tuanam; ma buaan pi na marioor, to nani buekakòpa ja, so Inanari au na kakòpa. Au kakòpa wénasia, nani suòbera ja so kakòpa. Inèni Sjen Alla nianari sreepaisi na pimunarawa so Adam ma Efa, ma Sjen sisun sanu. Ma Sjen diatar sanu beruswa rom Eden, ma diònè Kerubim tuter njoikòroos bebibiaar diòsa bidjoor rom Edeu ma airabo tenampai.

---

#### § 4. Kaïn ma Abel.

1. Adam ma Efa sunnè aantummuan mònu. Kaïn baba, ma Abel madjawi. Abel biegbala; Kaïn tianam rom. Kaïn niunum soom so Alla pi witoi tianam to: ma Abel niunum soom aantumsi rètenam na niè dombasi. Ma Sjen sijoor Abel, ma Sjen sanèwèsjeen witoi niunum soom so I; bape Kaïn ma witoi niunum soom, Sjen sanèwèsjeen i ba. So nini Kaïn kisjo, ma rèpai kirakwai. Inèni Sjen Alla diutan Kaïn, tiòpan: kusjo so, ma rèmu kiriria so? Inè! buteen rèto buba pana, bape buteen ba, nani tatar dirimaan au. Mèmu madjawi sanèpai ma didjawa au pena.

2. Na raria esi Kaïn kibio so madjawi, sundur sunmasoi na utan

rarò; Kaïn kisjo madjawi, ma riora i to biòru. Ma Sjen diutan Kaïn: Abel, mèmù madjawi aninò? Kaïn riar: irin i te? isajoriaat i te? Ma Sjen tiòpan so i: Nunari witoi to? Riaat na mèmù madjawi siaaw na dunja so Jau! so waramu diònè kakòpa diunum riaat na mèmù madjawi to! Nani tuanum rom ja, suèmuaì pau ba na i: nani musoi tindia ba na utan, nani rua buarirè na utan. Ma Kaïn tiòpan so Sjen: inè tatar baba beja, ipa ba isèmuaì maaf; buatar jau na utan pana, ma nani sujoriaat jau ba to, nani imasoi tindia ba na utan, ma ira jarirè, ma nani teì sijoor jau, miun jau kòta! Bape Sjen riar so Kaïn: siri miun Kaïn te, nani sièmuaì berimmònu riwani Kaïn. Ma Sjen diònè piberwana so Kaïn, abo teì sijoor i miun i ba. Ma Kaïn bibur so utan Nob na dirè be muran na rom Eden.



3. Kaïn bwiniempi diawin Hanok; ma Kaïn nianari aniose diap i tapè niè aantum: Hanok. Lamek, siri na Kaïn bepuipaisiat ririoot

bwawin mònu, siri sanò Ada, esi sanò Silla. Ada diawin Jabal ma Jubal. Jabal tamaanpai na siat sennanari ma sentenam na jabasi. Ma Jubal nianari gongon rètenam. Silla diawin Tubalkaïn. Ma Tubalkaïn kiamkam rètenam sumbeertërai ma kansa.

4. Efa diawin aantumman esia, ma diap i Set, tiòpan: Alla diònè i maso jau riwàni Abel, Kaïn miun i to. Kaïn bepuipaisiat senkòrusaar Alla ba, so nini sentap siat: kawàsa aantumsiat. Bape Set niè bepuipaisiat senkòrusaar Alla, so nini sentap siat: Alla aantumsiat; ma Alla diniau siat miajar witoi. Na rariasi Enos, Set niè aantum, sendur abo senadi so Sjen. Henok, Set niè bepuipai, bienabi, diniau kawàsa senkòrusaar Alla ba to, tiòpan so siat: Sjen riama pena, abo behukum kawàsa sennè tatar, ma besiksa betatarpaisiat. Henok tienam tuter Alla, ma biòru ba, so Sjen kioor beruswa i dunja. Henok aantum sanò Methusalem nia to wòroi, tienam taun utin rimat sura berimsiri bemandu rimat = 969. Methusalem aantum Lamek diap niè aantum Noak, tiòpan: nini nani behibor tatat na tannè nanaripi ma tannè marioor ma na dunja Sjen Alla kisjo i to.

5. Nini sanòsi na Adam niè bepuipaisiat

Adam . . . . .	tienam taun	930
Set . . . . .	" "	912
Enos . . . . .	" "	905
Kenan . . . . .	" "	910
Mahalaël . . . . .	" "	895
Jered . . . . .	" "	962
Henok . . . . .	" "	355
Methusalem . . . . .	" "	969
Lamék . . . . .	" "	777
Noak . . . . .	" "	950

## § 5. Reiru baba.

1. Kawàsa senpau na dunja; ma muansiat na Alla aantumsiat sensajoor bwawinsiat na kawàsa aantumsiat sentateen, sendaut siat. Inèni Sjen tiòpan: Inè rwanunum birirui wòroi ba tuter kawàsa, so siat tèrai wènasja. Jònè senmasoi rami taun 120 wènasja. Sjen sijoor kawàsa sennè kariria pau mò, ma tawana sensanèkariria wènasja. So nini

Sjen sanèwèsjeen ba nianari kawàsa to, ma tiòpan: Jònè nani sennei beruswa dunja!

2. Bape Sjen sanèpai Noak. Noak tindia raiwain esiat. Noak tienam tuter Alla. Alla tiòpan maso Noak: kawàsa wura nani sennei, senbekariria dunja, nani jonè sennei tuter dunja. Nunari so au: anio kàpal, nunari i tuter aniora:òpaksi ma nani tutiai i na rarò ma na wòrira tuter kèsi bemetan. Ma nunari i tapèna: niè wòroi el 300; sibaberi el 50; tirieu el 30; nunari i tuter warare ma aturè ma nunari i tuter rawar tòru. Nani kuor tuter au na anio kàpal rarò na pimuna wura: muan siri ma bwawin siri, na ajasi, na pimuna sitenam na utan, ma na sianiaar. Bape na pimuna sirarin, kuor muan 7 ma bwawin



rimmònu. Ma kuor kòta pisjaan masis maso miat, ma maso pimuna wura. Inèni Noak nianari tapè Alla diniau i.

3. Noak nianari pi wura to keis, Sjen tiòpan maso Noak: suapui

anio kâpal, au, tuter mèmù kawâsa, so Isajoor to: au tindia maso Jau. Inèni Noak siupui anio kâpal tuter bwiniempi ma niè aantum tòru: Sem, Kam, ma Jafet, tuter senbwiniemi. Tapèna Sjen diònè sirama kòta so Noak na pimuna wura, mònu sunda so Noak, muan ma bwawin sanu, tapè Alla tiòpan to. Inèni Sjen sioor aturè na anio kâpal. Ma Noak tienam to taun 600. Na paik bemònu, raria 17, djòbera baba besiri miun raria ma diru 40 minau ba; ma kambo na kakòpa rarò diubira, to kakòpa mirutu; ma wis wura reiru kioor si, to reiru raiwain wis rukamisi to taba tòru. Tapèna pi betenam wura na dunja si bòru wura, ajasi ma pimunasi wura, ma kawâsa wura senbòru kòta. Ma kambo diboï babo kakòpa raria 150.

4. Bape Alla sanèpaja Noak. Ma Alla diònè marin ma sinaja pena. Ma na paik 7 na raria 17 anio kâpal tiura, diòsa na wis Ararat babo. Na raria bepapon na paik 10 Noak sijoor wis rukami ja. Ma



Noak dinòta rami raria 40; inèni sièban warare ma diònè rawa siri sipop. Ma rawa sipop sasera to kakòpa sinaja. Ma raria esi Noak diònè kapuran siri sipop, bape kapuran sièmua ba utan napa pia misoi, riana ja so Noak. Noak siu wara, ma kioor i ja na anio kàpal rarò. Noak dinòta raria 7 ja, dionè kapuran sipop ja. Ma rawiniena kapuran siòbera so Noak, ma kirib tabaat raun oleif babòru siri. Noak dinòta esia raria 7, ma diònè kapuran sipop esia, bape kapuran siòbera ja ba na anio kàpal.

5. Na Noak niè taun 601 na raria bepapon na paik papon, kambo beruswa kakòpa pena. Ma Noak piasai anio kàpal sòrèpai. Ma na paik bemònu raria 27 kakòpa sinaja to. Ma Sjen Alla tiòpan so Noak: suòtira anio kàpal, au ma bwiniemu ma mèmua aantumsiat tuter senbwiniemi, ma pimuna wura sina na anio kàpal tuter au. Ma Noak tiaur wabu soom, ma niunum soom maso Sjen. Inèni Sjen tiòpan maso i: nani so kawàsa sennè tatar Jònè dunja niei esia ja ba, so kawàsa sensanèrarò betatar wénasia, katumsiat tapè babasiat. Nani to wòroi tanam ma pòtu, riesa ma maas, dipuriapai ma didiru, raria ma diru simenau ba siriwani babera si. Ma Alla biberkat Noak ma niè aantumsiat, tiòpan so siat: nani menbepau, mentònu dunja. Ma Itòpan maso au bewatan: nani reiru biba miun dunja betutira esia ja ba. Jònè sjèbis na arepasi, abo bierwana so miat witoi kabò Itòpan bewatan to maso dunja.

---

## § 6. Sennanari aniose Babel.

1. Noak tianam rom; ma tienam rami bepui reiru baba taun 350; biòru niè taun 950. Niè aantumsiat Sem, Kam ma Jafet, siat tamaan-siat na kawàsa wura sentenam rami. Sem niè aantumsiat senna na utan Asiè; Jafet niè aantumsiat senda so matan so utan Europa; Kam niè aantumsiat senda so mirei ma utan Afrika.

2. Kawàsa wura senkabio rami kabio siri wénasja; senda so muran sensajoor mapar biba na utan Sinear, sentò senna na mapar nini. Ma senkabio babera, sentòpan: tannanari rëwukisi na kakòpa, tannunum si to sikarakwai, ma tannanari aniose baba, tuter anio siri tirieu to rora, ma tapèna tannanari tansanompai baba. Ma sennanari tapèna; sennunum sentaur rëwukisi, ma kèsi bemetan riwani kiru. Bape

Sjen sijoor witoi kawàsa sennanari. Ma Sjen tiòpan: kawàsa wura siat besiri wènasja, ma senkabio kabio siri rami; tanbedjoor siat ba te na witoi sensanèwèsjeen? Tanbaar so siat, ma tantònè sentadjawa babera siat ba, abo siri didjawa esi ba. Tapèna Sjen diònè senmasasepar siat so utan wura, ma senmènau pana na sennanari aniose. Ma sentap aniose arapai: Babel, so Sjen diònè sentadjawa babera siat ba pana.

### § 7. Sjen Alla diria Abraham.

1. Wòroi barami bepui reiru baba kawàsa senparo Alla ja. Sensanèpaja senpande, bape sentataar pana, senriwàni sennè Alla wàtan biba ma diteen maso karwaarsi tapè sinjoontu sarèdjeu, ma tapè ajasi, ma pimunasi, ma pi esi. Senriwàni piwàtan na Sjen maso pikariria, ma pi witoi Alla nianari sensoom ma senbehormat nini; bape Sjen mitauni, tei nianari pi wura, senparo I. Bape so senkem-berei sensanèpaja Alla, diònè siat so kariria, abo sennanari kariria wura. Tapèna senbekawàsa karwaar. Sem niè bepuipaisiat kòta senparo sennè Alla. Bape abo Alla nani pia diònè slamat maso kawàsa, Sjen diria sinjoontu siri, kioor i beruswa betatarpaisiat. Sinjontu nini sanò Abraham na utan Ur na Kaldesiat na usapui Sem. Abram tamani sanò Tera. Tera niè aantum muan tòru: Abram, Nahor ma Haran. Nahor aantum sanò Betuel, Laban ma Rebekka tamaan. Haran Lot tamaan, bape Haran biòru, tapèna Lot misoi tuter Abram.

2. Tera, Abram tamaan, dirien na Ur so Kanaän tuter Abram, ma Abram bwiniempi Saraï, ma Lot, Haran aantum. So Sjen tiòpan to so Abram: bubur nuè utan, ma nuè usapui, ma tamamu niè anio, rua so utan esi witoi nani Iberwana so au. Ma nani Inanari au tamaan na kawàsa bepau, ma nani Ibeberkat au; nani Inanari sanòmu biba; ma so au nani kawàsa wura na dunja sensèmua slamat.

3. Abram kiòrusaar Sjen, ma dirien, ma kioor Lot tuter i. Ma Abram niè to taun 75, ma bwiniempi biro aantum. Ma sendama so utan Kanaän, ma disan jabasi na Sikem deriasi More. Ma na wana Sjen riama so Abraham, tiòpan so i: maso mëmu bepuipaisiat nani jònè utan nini! Ma Abram tiaur wabu soom maso Sjen Alla.

Ma Abram dirien ja so wis rabwan Bètel ma Ai, ma wana kòta tiaur wabu soom. Bape kawàsa na utan nini senbaro pisjaan, so nini Abram dirien so mirei, ma ria to utan Mitsir.

4. Na utan Kanaän sennè pisjaan ja, Abram siòbera ja so wana. Abram niè pigangènam pau, niè hambasiat muan ma bwawin pau, ma niè sapisi ma dombasi ma ontasi ma kalidesi pau besiri. Ma Abram ria so Bètel, napa tiaur wabu soom to, ma Abram niadi so Sjen na wana. Ma utan wana masis ba maso Abram ma Lot sanu, so Lot kòta niè dombasi ma sapisi ma jabasi pau, ma niè gombalasiat senbarirui tawana tuter Abram niè gombalasiat. So nini Abram tiòpan maso Lot: tunbarirui pènai! ma tunnè gombalasiat senbarirui pènai! Sujoor! utan baba masis maso au! tunda to tunpòsasiè. Rua so warasara, nani ira so warawàtan; bape rua so warawàtan, ira so warasara. Inèni Lot diria maso mitauni mapar na kambo Jordaan, ma disan niè jabasi to aniose Sodom. Bape kawàsa Sodom senkariria, senbetatar beja maso Sjen. Ma Lot bibur Abram to, Sjen tiòpan so Abram: sujoor so mirei ma so ba, so muran ma so matan; utan wura sujoor i pana, nani jònè si so au, ma so mèmù bepuipaisiat to wòroi wòroi.

5. Kedarlaomer, radja na Elam, ma radjasiat esiat tuter i, senda senberait senmun Sodom, sentapur kawàsa wura, senkoor pigangènam ma pisjaan wura, ma senkoor Lot tuter nièsiat kòta. Inèni Abram didjawa nini to, riur niè sinjoontusiat 318, ma riausaar rait. Ma sièmuai rait, miun i, ma kioor siòbera kawàsa Sodom ma pigangènam wura ma Lot kòta. Inèni radja Sodom tiòpan so Abram: buònè ja so jau inè kawàsa, bape pigangènam wura nuè si sarèdjeu. Bape Abram riaar so i, tiòpan: itòpan [to bewàtan so inè Sjen Alla biba, niè rora ma utan: nani ikoor so mantaunjau rawa siri ba, ma wai na soraiwaan siri ba. Nani ikoor pisiri ba na pi mèmù wura, abo nani tuòpan pènai: inanari Abram bebaba. Buònè wenasia pisjaan maso inè kawàsa ma buait siat sentuter jau.

---

## § 8. Abram dinòta ma sanětiaar.

1. Bepui nini Sjen tiòpan maso Abram: muteit penai Abram! Jau mèmù jawar ma mèmù bait baba wàtan. Bape Abram tiòpan so Sjen: bape Sjen! buònè witoi maso jau, so nani ibòru ma ibaro aantum? Kabò Sjen kioor Abram so wòrira niè jaba ma tiòpan so i: sujoor



so rora ma butoor tatoa sibèrèresi pau nini te? Tapèna nani mèmu bepuipaisiat, siat pau tapè sibèrèresi. Ma Abram sanètiaar Sjen, so nini Sjen sanèpai Abram. Inèni Sjen tiòpan bewàtan maso Abram: utan nini na kambo dira na Mitsir to kambo dira baba Frat, jònè i to maso mèmu bepuipaisiat.

2. Bape Abram nia na utan Kanaän taun sura to, ma sanètiaar Sjen niè kabiosi to, bape bwiniempi Saraï diawin barami. So nini Saraï tiòpan so Abram: isanèmasa, bape inè women Hagar, bwawin Mitsir, ruaut i, abo diawin riwani jau. Ma Abram didjawa so bwiniempi; ma Hagar diawin aantummuan, ma Abram diap i: Ismael. Ma Ismael niè taun 12 to, ma Abram niè taun 99, Sjen riama so Abram, ma tiòpan so i: Janina Alla, inè pi wura; tuenam tindia maso Jau! Itòpan bewàtan maso au: nani Jònè so au bepuipaisiat pau, ma au nani sentap au Abram ba, bape Abraham, (anina, tamaan na kawàsa pau) ma na mèmu bepuipaisiat esiat senberadja. Ma bwiniemu, nani buap i ba Saraï bape Sara (anina radja bwawin) so nani diawin aantummuan maso au. Abraham didjawa kabiosi nini, tituan niè rèpai so djo, ma miri, tiòpan na niè sanèrarò: esi niè to taun 100 sièmuai aantum rami te? ma Sara niè to taun 90, nani diawin rami te?

3. Bepui nini Abraham nia na utan Mamre, Sjen riama ja so i na raria worabwan, ma Abraham misoi na jaba niè aturè. Abraham piòsasaan niè rè, sijoor sinjontu tòru sentòsa jana; sijoor siat pena, ria so siat, tituan maso siat ma tiòpan so siat: Sjen miat! mensanèpai jau te, menda tarawa jau, mennè hamba, pènai! mensanèwèsjeen nani senkoor maria, abo menroram mendaïmisi; ma menmasoi na kamadiwan wabar rumwaja nini, nani ikoor pisjaan, ma mentaan pi to, nani menda sarèdjeu. Ma sentòpan so i: wèsjeen, nunari tapè tuòpan. Inèni Abraham dipaira so Sara, tiòpan so i: seira! nunari mamami, kuriram i! Ma Abraham kioor sapi aantum esi, miein ma diteen, ma siaaw niè hamba abo miun i ma siòbin i seira; ma kioor mantega ma sapi susu tuter pisjaan esi maso siat, abo sentaan i; ma sentaan pena Abraham diòsa so siat. Inèni siri na siat diutan Abraham: Sara, bwiniemu nanè? Abraham riar so i: aninia jawa rarò. Tiòpan ja so Abraham: nani taun siri rami keis, Irama ja so au, nani Sara niè aantummuan to. Ma Sara diòsa na senkarumi na jawa niè aturè, didjawa kabio nini, miri. Ma Sjen tiòpan so Abraham: Saro miri so? Sjen pia pi wura ba te?

## § 9. Sodom ma Gomòra sunei.

1. Inèni sentòsa, sentò senda so Sodom, ma Abraham ria kioor siat. Ma mònu sunda so Sodom, bape Sjen mitauni ria tuter Abraham tiòpan so i: Witoi nani Inanari Jiniwar i te maso Abraham, na i nani kawàsa wura sensèmua berkat? So Isajoor i to, nani diniau niè bepuipaisiat senkòrusaar Sjen ma sentenam tindia ma wèsjeen. Ma Sjen tiòpan so Abraham: kawàsa Sodom ma Gomòra senkariria beja ma senbetatar baba beja; kabò Ira Isajoor tatoa siat. Inèni Abraham diòsa tuter Sjen, ma tiòpan so Sjen: Sjen nani miun kawàsa tindia tuter kaririapaisiat te? Sinjoontu tindia 50 senna na aniose rami te, nani Au sanèpai aniose so siat ba te? Mun pènai tindiapaisiat tuter kaririapaisiat! Sjen na dunja betutira nani behukum tindia ba te? Ma Sjen tiòpan so Abraham: Isèmua na Sodom sinjoontu tindia 50 nani so siat isanèpai aniose betutira. Ma Abraham tiòpan ja so Sjen: sujoor, ikabio so Sjen, bape jau wabu ma kakòpa wénasia; asiana wana te na 50 mindo rim nani buònè te aniose niei so rim mindo? Ma Sjen riar so Abraham: Isèmua na wana tindiapaisiat 45, aniose nani niei ba. Ma Abraham tiòpan ja so Sjen: bape suèmua na wana tindiapaisiat 40 wénasja te? Sjen riar so i: nani Imun pibai so 40 nini. Abraham tiòpan ja: Sjen! kusjo jau pènai so ikabio ja. Tei rin te, asiana wana tindiapaisiat 30 wénasja. Sjen riar so i: Isèmua na wana 30 nani Imun pibai. Ma Abraham tiòpan ja so Sjen: tei rin te, nani suèmua tindiapaisiat 20 wénasja. Ma Sjen riar so i: nani Imun pibai so 20 wénasia. Ma Abraham kibio esia so Sjen: Sjen kusjo jau pènai, ikabio besiri rami; tei rin te, suèmua na wana tindiapaisiat sura (10) wénasja! Ma Sjen riar so i: nani Imun ba so 10 wénasja. Kabò Sjen bibur, so kibio tuter Abraham mènau to, ma Abraham siòbera so niè jabasi.

2. Sinjoontu rora sanu, sunda so Sodom. Ma rawiniena Lot misoi na niè anio atorè, sijoor sinjontu sundama, diòsa, tituan so sanu, ma tiòpan so sanu: munsuapui munnè hamba niè anio, munroram mundaimi, munrena, ma kausapa nani munda ja. Bape suntòpan so i: mojar! amunrena na raanpai. Bape Lot diònusaar sanu to sunsuapui tuter i. Ma Lot diònè pisjaan ma sunraanpi. Ma diru pena, muan-siat na Sodom, babapaisiat ma katunsiat sendama senwariri Lot niè anio, ma sentòpan so Lot: sinjontu sanu nanè? rawiniena sundama

so au, buònè sanu maso amat. Kabò Lot siòtera ma sioor aturè na karupai, ma tiòpan so siat: hé manètasi! mennanari kariria maso sinjontu sanu pènai! Bape sentòpan: ruama! aje! ambeer nini diniau tatat te? Ma senda, senkepan Lot, sentò sentòtap aturè. Bape sinjontu rora sunrakai sunpapar riapwir Lot, ma sunsoor aturè, ma suntònè sinjontusiat sendama to na anio rëponpai sendèpupui, senpa ba pana sensajoor uturè.

3. Inèni sinjontu sanu suntòpan so Lot: mèmù esiat senna na aniose nini te, kuor siat beruswa utan nini, so Sjen dimis nanu, abo amunrònè aniose nini niei. Lot ria seira, ma tiòpan so niè nèbiniabi sanu: menda beruswa aniose nini! so Sjen nani diònè niei. Bape sunradjawa i ba, suntòpan: kibio sarèdjeu. Ma masepaar pena sinjontu



rora sanu suntòpan so Lot: buòsa! bubuk! ma kuor tuter au bwiniemu ma mèmù aantumbwawin sanu abo mennei ba. Bape

Lot bibur seira ba, sunrakai sunpapar Lot tuter bwiniempi ma aantumbwawin sanu so aniose wòrira ma suntòpan: mentapai mëraru abo mennei ba! mensadadjara pènai! mentòsa pènai na mapar nini betutira, to menda to wis wani. Bape Lot tiòpan: kariari Sjen! ipa ba japaira to wis wani, nani ibòru te! Sanèpai jau to baba! sujoor, aniose katu nini deriasi pana, i katu wénasia ba te? munrònè ira so i, abo itenam, ma ibòru pènai! Ma suntòpan so Lot: wèsjeen! so au nani aniose katu wani niei ba; bupaira mëraru pa! so amunpaba amunnanari pisiri to bubur to. So nini sentap aniose katu nini Soar, anina: katu. Ma Lot bibur dipaira, ma kausapa to Lot riapwir Soar. Inèni Sjen diònè àdia tiawa na rora babo utan wana, ma aniosesi Sodom, Gomòra, Adama ma Seboim tuter mapar betutira, Sjen biari si. Bape Lot bwiniempi diòsa na raanpai, sisir so niè anio, ma diòsa, biòru pana, diòsa ma bieriri sasitèrai.

4. Ma porera Abraham diòsa ma ria so napa rawini diòsa kibio so Sjen, ma sijoor so Sodom ma Gomòra, ma sijoor àdiawio biba sia wana. Ma Lot bibur Soar, so miteit kawàsa Soar, ma misoi na wis niè swep, i mitauni tuter niè aantum bwawin sanu. Ma Lot anina tamaan na kawàsa Moab ma Ammon.

---

## § 10 Abraham, Isaäk tamaan.

1. Abraham dirien so mirei, ma misoi rabwan Kades ma Sur. Ma Alla diònè maso i tapè tiòpan to: diònè Sara diawin aantum muan. Ma na raria rimtòru Abraham besunat i tapè Alla diniau i, ma diap i: Isaak. Ma Abraham niè taun 100 to. Ma Ismael kimberei Isaäk, ma siòrèpèso i; so nini Sara diònusaar Abraham diatar Ismael tuter niè sinjani Hagar. Ma Ismael nia na utan, ma bietamaan na kawàsa Araab.

2. Ma Isaäk biemararia pena, Sjen Alla sijoortatoa Abraham, tiòpan so i: koor mèmum aantummuan, mèmum aantum siri, Isaäk, au sanèpai i, rua tuter i so utan Moria, ma na wana nunum soom i maso Jau na wis nani itòpan so au. Ma porera Abraham diòsa, biemasis niè kalide, ma koor tuter i mònu na niè marariasiat ma niè aantum Isaäk, ma tiarasabu airamuan maso niunum soom, ma ria tapè Alla tiòpan to so i. Ma na raria betòru sijoor to utan arapai na

wiarieu, tiòpan maso niè marariasanu: munmasoi na nina tuter kalide, bape inè aantum amunda so wana, ma amunda na wana to nani amun sòbera ja so manu. Ma Abraham diònè Isaäk sirio airamuan, ma mitauni riut àdia ma njoì, ma sunda. Inèni Isaäk tiòpan so tamani: Jai! Ma Abraham riar so i: janina inè aantum. Ma Isaäk diutan i: sujoor, àdia ma airamuan, bape dombaaantum nani nunum soom i, aninò te? Ma Abraham riar so i: nani Alla mitauni diria dombamuan so inunum soom i. Ma sundama to na utan Alla tiòpan i to, Abraham tiaur wabu soom ma tiaur airamuan babopai ma diabit niè aantum Isaäk, pir i na airamuan babo, riut njoì, ma dikai, tiò miun niè aantum.

3. Bape kabò Melaikat na Alla siaaw na rora maso Abraham,



siaaw: Abraham! Abraham! Ma Abraham riar so i: sujoor, janina!  
Inèni tiòpan so Abraham: mun aantum nini pènai! so Isajoor to

kuòrusaar Alla, ma budjoor mèmù aantummuan siri maso Jau ba. Inèni Abraham sijoor karu, sijoor dombamuan, niè rusasiwa sisjawa na mumi. Ma Abraham dipai, tipur i, miun i, ma niunum soom i riwàni Isaäk. Ma Abraham diap utan nini: Alla nani sijoriaat.

4. Inèni Melaikat na Sjen kibio esia na rora maso Abraham, tiòpan so i: tapèna Sjen tiòpan: Isawora na mantaunjau: so kuòrusaar Jau, ma budjoor mèmù aantum siri maso Jau ba, so nini nani Ibeberkat au bewàtan to baba, ma mèmù bepuipaisiat nani senpau tapè sibèrèresi na rora, ma tapè rubwan na sasi dirè; ma nani sennè bewàtan siat senkembèrei siat. Ma na mèmù bepuipaisiat nani kawàsa wura na dunja sensèmua berkat, so kuòrusaar Jau bewàtan. Inèni Abraham siòbera so niè mararia sanu, ma sensòbera so Berseba. Ma Abraham nia na Berseba.

---

## § 11. Isaäk ririoot.

1. Sara biòru na Hebron, niè taun 127, ma Abraham sieis i. Ma Abraham biòri na Efron, sinjoontu Het, swep siri be kubir maso Sara ma maso i ma niè bepuipaisiat. Ma Elieser, Abraham niè hamba, sijoriaat pi wura witoi Abraham niè. Sara biòru to, Abraham tiòpan so Elieser: suawora na Sjen Alla niè rora ma utan niè sanòpai maso jau: nani buòñè inè aantum Isaäk riaut bwawin na kawàsa Kanaän pènai; nani rua so inè utan ma inè usapui na Mesopotami, ma na wana nani kuoor bwiniempi maso Isaäk. Nani Sjen dimis niè Melaikat, abo ria pipun au. Ma Elieser tiòpan so Abraham: bape karabwin esi miajar ba te riausaar jau so nanina, nani ikoor mèmù aantum so wana te? Bape Abraham riar so i: mojar! kuoor inè aantum so utan wana pènai! Inèni Elieser tiòpan tapèna bewàtan maso Abraham. Ma Elieser kioor sura na Abraham niè ontasi, ma raar arum na Abraham niè pigangèna, ma dirien so Mesopotami, so aniose Nahor. Ma riama deriasi aniose Nahor, diòñè ontasi sibata deriasi kambo serai esi, rawiniena pena; ma tòkato nani bwawinsiat na aniose sendama abo sentutup maria. Ma Elieser niadi so Sjen, diutan: Sjen! sanòpai inè sjen Abraham! sujoor! tòkato karabwinsiat na aniose nini nani sendama sentutnp maria, buòñè Sjen, nani jutun esi na siat: buòñè nuè màmòra abo junum katu! ma nani riar so jau: bunum sarèdjeu, ma nani

jutup kòta kambo maso mèmù ontasi abo siunum, buòñ Sjen!  
karabwin nini asiana Isaäk bwinieempi, abo tapèna isajoor Sjen! Au  
sanèpai inè sjen!

2. Elieser niadi rami, Rebèka, Betuel aantumbwawin, riana, sirio  
niè mamòra, ria so kambo sèrai, tiutup kambo to niè mamòra diònu,  
ma tiò bibur ja. Bape Elieser ria so i, diutan i: buòñ mamòra kambo  
so jau, junum! Ma Rebèka riar so i: bunum sjen! ma diòñ Elieser  
diunum na niè mamòra; diunum to, tiòpan so i: nani jutup kòta  
maso mèmù ontasi. Ma biubu kambo na mamòra so sajèr, ma dipaira  
ja so kambosèrai, diutup ja, to ontasi siunum wura masito. Ma  
Elieser sijoor nini, tindoor, diòsa sisi abo sijora ma sanèpaja Sjen  
bierwana karabwin nini so i te, pibai te. Ma ontasi siunum masito,



Elieser diòne so Rebèka pimirandin rèbosina na brawen, ma sampaar  
brawen mònu, ma diutan i: tamamu tei? amanpa amantena na tamamu

niè anio? Karabwin riar so i: jau Betuel aantum bwawin, ma na jai niè anio utan masis mentena, ma amannè pisjaan pau kòta. Inèni Elieser tituan rupai ma niadi so Sjen, tiòpan: Sjen! isèndik Au so kuor jau so mamberaarwo na inè sjen sennè! Ma Rebèka dipaira so sinjani, tiòpan pi nini wura so i.

3. Laban, Rebèka niè raarwomuan, sijoor pi mirandin rèbosina, ma sampaarsi brawen na Rebèka, ma didjawa to witoi Rebèka tiòpan, ria so Elieser ma tiòpan so i: suapui! Sjen biberkat au to! so buòsa na wòrira rami? Sujoor! inanari anio rarò masito maso au, ma utan masis maso mèmù ontasi. Inèni Elieser riapwir anio, ma sendera ontasi, ma sentònè pisjaan so si, ma senkoor kambo maso Elieser abo rioram aipai, ma sentònè pisjaan so i. Bape Elieser tiòpan: nani jaanpi barami to ikabio papon to keis. Ma Laban tiòpan so i: wèsjeen, kubio sarèdjeu! Inèni Elieser tiòpan usara pi wura; keis, diutan so siat: mentòpan so jau, nani mensanèpai inè sjen te? Ma Laban ma Betuel suntòpan: pi nini wura na Sjen! Sujoor Rebèka, kuor i, ma rua; mèmù sjen niè aantum riaut i tapè Sjen miajar pena. Elieser didjawa nini pana, tituan to djo maso Sjen. Inèni Elieser diònè pi mirandin na brawen ma sèrak tuter sansun sitateen maso Rebèka, ma diònè kòta pi ditur esasi maso Rebèka sinjani, ma maso niè mamberaarwo. Ma kausapa sentòsa to, Elieser tiòpan so siat: mentònè kabò isobera so inè sjen. Bape sentòpan so i: mojar! musoi raria esasi rami tuter amat; keis nani rua. Bape riar so siat: menbedjoor jau pènai! Ma sensaaw Rebèka, sentutan i: au sanèwèsjeen raria nini rua tuter i te? Ma riar so siat: jò! raria nini ira, irausaar i! Inèni sentònè bwawin siusu Rebèka to, ria tuter i. Ma senbeberkat Rebèka, sentòpan so i: au nani bepau mò! Ma sentòpan tabea so i, Rebèka sia misoi na onta karupai, senda pena.

4. Ma rawiniena esi Isaäk ria so utan, tiò niadi, sijoor na wiarieu ontasi sirama. Ma Rebèka kòta sijoor Isaäk ria, diutan Elieser: sinjoontu jana, tei nini? Ma Elieser riar so i: nini inè sjen niè aantum! Ma sendama to, Elieser tiòpan usara pi wura so Isaäk. Ma Isaäk kioor Rebèka na Sara niè jaba, ma sanèpai i. Tapèna Isaäk sièmuai hibor na niè sinjani biòru to.



## § 12. Isaäk ma niè aantum kasusir: Esau ma Jacob.

1. Isaäk niè taun 40 riaut Rebèka. Bape Rebèka diawin barami taun esasi. So nini Isaäk niadi maso Alla, ma Alla didjawa i. Ma Sjen tiòpan (so Rebèka: nani buawin kasusir aantummuan mònu, nani sunbeusapui mònu, ma babapai nani kiòrusaar madjawipai. Ma Rebèka diawin kasusir aantummuan mònu, bepaponpai niè tèrai betum wura, so nini sentap i: Esau; ma bepuipai sentap i Jakob. Esau biba pena ria makata tawana wènasja, bape Jakob misoi, riasaar tamani ma sinjani sunnè buwai. Ma Isaäk sanèpai Esau, so Esau miun pimuna utan so i. Bape Rebèka sanèpai Jakob. Raria esi Jakob riaan pisjaan tapè kabaru beurar. Inèni Esau siubi na utan, mirioor ma bibisi; sijoer pisjaan Jakob riaan i to, tiòpan so Jakob: buòne pisjaan beurar wanèsa ma jaan i, so imarioor! Bape Jakob tiòpan so i: buwajan maso jau, riwani pisjaan nini, mèmù berkat na aantum rètenam. Esau riar so i: nani ibòru te, isanèpai berkat na aantum rètenam rami so? nuè i sarèdjeu! Jakob tiòpan so i: suawora papon! Ma Esau siawora, diònè berkat na aantum rètenam maso Jakob. Tapèna Esau sanèpai ba berkat na aantum rètenam. Ma Esau riaut bwawin mònu na kawàsa Het; so nini Isaäk ma Rebèka sun-sanèwèsjeen ba, ma sunbesusa.

2. Isaäk bemansaar, ma rìpupui pana, raria esi siaaw Esau, tiòpan so i: koor apai ma atosi ma rua aduata maso jau, ma suèmua esi to, sunana i tapè ruin isanèwesjeen i, ma koor i maso jau abo jaan i, ma nani ibeberkat au papon ibòru. Rebèka didjawa Isaäk tiòpan tapèna so Esau, ma sijoer Esau bibur ria makata, siaaw Jakob, tiòpan so i: koor seira maso jau nek aantummuan biateen mònu, nani isanana sanu to wèsjeen tapè tamamu sanèwesjeen diaan si, ma nani koor si maso tamamu abo diaan i, ma biberkat au beruswa Esau. Bape Jakob miteit, ma tiòpan so sinjani: bape Esau bietum, ma ibaro tum, imateit jai riut jau nani rin jawia i. Bape sinjani tiòpan so i: budjawa jau wènasja! rua, nunari tapè itòpan to! Inèni Jakob ria koor nek aantum muan mònu so sinjani, ma sinjani sinana sunnè tèrai tapè Isaäk sanèwèsjeen diaan i; ma koor Esau niè sansun beateen sibata tuter i, ma sisun Jakob tuter si; ma koor nek-rawa, diur i na Jakob niè wara ma raupai, ma dimis Jakob, koor pi sinana to maso tamani. Ma Jakob riapwir so tamani, tiòpan: Jail

Ma Isaäk tiòpan: janina! teĩ au inè aantum? Ma Jakob riar so i: jau Esau, mèmü aantum rètenam! inanari to tapè tuòpan maso jau to! musoi, buaan inè pitatitaanpi! Bape Isaäk tiòpan so Jakob: ruama so jau abo irut au! Jakob ria so tamani, ma Isaäk riut i, tiòpan: jadjawa kubio 'tapè Jakob, bape waramu tapè Esau niè wara. Isaäk rin ba Jakob diawia i, ma diaanpi. Isaäk diaanpi to, tiò biberkat Jakob, tiòpan: sum jau! Inèni Jakob sium tamani. Ma Isaäk dinasei Jakob niè sansun, tiòpan: inè aantum sieir tapè utan witoi Sjen biberkat to. Ma nani diònè so au na sarepa na rora ma na miein na utan, ma faas, ma aibò angor pau mò! Kawàsa nani sensajoriaat au, ma sentatuan so au, buesjen na mèmü raarwomuansiat, ma sinjamu niè aantumsiat sentatuan so au! Siat, senkemberei au nani senbekariria, ma siat sensanèpai au nani sensèmuai berkat.

3. Isaäk biberkat Jakob to, Jakob bibur tamani. Inèni Esau riama, sinana pimuna miun i to, kioor i maso tamani, ma tiòpan so i: Jai! buòsa! buaan pisjaan na mèmü aantum! ma buaan to keis, nani biberkat jau! Bape Isaäk tiòpan so i: teĩ au? Esau riar so i: jau Esau, mèmü aantum rètenam! Kabò Isaäk tindoor to baba, ma tiòpan so i: teĩ katuena riama so jau to, ma kioor pimuna sinana maso jau, ma jaan i to, ma ibeberkat i to? ma berkat nini nièwi to bewàtan! Esau didjawa pi nini, sieis to baba besiri, ma tiòpan so tamani: Jai! nuè berkat esi maso jau ba te? Jai! biberkat jau kòta! Inèni Isaäk tiòpan so Esau: Sujoor! utan diteen nani nuè i, ma mèmü njoikòroos diaum au, ma nani budjawa so madjawipai! Inèni Esau kiembèrei Jakob, so diawia tamani ma minana berkat beruswa Esau. Ma Esau tiòpan na mitauni: nani jai biòru to, nani imun madjawi! Bape Rebèka diniau Jakob, tiòpan so i: bupaira so amamu Laban, musoi tuter i, to Esau kisjo au minau to. Inèni Rebèka tiòpan so sawani: Jakob kòta riaut bwawin Het tapè Esau te, so itenam rami? Inèni Isaäk siaaw Jakob, tiòpan so i: rua so Padan Aran, so amamu Laban; na wana kuoor bwiniemu; ma Alla pia wura biberkat au, diònè aantum borei so au, ma diònè so au Abraham niè berkat! Inèni Jakob ria so Laban, so utan Mesopotamiè.

---

### § 13. Jakob ria so Laban.

1. Jakob ria pana, ma diru tiò diena, siserei rëwuki be airiwan, ma biata diena. Ma dienamia, sijoor atè diòsa na kakòpa ma tirieu to rora, ma Melaikat senbaar ma sensa na i; ma Jakob sijoor Sjen mitauni diòsa na atè babopai ma tiòpan so i: Jau Sjen Alla na tamamu Abraham ma na tamamu Isaäk. Utan nini buena na i, nani Jònè so au, ma so mèmü aantumsiat, nani senpau mò, ma nani senna na matan to muran, na ba to mirei; ma kawàsa wura na dunja nani sensèmuai berkat na au. Ma nani Imasoiriaat au, ma Inèwori au napa rua; ma nani Ikoor au ja so utan nini; ma witoi Itòpan so au nani Inanari i bewàtan. Inèni Jakob tindo ma tiòpan: wàtan! Sjen nia na nina ma irin i ba. Ma Jakob miteit, tiòpan: nanina utan tandoor! nania Alla niè anio, nanina rora niè aturè! Ma porera Jakob diòsa, diònè rëwuki airiwan diòsa, ma biubu mani babo i, ma diap utan nini: Bètel (anio Alla) Ma Jakob tiòpan: Sjen Alla nani tiuter jau, ma nani misoiriaat jau napa nani ira, ma diaum jau, ma diònè sansun so jau, ma diònè nani isòbera ja na diteen so jai niè anio, tapèna rèto, nani Sjen, I Alla inèwi.

2. Inèni Jakob ria so muran pa, sijoor kambo sèrai, ma gombala tòru tuter sennè dombasi sentanòta to esiat sendama so siat, abo senkoor rëwuki biba beruswa kambo sèrai niè sòrè, ma sentònè sennè dombasi siunum. Ma Jakob diutan siat: he, manèta! miat na toi? Sendaar so i: amat na Haran! Ma diutan siat ja: menrin Laban, Nahor aantum te? Sendaar so i: amanrin i, sujoor niè aantumbwawin Rakel riama tuter niè dombasi. Ma Jakob sijoor Rakel, kioor rëwuki beruswa kambo sòrè, diònè Laban niè dombasi siunum. Inèni Jakob tiòpan so Rakel: raarwomu jau! isaaw tamamu be ama! jau Rebèka aantum! Ma Jakob sium Rakel. Ma Rakel dipaira so tamani, tiòpan Jakob so i. Ma Laban didjawa niè anò Jakob riama to so i, riabedjoor i, ma kioor i so niè anio.

---

## § 14. Jakob misoi so Laban.

1. Jakob misoi paik siri so Laban Laban tiòpan so i: anò! tanè musoi so jau sarèdjeu? tuòpan wénasja nani ibait au witoi. Laban niè aantumbwawin mònu, babai sanò Lea, madjawi sanò Rakel. Lea niè rèpai beanamsabaru, bape Rakel niè rèpai diteen. Ma Jakob tiòpan so Laban: nani inanaripi so au taun rimmònu (7), buònè Rakel maso jau. Laban tiòpan so Jakob: wèsjeen! inasèwèsjeen jònè i so au, musoi tuter jau wénasja. Jakob sanèpai Rakel to baba, so nini taun 7 si masis so i tapè raria 7. Ma taun 7 si keito, Laban diawia Jakob, diònè Lea riwàni Rakel so i. Jakob kisjo Laban, tiòpan so i: so buawi jau? Laban riar so i: tannè buwai anina: babapai ririoot papon, bape madjawi ririoot bepui. Bape nunari so jau taun rimmònu esi ja, nani jònè Rakel kòta so au. Inèni Laban diònè Rakel kòta so Jakob.

2. Ma Jakob nianari to taunsi keis, tiòpan so Laban: buònè ibabur tuter inè bwiniempi sanu ma inè aantumsiat, isobera so inè utan. Bape Laban tiòpan so i: isajoor to: Alla biberkat jau so au; musoi, ma tuòpan wénasja nani ibait au witoi. Ma Jakob tiòpan so Laban: buait jau tuter dombasi ma neksi! Ma Sjen biberkat Jakob, ma diònè aantummuan 12 ma aantumbwawin siri so i. Aautummuan sennè sanòpai: Ruben, Simeon, Lefi, Juda, Dan, Naftali, Gad, Aser, Isaskar, Sebulon, Josef ma Benjamin; ma aantumbwawin sanò Dina.

3. Ma Jakob misoi so Laban taun surabemònu (20) to, Sjen Alla tiòpan so Jakob: bubur, burien so tamanu niè utan, ma nani Ituter au! Inèni Jakob siaaw Rakel ma Lea, tiòpan so sanu: isajoor to tamamu sanèpai jau ba pena. Munrin inanari tindia so i, bape tamamu diawia jau, riwàni inè bait besura to. Bape Alla bidjoor i, tapèna pia ba nianari kariria maso jau. Rakel ma Lea sundaar so i: nunari wénasja witoi Alla tiòpan so au. Inèni Jakob dirien tuter niè bwawinsiat ma aantumsiat, ma pi wura witoi niè wura.

4. Jakob bibur raria tòru to, sentòpan maso Laban: Jakob bibur to! Inèni Laban tuter niè aantummuansiat ma niè kawàsa sentusaar Jakob. Ma Laban deriasi Jakob pena, diena na wis Gilead. Bape diru jani Sjen Alla diniau Laban na enamia, Sjen tiòpan so i: nunari ma kubio kariria so Jakob pènai! Ma Laban sièmuai Jakob, tiòpan so i: so nunari tapèna! so bubur jau manana, ma munana bruswa jau inè aantumbwawin sanu tuter sennè aantumsiat! Itò imun au, bape

tamamu niè Alla bidjoor jau, diniau jau, tiòpan: nunari ma kubio kariria so Jakob pènai! Bape Jakob riar so i: kusjo jau so? buawi jau wènasja! Alla sanèpai ma biberkat jau ba rèto, isèmua pi siri barami! Inèni Laban ma Jakob sunkabio berina, sunsawora sanu tuter sunnè aantumsiat senbemanèta to wòroi wòroi. Ma kausapa Laban tiòpan tabea ma biberkat niè aantumbwawin sanu tuter sunnè aantumsiat; keis, siòbera. Inèni Jakob dirien ja, ma sièmua Melaikat pau, ma tiòpan: nini Alla niè sendurpai! Ma diap utan, napa sijoor siat: Mahanaim (sendurpai mònu).

---

### § 15. Jakob sijoor Esau.

1. Jakob dimis sinjontusiat so niè baba Esau, sentòpan so i: kusjo Jakob pènai! Ma sinjontusiat sensòbera to, sentòpan so Jakob: amanda so mèmu babai, tiò mitauni riama sijoor au, ma niè sinjontusiat utin beat (400) sendausaar i. Jakob didjawa nini, miteit to baba, niadi, tiòpan so Sjen: Mantaunau Sjen Alla, tuòpan so jau: burien so mèmu utan! Sjen! jau masis ba maso pi diteen wura buòne to so jau! Bape budjoor babai, abo miun jau ba! Inèni Jakob dinatu so Esau nek bwawin utin bemònu (200) ma nek muan sura bemònu (20), ma tiòpan maso senkoor si: mensajoor babai, nani mentòpan so i: pi nèsi wura nuè hamba Jakob diònè so au. Senda to, dinatu ja so Esau: domba bwawin (200) ma domba muan (20). Ma sira to, dinatu ja so Esau, ontasi bwawin sura betòru (30) tuter siaantumsi. Sira to, dinatu ja so Esau sapi sura beat (40) tuter siaantum 10. Sira to, dinatu ja so Esau kalide bwawin sura bemònu (20) tuter siaantum 10, ma tiòpan maso siat senkoor si wura, kabiosi tapè tiòpan to maso senda bepapon. Inèni Jakob diònè nièpaisiat senda tu kambo dira Jàbok, ma niè pimunasi kòta, ma diaas siat betòru, tiòpan: Esau miun tatat te, esiat senbabur so rin siat ba. Ma Jakob misoi mièser abo dinòta babai. Ma na diru sinjontu siri riama so Jakob ma sunbari sanu to porera. Ma sinjontu riut Jakob niè samakatai, ma Jakob ria samatabera. Ma sinjontu nini tiòpan so Jakob: buònanè ibabur! Bape Jakob tiòpan so i: nani iwarakaar au ba, to buberkat jau papon! Tiòpan ja so Jakob: buap sanòmu! ma riar so i: jau Jakob. Ma tiòpan so Jakob: Jakob mojar, bape sanòmu Israel (radja na Alla) so buari tuter Alla ma kawàsa, ma ruwain siat. Ma

biberkat Jakob ma bibur. Ma Jakob diap utan nini: Pniel (Alla niè rèpai) tiòpan: isajoor Alla, bape inei ba to.



2. Ma kausapa Jakob sijoer Esau na warieu riama tuter niè sinjontu 400. Ma Jakob ria so i, tituan to djo berimmònu maso babai. Ma Esau dipaira so i, tipurtawan i ma sium i, ma sunseis. Inèni Esau sijoer Jakob niè kawàsa tiòpan so i: tei siat nina? Ma Jakob riar so i: siat Sjen Alla diònè siat maso nuè hamba. Ma Lea ma Rakel tuter aantumsiat sendama kòta so Esau, ma sentatuan so i. Inèni Esau tiòpan so Jakob: tanda! ipapon miat. Bape Jakob tiòpan so i: mojar! rua tuter amat pènai! inè aantumsiat ma inè pimuna sinè aantumsi sipa barami; amanda nanaria abo sibòru ba. Ma Esau tiòpan so i: bape esiat na inè sinjontusiat sentuter au te? Bape Jakob riar so i: So? mojar! sanèpai jau wènasja! Inèni Esau siòbera ja so niè utan Seir, ma Jakob dirien so Sukkot. Ma Jakob sijoer tamani Isaäk ja, misoi

kabiosi pau beja wënasja, nani sensèmuai kòta. Bape mennadi, mennadi tapèna:

Amantamami rora!

Buòne sanòmu sièmuai hormat

Buòne kawàsa wura senkòrusaar Au tapè sennè Radja.

Buòne witoi Muajar riama na dunja tapè na rora.

Buòne raria nini pisjaan maso amat.

Ma bumaaf amannè tatar, tapè amanbemaaf siat senbetatar maso amat.

Kuoor amat pënai napa sentònusaar amat so tatar, bape kuoorbruswa amat na kaririapai.

So Au anina Radja wàtan

Nuè pajapai wàtan

Ma pi diteen wàtan to mënauba wàtan. Amin.

Mennadi, ma nani mensèmuai; mensasërei, ma nani mensèmuai; menpira, ma nani sensèban maso miat.

5. Witoi mensanèwèsjeen esiat sennanari so miat, mennanari tapèna maso siat kòta, so tapèna Torat ma Nabisiat sentaniau. Mendapwir atorè kiòtar! so atorè biba ma raanpai sibaberi ria so kaririapai, ma kawàsa pau senda na nini; bape atorè kiòtar, ma raanpai sibaberi ba ria so tenampai wàtan, ma siat pauba sensèmuai i. Siat sentòpan wënasja so Jau: „Sjen! Sjen! nani sendapwir karadjaän rora ba. Bape siat sennanari witoi Jai-rora miajar senmèser sendapwir rora. Ma Sjen minau diniau kawàsa kabiosi nini, sentandoor: so diniau siat ba tapè panditasiat Jehudi, bape tuter pajapai wàtan.

---

## § 24. Katim na Naïn biòru to, bape tindo ja.

1. Sjen ria so aniose esi sanò Naïn, ma muridsiat tuter kawàsa pau sendausaar I. Ma riama deriasi atorè na aniose, senkoor bebòrupai esi, sentò sensërai i. Ma bebòrupai anina katim, aantum siri wënasja na sinjani inari. Ma kawàsa borei na aniose sendausaar i.

2. Sjen sijoor nini, sanëpai inari, tiòpan so i: „sueis pënai! Ma ria so bebòrupai, riut worei, ma siat senkoor i sentòsa. Inëni Sjen tiòpan so bebòrupai: „katim! Itòpan: tundo!" Ma bebòrupai misoi pena, ma kibio ja; ma Sjen diòne i ja so nje sinjani. Ma senmateit

na utan Mamre. Ma Isaäk biöru, biemansaar watan, niè taun 180.  
Ma niè aantum sanu Jakob ma Esau sunsëra i.



### § 16. Josef tuter niè babasiat.

1. Josef, Jakob ma Rakel niè aantum, niè taun 17, biegebala tuter babasiat. Ma tiöpan sennanari kariria maso tamani. Israel sanëpai Josef raiwain aantum esiat, ma diönë so i sansun diteen besiri. Bape babasiat sensajoor nini, senkembërei Josef, senkabio rina ba so i. Ma Josef dienamia, ma witoi dienamia to, tiöpan i so babasiat. So nini senkasjo i to baba. Tiöpan so siat: mentadjawa witoi jenamia to! Tankutui faas na rom, ma tanbora i, ma inè bora diösa tindia, bape mennè borasi siösa wariri inëpai, ma sitatuan so inëpai. Bape baba-



siat sentòpan so i: nani buprenta amat te? nani au amannè sjen te? Ma Josef dienamia esia ma tiòpan usara i so babasiat, tiòpan: jenamia ja tapèna: isajoor wore, sembiai ma sibèrère sura bemandu siri (11) sitatuan so jau. Bape tamani tiòpan so Josef: buenamia nini, nani tanè? amat wura, jau, sinjamu, babasiat ma madjawipai, amantatuan wura so au te?

2. Raria esi babasiat senda tuter pimunasi so Sikem, bape Josef misoi. Senda raria esasi to, Israel tiòpan so Josef: rua! sujoor mèmu babasiat sentateen wura te tuter pimunasi, ma ruama ja tuòpan siat so jau. Josef ria so Sikem bape sièmuai siat ba, sijoor sinjontu siri, diutan Josef: suserei tei siat? Josef riar so i: isaserei babasiat, sujoor siat te, tuòpan siat so jau. Sinjontu tiòpan so i: idjawa sentòpan: tanda so Dotan! Josef riasaar siat, to sijoor siat na Dotan. Ma sensajoor i kòta, riama so siat na wiarieu rami, sentòpan: mensajoor! tukan dienamia riama! tanmun i, ma tankai i na kambere, ma nani tantòpan: pimuni pisabir miun i; tapèna nani tansajoor witoi dienamia to, sibewàtan te. Bape Ruben sanèpai Josef, tiòpan so esiat: mojar! niè riat titiai na tanbarami pènai! Bape nani tankai i sarèdjeu na kambere rarò. Bape Ruben diawi siat, tiò: na diru nani siraab Josef, ma diònè bibur so tamani. Inèni Josef riama to so siat, sentapur i, sendera niè sansun diteen, ma senkai i na kambere; bape kambere sinaja.

3. Inèni senmasoi, sentaanpi pena, sensajoor Ismaelsiat sendama tuter ontasi, senda so utan Mitsir sentawajan mani ma arawi seir wèsjeen, senbòri si to na utan Gilead. Kabò Juda tiòpan so esiat: so madjawi biòru? Tantawajan i maso Ismaelsiat nini! tanmun i to biòru pènai! so tannè tèrai siri anina wura! Esiat sentadjawa so Juda; senseraab Josef beruswa kambere, ma senboob i, sentikoor serak sura bemònu (20) Bape Ruben misoi ba tuter siat, rin ba senboob Josef. Inèni Ruben siòbera, sijoor kambere bireri. Sijoor nini, siabu niè sansun, sieis, tiòpan: katim nia ba to, ma nani jau tanè? Inèni senmun nek siri, ma na nek riat sensuaan Josef niè sansun diteen, ma sentanatu i so Israel, ma sentaniau tei koor i, diawi Israel, tiòpan: sièmuai sansun tapèna na utan rarò, abo Israel sijoor ririn i Josef niè sansun. Ma Israel sijoor i, ririn i, tiòpan: wàtan! Josef niè sansun! pimuna pisabir miun i to! Israel sanèpai Josef. Ma niè aantumsiat senkabio rina so i, bape didjawa siat ba, tiòpan wènasja: nani isanèpai Josef to ibòru.

pénai! Ma raria esi Josef mièser nianari pi na anio rarò, esi nia na anio rarò ba, bwawin riut Josef niè sansun, diebar i; bape Josef titai niè sansun bibur i. Kabò bwawin siaaw nièpaisiat, tiòpan so siat: sinjontu Ibrani riama so jau, diebar jau, bape jananaar, miteit, dipai bibur, bape irut niè sansun, bibur i to! Ma bwawin tiòpan tapèna kòta maso sawani, bierwana Josef niè sansun maso i. Inèni Potifar kisjo Josef, sioorbedjoor i na pandjaran, senpapai i na aipapa. Bape Sjen Alla misoiriaat Josef, diònè mananir na pandjaran sanèpai Josef, piatin aipapa, ma diònè Josef sijoriaat esiat senna na pandjaran. Ma Sjen biberkat wura witoi Josef nianari.

2. Ma mananir baba mònu na anio Farao, siri sijoriaat witoi Farao diunum, esi sijoriaat witoi Farao diaan; ma Farao kisjo sanu ma diònè sensoorbedjoor sanu na pandjaran. Ma diru esi sunrenamia. Kausapa Josef ria, sijoor sanu, sijoor sunbesusa. Ma Josef diutan sanu sunbesusa so? Sundaar so i: amunrenamia, bape nanina siri pia diniau nanu ba amunrenamia na witoi. Josef tiòpan so sanu: Alla mièser rin nini, bape muntòpan sarèdjeu so jau munrenamia witoi. Inèni mananir sijoriaat witoi Farao diunum tiòpan so Josef: isajoor airabo angor, niè arawa tòru sibetutuba, sibesumò, ma samu simarei. Ma irut paarwasi bekabiri sèrak Farao nièwi, ma ipòtu bosì, ikusar si na paarwasi bekabiri sèrak, ma jònè karupai maso Farao, diunum i. Inèni Josef tiòpan so i: arawa tòru riwàni raria tòru; raria tòru rami nani Farao sanèpai au ja, ma siaaw au, buònè diunum tapè na papon. Bape tapèna to, nani sanèpaja jau, ma tuòpan maso Farao: sensoorbedjoor jau, bape ibetatar pibai. Sanèpai jau, abo sendera jau kòta; jau sinjontu Ibrani, senmanana jau na inè utan, ma inanari tatar ba so sensoorbedjoor jau.

3. Mananir esi didjawa to witoi Josef tiòpan maso sinjontu esi, tiòpan so Josef: jenamia baja tòru siòsa babo runè; ma bena na babo diònu tuter pisjaan maso Farao; ma ajasi sirama, siaan pisjaan na baja rarò. Inèni Josef tiòpan so i: baja tòru siriwàni raria tòru; raria tòru rami, nani Farao diònè senmun au, sentabakiri au na ai siri, ma nani ajasi siaan nuè tèrai. Ma tapè Josef tiòpan to riama kòta: mananir sijoriaat witoi Farao diunum, Farao sanèpai i ja; bape esi miun i. Bape mananir Farao sanèpai i ja, piro Josef, sanèpaja i ba pana.

---

## § 18. Farao sanëpai Josef ma riut i be mananir baba na utan Mitsir.

1. Taun mònu sikeis, Farao dienamia tapèna: diòsa na kambodira dirè, ma sijoos sàpi 7 sikeira na kambo, siaan samuen, simein ma siateen besiri. Ma tòkato sapi 7 esi ja sikeira ja, bape sibeterài ba ma sikaruriaar, ma siaan sapi 7 simein to keis. Inèni Farao tindo ma sijoos dienamia wénasja. Ma diena ja, dienamia sijoos faas rabo siri siòsèra faas samu 7 sibeterài ma siateen, bape siòserari ja faas samu 7 sibeterài ba, siberàwa wénasja, ma sibekariria siaan beateensi to sikeis. Ma Farao tindo, bape dienamia wénasja. Ma kausapa Farao dimis sensaaw pandesiat, indèrisiat wura, ma sendur so i to, tiòpan so siat witoi dienamia; bape senrin ba sentòpan pi esi na nini. Bape inèni mananir tei rin Josef tiòpan so Farao: kabò isanëpaja so inè tatar! Na papon Farao kisjo mananir pisjaan nanu, sensoorbedjoo nanu na pandjaran, diru esi amunrenamia. Ma sinjontu Ibrani nia na pandjaran rarò tapè nanu; ma amuntatòpan so i, witoi amun renamia to, ma tindia tapè tiòpan so nanu amunsèmuai kòta: Farao sanëpai jau ja, ma esi Farao diònè senmun i. Farao didjawa pi nini, dimis senkoo Josef. Ma senkiaar niè ru, ma senriwani niè sansun to, senkoo i maso Farao. Inèni Farao tiòpan so Josef: jenamia to, ma idjawa ruin nini. Bape Josef riaar so Farao: na mantaunja irin i ba, bape Alla diniau Farao. Inèni Farao tiòpan so Josef witoi dienamia.

2. Inèni Josef tiòpon so Farao: buenamia pi mònu, bape sunraniau masis baberi. Witoi Alla nani nianari diniau i papon maso Farao. Sapi 7 simein, ma samu faas 7 sibeateen, siriwani taun 7. Sjen Alla nani diònè taun 7 pi sentanam wura sisiwara ma sibebo pau besiri, tapè sensajoo barami na utan Mitsir. Bape taun 7 nini sikeis, nani na taun 7 esi, pi siri siwara ba, bape kawàsa senbaro pisjaan, senbabisi. Ma Farao dienamia bemònu, nini bierwana: Sjen Alla nani nianari tapèna seira. So nini Farao sisèrei sinjontu tindia ma pande, ma riut i be mananir na utan Mitsir, ma nani riur faas na utan betutira, siaaw na kawàsa na ròtan faas 5 ròtan siri, abo taun 7 sikariria nani sianina to, menbaro pisjaan ba.

3. Ma Farao tuter niè kawàsa sensanèwèsjeen so kabiosi nini. Ma Farao tiòpan: nanè amansèmu sinjontu tindia ma pande raiwain i, niè rwanunum na Alla? Inèni Farao tiòpan so Josef: so Sjen Alla

dinau au to, siri esi pande raiwain au ba! so nini irut au be mananir na inè anio ma inè kawàsa wura sentadjawa so au! Jau Farao, bape siri esi biba raiwain au ba, na utan Mitsir betutira! Inèni Farao piupar niè warakiakawin, ma diur i na Josef niè warakia; ma sisun i tuter sansun diteen, ma diònè Josef sirio rante brawen, ma diònè Josef misoi na Farao niè karèta bemònu, ma senkoor Josef tuter karèta nini na aniose betutira; ma sinjontusiat sentapaira papon i sensaaw: mentatuaan wura so i! Ma Farao tiòpan ja so Josef: jau Farao, bape na utan Mitsir betutira siri sii niè wara pènai, muajar nini ba.

4. Josef niè taun 80 bieradja katu na Mitsir. Ma tapè tiòpan to: taun 7 pisjaan pau mò. Ma Josef riur faas pau tapè rubwan na saei dirèpai. Ma taun 7 nini sikeito, pi siri siwara ba, tapè Josef tiòpan papon to. Na utan esi kawàsa senbaro pisjaan, bape na utan Mitsir sennè faas masis. Inèni Josef diwajan faas maso kawàsa. Ma na utan esi wura senda so Mitsir, abo senbòri faas.

---

### § 19. Josef babasiat senda so Mitsir.

1. Israel didjawa to na Mitsir sennè faas, tiòpan so aantumsiat: tanè mensasir wénasja miat? Menda so Mitsir, menbòri pisjaan so tatat, abo tanbòru ba! Inèni senda wura, Benjamin mièser misoi, tamaan miajar ba ria, miteit pi siri miun i. Ma senda so Josef, so Josef biprenta faas. Sendama so i to, sentatuan to djo so i. Josef sijoor siat, rin siat, bape senrin i ba. Sentatuan so Josef, Josef sanèpaja witoi dienamia to na siat. Inèni tiòpan so siat: irin to, mendama menkei amat, abo nani menmun amat. Bape sendaar so i: amat mèmum womensiat, amandama nanina abo amanbòri pisjaan. Amat aantumsiat na tamaan siri; amat kawàsa rina, amankei miat ba. Bape Josef tiòpan so siat: pibai! mendama abo mensajoor utan nini tanè, ma napa menpa menmun amat! Suntòpan ja so i: amat, mèmum womensiat, amat aantum sura bemandu siri (11) na sinjontu siri na utan Kanaän, ma madjawi misoi tuter amantamami, ma siri na amat niei to. Ma Josef tiòpan so siat: tapè itòpan to: miat menkei amat. Bape nani isajoor tatoa miat: wàtan! tapè Farao tienam! menbabur ba to mennè madjawi riama nanina. Mentamis siri na miat, ria kioor i, bape miat esiat isooredjoor miat na pandjaran, to madjawi riama to.

2. Sensoor bedjoor siat raria tòru to, inèni Josef tiòpan so siat: nani mennanari tapèna abo mentenan: imateit Alla, miat kawàsa rina te, wèsjeen! siri na miat misoi, bape miat esiat menda, menkoor pisjaan so mennè kawàsa, mendama ja, menkoor madjawipai so jau, nani isanètiaar miat. Kabò sentòpan babera so siat: tannè tatar na tannè madjawi kabò tiera tatat. Tansanèpai i ba, ma sieis tantadjawa i ba; so nini kabò tanbekariria! Ma Ruben dieuso siat, tiòpan so siat: itòpan ba so miat te, mennanari kariria so katim pènai? bape mentadjawa jau ba! mensajoor! niè riat sisèrei tatat. Senkabio babera tapèna, senrin ba Josef didjawa siat kòta, so djurubasa siri riwàni Josef niè kabio so siat. Josef didjawa kabiosi nini, siòbera ja so siat, dipon siat, ma kibio so siat, ma biprenta sentabit Simeon, sensajoor i wura. Ma Josef biprenta sensaar faas na sennè ròtansi, ma kumpangsi, sentikoor faas, senpir si na ròtanpaisi sòrèpai, ma sentònè pisjaan sentaan na raanpai. Ma sentarien si na kalidesi karupai, senda. Ma diru sentò sentònè pisjaan so kalidesi, siri sijoor kumpang sibata na ròtan sòrèpai, tiòpan so esiat: kumpangsi tantikoor faas sisobera so jau ja! mensajoor! sibata na inè ròtan rarò! Ma sentandoor, senmateit wura, sentòpan: tanè nini? witoi Sjen Alla nianari maso amat?

3. Ma sendama to so sentamami Israel, ma sentatòpan usara pi wura so i. Inèni senbubui faas beruswa ròtansi, sensajoor kumpangsi, sentikoor faas, sina na ròtan wura; ma senmateit to baba. Ma Israel tiòpan so siat: menkoor inè aantum wura beruswa jau! Josef nia ba to, Simeon nia ba to, inèni nani menkoor Benjamin kòta bruswa jau! pi nini sikariria beja maso jau! Ma Ruben tiòpan so tamani: Jai! nani ikoor Benjamin ja ba, nani mun inè aantum sanu sarèdjeu! Bape Israel riar so siat: mojar! babapai niei to, imajar bemadjawi ria ba, riauxaar miat ba! Imateit nani niei kòta, ma kariria nini nani miun jau.

---

## § 20. Josef babasiat senda so Mitsir ja tuter Benjamin.

1. Na utan Kanaän kawàsa senbabisi to baba besiri. Ma Israel tuter niè kawàsa sentaan senkoopaisi to sikeis, Israel tiòpan so aantumpaisiat: menda so Mitsir, menbòri faas maso tatat! Bape Juda riar so tamani: Sjen na Mitsir tiòpan to so amat: menkoor madjawi

ba, wàtan! nani mensajoor jau ba to! Ma Israel tiòpan: so mennanari kariria nini? so mentatòpan mennè madjawi rami? Ma sendaar so sentamami: diutan amat tindia so tatat, diutan: mentamami tienam rami te? mennè madjawi rami te? so nini amantatòpan pi nini so i; amanrin te, nani tiòpan: menkoor madjawipai? Inèni Juda tiòpan so tamani: Jai! buònè madjawi ria tuter jau, ma amanda abo amanbòru na babisi ba, au, ma amat ma mèmum marariasiat wura! Bemadjawi nani ikoor i ja maso au ba, nani inè tatar! kusjo jau to ibòru! amantanòta wòroi beja to; pibai rèto, amansòbera to bemònu. Inèni Israeltiòpan so siat: itataar! menda sarèdjeu wènasja! menkoor maso sjen na Mitsir pi diteen esasi na utan nini: mani ma airawi seirwèsjeen ma pi esi, mentònè si so i, abo sanèpai miat. Menkoor kumpang abo menbòri faas, ma menkoor sòbera so i kumpang mentikora, so tanrin ba senpasaan sàsara si te. Ma Sjen Alla pia wura diònè sjen na Mitsir sanèpai miat, ma diònè mensòbera ja ma wura so jau. Ma jau! nani ibaro aantum, ibaro siat sarèdjeu!

2. Inèni senda so Mitsir. Ma Josef sijoor Benjamin, tiòpan so niè hamba: koor sinjontusiat nini so inè anio; ma mun pimuna, ma sensanana i, so raria nini sentaanpi tuter jau! Inèni hamba koor siat so Josef niè anio. Bape senmateit to baba besiri. Bape tei koor siat tiòpan: menmateit pènai! Ma ria, koor Simeon ja tuter siat, ma diònè kambo, senroram sendaimi, ma diònè pisjaan maso sennè kalidesi. Ma pi wura senkoor, abo sentònè so Josef, senpir si to tindia. Ma Josef riama so siat, sentatuan to djo so i, ma sentònè so i pi senkoor to so i. Ma diutan siat: mentateen wura te, ma mentamami, mansaar, mentòpan i to so jau, tienam rami, ma i kòta diteen te? Sendaar so i: mèmum women amantamami tienam rami! ma sentatuan ja so i. Ma Josef dipon niè madjawi Benjamin, diutan siat: nini menbemadjawi, mentòpan i so jau, aninanè? Ma tiòpan so Benjamin: inè aantum! Sjen Alla senèpai au! Bape tiòpan nini to, pia ba pana; bibur so anio rarè esi, ma sieis, so sanèpai Benjamin to baba. Ma minau sieis, rioram rèni, ria ja so siat, ma biprenta niè hamba koor pisjaan. Ma diònè senmasoi na medja ariri sennè taunsi na baba to madjawi. So nini sentandoor ja. Keis, diònè pisjaan masis siat, bape diònè so Benjamin pisjaan pau raiwain siat.

## § 21. Josef tiòpan mitauni so niè babapaisiat.

1. Josef biprenta niè kawàsa, tiòpan so siat: mensaar faas na sinjontusiat nini sennè ròtansi to masis, ma kumpangsi sentikoor faas menpir si na ròtan sisòrèpai, ma inè paarwasi bekabiri sèrak menpir i na madjawi niè ròtan sòrèpai tuter kumpang dikoor faas. Ma sennanari tapè Josef tiòpan. Ma kausapa bera Josef diònè sentàrien. Ma senda wòroi barami, Josef tiòpan so mananir na niè anio: rual busaar siat, ma tuòpan so siat: so menbait pikariria riwàni pi diteen? Ma ria, sièmuai siat, ma tiòpan so siat tapè Josef diniau i. Bape sentòpan so i: kumpangsi amansèmua si na ròtan sisòrèpai, amankoor si ja, tanè amanmanana sèrak te, brawen te, na mèmù sjen niè anio? Sujoor tatoa amat sarèdjeu! teĩ na amat niè paarwasi bekabiri sèrak, mun i, biòru sarèdjeu! ma nani amat wura mèmù women! Ma riar so siat: wèsjeen tapè mentòpan: teĩ niè i, inèwi bewomen. Inèni sentònè sennè rotansi siòsa so djo, ma sensèban sisòrèsi, ma sisèrei na ròtansi wura, babapai niè ròtan bepapon to riana so madjawi. Ma na madjawi niè ròtan sièmuai paarwasi bekabiri sèrak. Ma sensajoor nini, sensabu sennè sansunsi, ma sensobera so aniose.

2. Sendama ja so Josef niè anio, sentatuan to djo maso i. Inèni Josef tiòpan so siat: witoi nini mennanari to! Mensanèpaja te, isaserei nini ba? Inèni Juda tiòpan so i: amantòpan witoi rami? Alla sièmua to mèmù womensiat sennè tatar! Sujoor sjen! amat wura mèmù womensiat! Bape Josef riar so i: mojar! bape mièser i kioor inè paarwasi bekabiri sèrak, inè i bewomen, bape miat esiat menda sarèdjeu so mentamami. Inèni Juda ria, diòsa deriasi Josef, ma tiòpan so i: kariari sjen! ira so nuè women amantamami, bape katim nini nia ba, nani amantònè nuè women amantamami nani biòru na marioor baba. Nuè women jau, ikabio riwàni katim nini to. Nuè women jau, imaso sarèdjeu, bape buònè katim nini riauxaar babapaisiat.

3. Kabò Josef pia bidjoor mitauni ba pana; siaaw: inè kawàsa miat! menbabur wura! Senda to, Josef sieis to baba, ma siaaw na sennè kabio, kabio Ibrani: Jau Josef! Jai tienam rami te? Bape babaisiat senpa ba sendaar so i, so sentandoor beja. Josef tiòpan ja so siat: mendama sarèdjeu! jau Josef! mennè madjawi! menboob jau to, abo senkooor jau so Mitsir, bape menmateit so nini pènai! So Sjen Alla dimis jau nanina, abo mentenam! Nani taun rim rami sentanam

rom ba, ma senkutui faas ba. Mentamis jau nanina ba, bape Alla mitauni dimis jau nanina. So nini menda seira so jai, ma mentòpan so i: tapèna nuè aantum Josef tiòpan so au: Alla biemananir jau na utan Mitsir betutira! ruama seira! sudadjara pènai! nani jaum au, so taun rim rami nani babisi baba. Menda seira! menkoor jai seira nanina. Inèni Josef tipurtawan Benjamin, ma sunseis. Ma Josef sium babaisiat wura, ma sieis tuter siat; keis, siat senkabio so i, so sen-sajoor to kisjo siat ba.



## § 22. Israel ria so Mitsir.

1. Faraò didjawa Josef babaisiat sendama so i, sanèwès-jeen, ma tiòpan so Josef: buòné babaipaisiat senda, senkoor pisjaan ma buòné



karètasi so siat, abo senkoor tamamu tuter nièpaisiat wura nanina. Josef nianari tapè Farao tiòpan to, ma diònè kòta so babaisiat sansun siateen, esi niè esi, bape diònè so Benjamin kumpang 300, ma sansun siateen rim. Ma dinatu maso tamami: kalide muan sura (10) ma kalide bwawin sura, sibaar faas ma mamami ma pi sentitaanpi. Ma dimis babaisiat, tiòpan so siat: menda sarèdjeu, menmateit pènai, ma menda seira!

2. Senda pana so utan Kanaän maso sentamami. Ma sendama so i, sentòpan so i: Josef tienam rami, ma biemananir na utan Mitsir. Israel didjawa nini, pia ba pana, bape pia ba kòta sanètiaar sennè kabiosi. Inèni sentatòpan so i pi wura witoi Josef tiòpan so siat. Ma Israel sijoor karètasi Josef dinatu si so i, sanèwèsjeen to baba, tiòpan: nini diteen beja maso jau! Josef tienam rami! wèsjeen! nani ira isajoor i papon ibòru. Ma Israel dirien tuter wura witoi niè maria papon to Berseba, ma wana niunum soom maso Alla na tamani Isaäk. Ma na diru Alla kibio so i, tiòpan so i: Jau Alla, Alla na tamamu! muteit pènai rua so Mitsir, so na wana nani Inanari au be kawàsa pau; ma na raria buòru, nani Josef sioor rèmu.

3. Inèni Israel dirien ja, ma dimis Juda papon maso Josef. Inèni Josef sia niè karèta, riabedjoor tamani. Ma siemuai i, Josef tipurtawan tamani, ma sieis wòroi. Ma tamani tiòpan so i: inèni ibòru sarèdjeu, so isajoor rèmu to, isajoor tuenam rami! Inèni Josef ria, tiòpan tamani so Farao. Ma Farao tiòpan so Josef: tamamu tuter niè aantum-siat sendama to so au, buònè so siat utan diteen, utan Gosen, senna na wana. Ma buiria na babapaisiat bepandepai esiat, abo irut siat be mananirsiat na inè gombalasiat. Ma Josef kioor tamani maso Farao, abo sijoor i. Ma Israel biberkat Farao. Ma Farao diutan i: nuè taun toi te? Ma Israel riaar so Farao: itenam tapè ambeer na dunja taun utin bemandu sura betòru (130) to; taunsi si pau ba ma si kariria, ma si masis taunsi na tamaanpaisiat ba. Ma Israel biberkat Farao, ma bibur. Ma Josef diònè aniosi ma utan so tamani ma nètapaisiat na Mitsir. Ma Israel tienam na utan Mitsir rami taun sura bemandu rimmònu (17).

### § 23. Israel biòru.

1. Ma Israel rin pena tienam wòroi rami ba, siaaw Josef, ma tiòpan so i: Au sanèpai jau wàtan te, suawora so jau: nani mensèra jau pènai na utan Mitsir, bape menpir inè tèrai tuter tamaanpaisiat. Ma Josef siawora so i: nani nianari tindia tapè Israel miajar. Ma bepui nini senda sentòpan so Josef: tamamu piòta! Inèni Josef kioor tuter i niè aantum sanu, Manàsè ma Efraim, ma ria so tamani. Ma sentòpan so Israel, aantumu Josef riana so au! Israel didjawa nini, tindo, misoi. Ma Israel sijoor Josef aantum sanu, diutàn: tei sanu? Ma Josef riar so tamani: aantum sanuna Alla diònè sanu so jau. Israel sium ma tipurtawan sanu, ma biberkat sanu. Ma biberkat Josef kòta, tiòpan so i: Alla, tei sioriaat inè tamaan Abraham ma Isaak, Alla tei diaum jau tawana to raria nini, Melaikat tei kioor jau beruswa kariria wura, biberkat aantum sanu nini! Inèni Israel tiòpan rami so Josef: nani ibòru, bape Alla misoiriaat miat, ma nani kioor miat ja so tamaanpaisiat sennè utan.

2. Inèni Israel siaaw aantumpaisiat wura, ma tiòpan so siat: mendur maso jau, abo itòpan so miat nani miat tanè. Ma biberkat ariri siat, babai na papon to madjawi, tapè Alla diniau i. Ma biberkat Juda raiwain esiat, tiòpan so i: Juda! au to! nani nètapaisiat sensènendik au. Juda tapè singa aantum! Septer (aitato radja) bibur i ba, ma tei biprenta bibur i kòta ba, to Silo riana, ma I nani kawàsa wura sentadjawa so I. Ma Israel biberkat siat wura to, biòru. Ma biòru to, Josef tipurtawan i, ma sieis, ma sium i. Inèni Josef biprenta tukansiat airawi, sennanari tamani niè tèrai to kirakwai abo misoi to wòroi, tapè Mitsirsiat senririn i. Ma kawàsa Mitser sentariori so Israel raria sura berimmònu (70). Bepui nini Israel aantumsiat senkoor niè tèrai so utan Kanaän, senpir i na swep Magpela rarò. Swep nini Abraham biòri i to be niè kubirpai.

3. Israel biòru to, Josef babaisiat senkabio babera, sentòpan: inèni nani Josef kièmbèrei tatat, ma biait tatat kariria witoi tannanari so i to. So nini sentamis sinjontusiat so Josef, sentòpan so i: tamamu biòru barami tiòpan so amat: tapèna nani mentòpan so Josef: kusjo pènai so babaisiat sennè kariria, ma sennè tatar! Ma senkabio tapèna so Josef, Josef sieis. Inèni babaisiat mantaunsiat sendama so i, sentatuan to djo so i. Bape tiòpan so siat: menmateit pènai! Iriwani Alla te?

Mennanari kariria maso jau, bape Alla riwani nini be diteen, abo kawasa pau mò senbòru ba. Tapèna kibio rina so siat, ma diònè sensanèwèsjeen ja. Ma Josef tiòpan so siat: nani ibòru, bape irin nani Sjen Alla diònè menda beruswa utan nini, ma menda ja so utan witoi Alla diònè i bewatan to maso Abraham, Isaäk ma Jakob. Tapèna nani Alla sanèpai miat, nani menkoor inè tèrai kòta tuter miat! Ma sensawora so i: nani sennanari tapè Josef siaaw so siat. Ma Josef biòru, niè taun utin bemandu sura (110).

## § 24. Job.

1. Anina na utan Us sinjontu siri, sanò Job; tienam tindia ma wèsjeen. Kiòrusaar Alla, ma miteit tatar. Job niè aantummuan rim-mònu, ma aantumbwawin tòru. Niè kòta domba 7000; onta 3000; sapi 500, ma kalide 500. Niè kòta kawasa pau mò, tapè sinjontu esi niè ba na utan muran. Ma niè aantumsiat sendur senbefesta na sennè raria, ma Job diniau siat: senparo Sjen ba na sennè festa. Ma senbefesta to, Job tindo na kausapa bera, ma niunum soom maso Alla, riwani niè aantumsiat, so miteit senbetatar te. Ma raria esi Melaikat sendur maso Sjen Alla, sjètan kòta diòsa tuter siat. Ma Sjen diutan sjètan: ruama na toi? Sjètan riar so Sjen: ira warari dunja to. Sjen tiòpan so i: inè manèta Job, sujoor i je? Na dunja esi tindia tapè i ba. Bape sjètan tiòpan: Job sanèpai Au sarèdjeu tè? buberkat pi wura witoi nianari, ma buònè niè pimunasi pau mò na utan. Inèni Sjen tiòpan so sjètan: sujoor tatoa i wenasja! pi wura nièsi jònè so waramu, niè tèrai mièser pibai. Inèni sjètan bibur.

2. Na raria esi Job aantumsiat sendur sentaan pi festa, sinjontu siri dipaira so Job, tiòpan so i: rait Sabe miun mèmù kawasa to, senkoor mèmù sapsi ma kalidesi, ma senbòru wura, mèser jau ibabur, japai abo itòpan pi nini so au. Sinjontu nini kibio rami, esi dipaira so Job, tiòpan so i: kabjebar miun mèmù dombasi tuter gombalasiat, mèser jau ibòru ba, japai, itòpan nini so au. Sinjontu nini kibio rami, esi ja dipaira so Job, tiòpan so i: rait Kaldea kioor mèmù ontasi, ma miun mèmù kawasa wura, mèser jau ibabur, japai abo itòpan nini so au. Sinjontu nini kibio rami, esi ja dipaira so Job, tiòpan so i: mèmù aantum wura sendur sentaan pi festa, besiri

wana baba tòrò na utan biro miun anio senmasoi na i, diònè anio tiawa, miun mèmù aantumsiat senbòru wura. Inèni Job siabu niè sansun, kjaar niè ru, tituan to djo ma tiòpan: Sjen diònè to, Sjen kioor bruswa to, isènendik Sjen niè sandò.

3. Melaikat sendur ja maso Sjen, ma sjètan diòsa ja tuter siat. Ma Sjen diutan sjètan: Job, sujoor i je so? na dunja esi tindia tapè i ba, bietindia rami tapè na papon. Bape sjètan tiòpan so Sjen: pi wura witoi esi niè, diònè i abo tienam! mun Job niè tèrai wénasja, ma nani sujoor kièmberei au. Inèni Sjen tiòpan so sjètan: jònè i na waramu, bape biòru pènai! Sjètan ria ma miun Job tuter kaporsi kariria na niè ru to niè aiwaan. Inèni Job misoi na wabu, ma riut paarwasi sabaru ditaraar mitauni tuter i. Inèni Job bwiniempi tiòpan so i: sanètiaar Sjen rami te? bubuk Alla, so tòkato buòru! Bape Job riar so i: tansanèwèsjeen wénasja pi diteen na Alla, bape pi kariria tankembèrei i te? Tapèna Job kibio sasara ba pana.

4. Job niè manèta tòru Elifas, Bildad ma Sofar sendama, sensajoor i. Bape sensajoor i, senririn i ba, senmasoi to djo ma senseis raria ma diru 7, esi na siat kibio ba, so sensajoor Job niè kariria beja; sensanèpaja: Alla kisjo Job so niè tatar. Inèni Job mitauni kibio, tiòpan: raria awini diawin jau anina raria kariria, tansanèpaja i pènai! Kariari! awini diawin jau ba rèto! Inèni Elifas tiòpan so Job: slamat maso i, Sjen Alla diniau i, ma sisèrei niè tatar. Alla riora i, bape abo nani diteen ja. Kusjo Sjen Alla so nini pènai! Bape Job tiòpan: Wàtan! Alla diana jau! biari jau! bape ipa ba pana! Jò Alla! bumaaf inè tatar ba so? kui inè kariria ba so? Inèni Bildad tiòpan: Alla nianari tindia ba te? I, tei pia pi wura nianari kariria te? Bape Job riar so i: Wàtan! irin Alla nianari tindia. Tei na kawasa tindia tapè Alla? Sjen sanèwèsjeen te birirui tuter sinjontu esi, nani Sjen diutan i besjaran, bape pia ba riar so Sjen kabio siri wénasja. Inèni Sofar tiòpan so Job: nuè tatar te, kuai i! tapèna nani mumaja ba, ma nani muteit ba to, bape nani buòsa tindia. Bape Job tiòpan so siat: Nani menménau ba te membemarioor inè rwanunum, ma menmun jau tuter mennè kabiosi? Mensajoor! Alla niè seran ria wariri jau; bape irin inè Djuru Slamat tienam, ma kangunasi nani siaan inè tèrai to, ma ibabur inè tèrai pana, nani isajoor Alla! Irin inanari tatar maso Alla ba! jau tindia maso Alla. Ma sinjoontu esi, sano Elihu dinòta to babasiat senkabio to: inèni kibio, tiòpan so Job: idjawa to, tuòpan tapèna: jau sreen! inè tatar ba! jau tindia! inanari kariria ba

to. Sujoor! tapèna kubio kariria; Alla biba raiwain sinjontu: nianari tapè miajar, ma tiòpan ba nianari tapèna so.

5. Inèni Sjen riar so Job na kruja, tiòpan: tei i, kibio sarèdjeu na witoi rin ba pana? Puau sanèmu tapè sinjontu, ma buòsa! nani jutan au, ma ruaar so jau! Nua na nò, na raria Inanari dunja, ma sibèrèresi siroi, ma aantumsiat Alla sentuaar? au pande te, tuòpan i maso Jau! Inèni Job riar so Sjen: irin Au Sjen! pua wura, ma nunari witoi muajar. Ikabio to na witoi irin ba, na witoi biba beja maso jau; irin pi siri ba! So nini ikasjo mantaunjau, imamaja pena! Ma Sjen tiòpan so Elifas: Ikasjo au, ma mèmè manètasiat, so menkabio ba tapè Inè hamba Job; menkabio tindia na Jau ba. Inèni Sjen biberkat Job baba raiwain bepapon, sièmuai domba 14000; ma onta 6000; ma sapi 1000, ma kalide 1000. Ma sièmuai ja aantum sura, muan 7 bwawin 3. Ma Job tienam rami taun 140, ma sijoer tapunisiat rami. Ma Job biòru bemansaar wàtan.

---

## § 25. Moses na Mitsir, to dipaira beruswa Mitsir.

1. Israel bepuipaisiat senpau pana na utan Mitsir. Ma Farao biprenta Mitsir rin Josef ba pana, tiòpan so niè kawàsa: Israelsiat senpau beja, tòkato senpau raiwain amat! So nini tanbedjoor siat, abo nani sentuter bewèsjeba sentò senbemaroba tatat. Ma Farao dimis mananirsiat so siat, senbeprenta Israelsiat karakwai sennanaripi pau beja maso Farao, so Farao tiòpan: tapèna sensèmuai aantumsiat pau ba. Bape Sjen biberkat Israelsiat, diònè sensèmuai aantumsiat pau raiwain. Inèni Farao biprenta: bwawinsiat sentawin aantummuuan menkoor aantummuansiat beruswa sinjanisiat, ma menkai siat na kambodira Neil, abo senbòru, bape aantumbwawinsiat babòru sentenam sarèdjeu.

2. Jokebed, Amram bwinieempi, na usapui Lefi, diawin aantummuuan, ma diniwar i maso Mitsirsiat sembiai tòru. Bape sijoer pia ba diniwar i rami, titiai mek siri na rarò ma wòrira tuter kèsi to riawa ba, pir kukui na mek rarò, ma kioor i na diru, diònè diboï na kambo Neil, rabwan tòtòbui, napa Farao aantumbwawin kubira kausapa wura; ma diònè niè aantumbwawin Mirjam diniwar mitauni ma sijoriaat kukui, sijoer i nani tanè; ma Jokebed mitauni bibur. Ma Farao aantumbwawin ria kubira na kausapa, ma sijoer mek diboï,

tiòpan so niè womenbwawin esi: rua ma kuor mek nini. Ma kioor i so i, piasai mek, ma sijoer kukui sieis pena, biata rarò. Ma sijoer i, sanèpai i, tiòpan: nini Ibrani esi niè aantum! Mirjam sijoer sanèpai i, riana so Farao aantumbwawin, tiòpan so i: muajar te, ira, isasèrei bwawin Ibrani esi siusu kukui nini? Ma Farao aantumbwawin tiòpan so i: wèsjeen! rua, susèrei esi. Mirjam dipaira, siaaw sinjani. Ma Farao aantumbwawin tiòpan so Jokebed: kuor kukui nini, susu i, nani ibait au. Ma Jokebed kioor kukui, siusu i to biba masis. Ma biba masis, Jokebed kioor niè aantum so Farao aantumbwawin, niè i be aantum, ma diap i: Moses, tiòpan: ikoor i na kambo.



3. Moses diniau pi pande wura na Mitsir, to i pande watan, bape piro niè kawasa ba, bape sanèwèsjeen sentap i: siri na Ibraniat. Mozes biba to, ria sijoer niè kawasa, ma sijoer senmarioor beja. Ma raria esi sijoer sinjontu Mitsir miun sinjontu Ibrani. Moses sijoer nini,

kisjo, miun sinjontu Mitsir to biòru, ma sièra i na rubuan. Ma saar ria, sijoor ja niè kawàsa, ma sijoor sinjontu Ibrani siri miun esi. Moses tiòpan so i: tanè mun nuè manèta? Bape nini tiòpan so Moses: tei riut au be mananir abo buprenta amat? mun jau kòta te, tapè rawini mun sinjontu Mitsir? Inèni Moses miteit, tiòpan: wàtan! sentòpan jau to! Ma Farao didjawa pi nini kòta, tiòpan senmun Moses. Bape Moses dipaira so utan Midian.

4. Ma rawiniena esi Moses misoi deriasi kambosèrai na Midian. Inèni sendama so kambosèrai bwawinpai 7, aantumbwawinsiat wura na imam esi na Midian, sentò sentutup kambo, sensjara i so winjoisi, abo sentamami niè dombasi siunum i. Bape gombala muansiat sendama, sendatar bwawinsiat, sentò sennè dombasi siunum bepapon. Kabò Moses diòsa, dieuso gombalasiat, ma tiuter bwawinsiat to sennè dombasi siunum to. Inèni sensòbera so sentamami Rehuel. Rehuel diutan siat: tanè mendama seira raria nini? Sendaar so i: sinjontu Mitsir esi bi-djoor gombalasiat, ma tiuter amat, diònè tannè dombasi siunum papon. Rehuel, diutan niè aantumbwawinsiat: sinjontu arapai nanè? so ria ja? menda! mensaaw i, diaanpi tuter tatat. Senda sensaaw Moses, ma Moses sanèwèsjeen misoi tuter Rehuel. Ma Moses riaut Rehuel aantumbwawin Sippora; ma Sippora diawin bemònu aantum muan; babai sanò Gerson, bemadjawi sanò Elieser. Moses nia na utan Midian taun 40.

---

## § 26. Sjen siaaw Moses.

1. Moses sijoriaat niòni niè dombasi, ria tuter si so wis Horeb. Ma Sjen riama so Moses na bibiaar àdia na mumi rarò. Moses sijoor mumi niunum, bape àdia diaan i ba, ria abo sijoor nini tanè. Ma Alla nia na bibiaar rarò, siaaw, tiòpan: Moses! Moses! Moses riar I, tiòpan: janina! Ma Sjen tiòpan so i: ruama nanina pènai, bape ruera soraiwaan, so buòsa na utan sreen. Jau Alla na tamamisiat! Jau Alla na Abraham, Isaäk ma Jakob! Moses miteit sijoor Alla, diniwar rèni. Ma Sjen tiòpan so Moses: Isajoor to tanè senwaratawan Inè kawàsa; so nini Ibaar abo Ikoor siat beruswa utan Mitsir. Nani Jamis au so Farao, abo kuoor Inè kawàsa beruswa utan Mitsir. Bape Moses tiòpan so Sjen: tei jau? so bumis jau maso Farao? Ma Sjen tiòpan so i:

nani Imasoi tuter au bewàtan, ma nani kubio maso Israelsiat, tuòpan: Jawè dimis jau maso miat. Ma tapèna nani sujoor Jamis au: nani kuoor Israelsiat beruswa utan Mitsir to, nani sujoor Jau na wis nini.

2. Bape Moses tiòpan so Sjen: nani sensanëtiaar jau ba pana! Bape Sjen tiòpan so Moses: waramu riut witoi? Moses riar so Sjen: irut inè aitato. Sjen tiòpan: kuai i so djo! Moses kiai i so djo, ma aitato riwàni be tawai; ma Moses miteit i, bibur beruswa i. Bape Sjen tiòpan so i: sui waramu, rut niè samakai! Moses riut tawai niè samakai, ma tawai riwàni be aitato ja. Inèni Sjen tiòpan ja so Moses: suòsar waramu na sansun rarò na aròmu! Moses nianari tapè Sjen tiòpan, ma sirapi i ja, niè wara bepòta pado, rawa bemamara to keis. Sjen tiòpan so Moses: suòsar waramu na sansun rarò na aròmu ja! Inèni warapai diteen ja, tapè wara esi. Sjen tiòpan so Moses: buerwana pi mònu nini maso Israelsiat, bape sensanëtiaar au ba rami te, kuoor kambo na kambo dira, bubu i so djo, ma nani kambo riwàni be riat.

3. Bape Moses tiòpan so Sjen: Sjen! bape ruin ipaba ikabio wèsjeen; inè sòrè ma inè sòrètaparè si mabat beja. Bape Sjen tiòpan so Moses: tei nianari sinjoontu niè sòrèpai? tei diònè esiat senkabio mojaba, ma esiat sentarapojè, esiat sensajoor, ma esiat sendèkaber? Jau ba te? Jau, Sjen? Rua, ma nani Imasoi tuter sorèmu, ma nani Jiniau au tuòpan witoi. Bape Moses tiòpan esia so Sjen: Sjen! bape bumis sinjontu esi, bape bumis jau pènai! Inèni Sjen kisjo Mozes, ma tiòpan so i: Aäron, sinjontu Lefi, mèmèu babai ba te? Irin kibio wèsjeen, nani riabedjoor au.

4. Moses siobera so niòni Jetro, sentap i kòta Rehuel, kioor niè bwiniempi ma aantum sanu tuter i, ria so Mitsir, mitauni riut aitatoni Alla. Ma Sjen tiòpan so Aäron: rua, sujoor Moses na utan biro. Ma Aäron ria, sièmua Moses, deriasi wis Alla, ma sium i. Ma Moses tiòpan so i pi wura witoi Alla tiòpan to so i. Ma sunda so Israelsiat sunsaaw babapaisiat, sendur so sanu. Ma Aäron tiòpan so siat pi wura witoi Alla tiòpan so Moses to. Ma Moses bierwana so siat pi wura witoi Alla diniau i to. Inèni sensanëtiaar pena; ma sentadjawa Sjen sijoor kòta tanè Mitsirsiat senwaratawan siat, sentatuan sendumi, sennadi pena.



## § 27. Moses ma Aäron maso Farao.

1. Inèni Moses ma Aäron sunda so Farao, ma suntòpan so i: Sjen Alla na kawàsa Israel tiòpan tapèna so au: buònè inè kawàsa senda! Bape Farao tiòpan so sanu: teĭ Alla, nani idjawa i te? Menda so mennè nanaripi! Ma radja biprenta tiòpan: mentònè sinjontusiat nini sennanari to senpòta, abo sensaserei kabiosi sarèdjeu pènai! Inèni mananirsiat sentòpan so Israelsiat: mensèmuai to faas rëbosi maso mennè nanaripi, bape nini mènau to! mantaunmiat menda, mensaserei si! bape mennanaripi mindo pènai! Inèni senda so utan Mitsir betutira, abo sensaserei faas rëbosi. Bape sennanari masis tapè bepapon ba, mananirsiat Mitsir senkasjo siat, ma senrora mananirsiat Israel, senteuso siat, sentòpan: so mennanari rëwukisi tapè amanbeprenta so miat to masis ba?

2. Moses niadi so Sjen, ma Sjen tiòpan so i: tuòpan so Israel niè aantumsiat: Jau, Sjen, nani Ituter miat, to mensajoor: Jau anina Sjen mennè Alla! Ma Moses tiòpan tapèna so Israelsiat bape sentadjawa i ba, so senbesusa beja ma sennanaripi beja. Ma Moses ma Aäron sunda so Farao. Ma Aäron kiai niè aitato so djo maso Farao ma niè hambasiat, ma aitatoni riwàni be tawai. Bape Farao siaaw niè indèrisiat, ma sennanari tapè Aäron, senkai sennè aitatosi so djo, ma siriwani wura be tawaisi. Bape Aäron niè tawai tioon tawai esi wura to sikeis. Bape Farao niè rupai kirakwai, ma didjawa ba.

3. Inèni Sjen tiòpan so Moses ma Aäron: kausapa Farao ria so kambodira, munda so i! Ma kausapa sunda so i. Ma Aäron riora kambodira tuter niè aitato, ma kambo riwàni be riaat; ma diaan na kambo sibòru wura, so kambo sieir, ma kawàsa senpa ba sentunum i. Bape indèrisiat sennanari tapèna kòta; so nini Farao niè rupai kirakwai, didjawa ba ja. Ma Sjen tiòpan so Moses ma Aäron: munda so Farao, ma muntòpan so i: muajar ba inè kawàsa senda, nani jònè bekabiopojasi, ma ròswaisi, ma kwèkwèsi pau mò sirama to anioraròsi wura to utan diònu tuter si. Ma Aäron sii aitatoni so kambo ma seira utan ma aniosi wura siònu tuter bekabiopojasi ma ròswaisi ma kwèkwèsi. Inèni Farao siaaw Moses ma Aäron, tiòpan so sanu: Munnadi so Sjen: diònè pi kariria nini mènau ma nani jònè menda. Ma Moses tiòpan so Farao: mantaunau tuòpan raria witoi muajar pi nini minau. Ma Farao tiòpan so sanu: saar minau. Moses riar so i: tapèna! abo ruin,

anina siri esi ba tapè tannè Sjen Alla. Ma Moses niadi maso Sjen, ma Sjen diònè bekabiopojasi ma ròswaisi, ma kwèkwèsi sibòru wura to sikeis. Bape Farao sijoer kariria minau pana, niè rupai kirakwai ja, didjawa ba. Inèni Sjen tiòpan: Aäron riora kakòpa bewabu tuter niè aitato. Ma Aäron nianari tapèna; ma kakòpa bewabu riwàni be kamumisi, sikarip kawàsa ma pimuna wura. Kabò indèrisiat sentòpan: pi nini Alla nianari i! Bape Farao didjawa ba pana. Inèni Sjen diònè kamumisi, àpurassi, ma maniaisi si pau mò sikarip Farao ma niè hambasiat ma kawàsa; aniosi wura siònu tuter pi kariria nini, bape na utan Gosen sianina ba.

4. Inèni Farao tiòpan so Moses ma Aäron: nani jònè menda, bape mennadi bewàtan so Sjen maso jau. Ma Moses niadi so Sjen, ma kariria minau pana. Bape minau to, radja niè rupai kirakwai ja, miajar ba Israelsiat senda. Inèni Sjen diònè pòta kariria miun kawàsa Mitsir sennè pimunasi; bape Israelsiat sennè pimuna siri biòru ba. Bape Farao niè rupai kirakwai wora. Inèni Sjen tiòpan maso Moses ma Aäron: munkamu wabu na àdia, ma munkai i so babo, Farao sijoer i. Sunnanari tapèna, ma wabu riwàni be manusi maso Mitsirsiat ma sennè pimunasi, to indèrisiat senpa ba sentòsa maso Farao, so sennè manusi, siswaat beja. Bape kabo Sjen diònè Farao niè rupai kirakwai. Inèni Moses ma Aäron sunda ja so Farao, suntòpan so i: Israel niè Alla tiòpan so au tapèna: muajar barami inè kawàsa senda, nani saar na mèmèmu utan djòbera rewukikambo miun tapè sensajoor barami na utan nini. Ma kausapa Moses sii warapai so rora, ma djòbera rëwukikambo, ma kabjebar ma kruja miun to baba besiri, miun kawàsa senna na wòrira, ma pimunasi, ma airabosi, sitaberio; bape na utan Gosen mirin. Inèni Farao siaaw Moses ma Aäron, tiòpan so sanu: ibetatar beja! munnadi so Sjen, abo djòbera rëwukikambo minau, ma nani jònè menda. Bape mirin to, Farao miajar ja ba Israelsiat senda.

5. Inèni Sjen tiòpan so Moses ma Aäron: munda so Farao, muntòpan so i: muajar ba Inè kawàsa senda, saar nani Jinato so mèmèmu utan sapaansi pau mò tapè mensajoor barami, nani siaan witoi djòbera rëwukikambo miun barami. Ma Mozes ma Aäron sentòpan tapèna to so Farao, senbabur i ja, kabò Farao niè kawàsa sentòpan so i: so Farao miajar ba Israelsiat senda? Sujoor! nani amat kariria! Ma Farao siaaw Moses ma Aäron ja, diutan sanu: tei na miat senda? Moses riaar so Farao: amat wura tuter pi wura amannèsi. Farao tiòpan so i: mensasèrei kariria wénasja! Muansiat eenmèser senda, bape bwawinsiat tuter mara-

riasiat senmasoi tuter pimunasi. Ma sentatar Moses ma Aäron. Inèni Sjen tiòpan so Moses: sui aitatoni so rora! Ma Sjen diònè wana muran kioor sapaansi pau mò, sitabun kakòpa ma siaan to keis witoi misoi na romsi rami, ma airabosi kòta. Kabò Farao dimis seira sensaaw Moses ma Aäron. Ma sundama so i, tiòpan so sanu: ibetatar beja! munnadi so munnè Sjen Alla, abo kariria nini beruswa jau. Ma Moses niadi so Sjen, ma Sjen diònè wana ba biba kioor sapaansi, ma kiai si na rawanam rarò. Bape Sjen diònè Farao niè rupai kirakwai. Inèni Sjen diònè raria tòru mimaan wàtan na Mitsir, siri sijoor esi ba pana, ma siri diòsa ba, so mimaan beja; bape Israelsiat sennè sasaar. Inèni Farao siaaw Moses ma Aäron tiòpan so sanu: menda sarèdjeu, miat tuter bwawinsiat ma aantumsiat, bape mennè pimunasi simasoi. Bape Moses riar so Farao: mojar! amanda, amankoor tuter amat pi wura amanè, abo amanpa amanunum soom maso Sjen Alla. Bape Alla diònè Farao niè rupai kirakwai. Ma Farao tiopan so sanu: munbabur jau: mundama ja pènai! munsajoor jau ja, mumbòru kòta. Ma Mozes riar so i: tapèna to! nani isajoor au esia ba to! Sjen Alla tiòpan tapèna: na dirurabwan nani Jònè mèmum aantum rètenam, ma mèmum kawàsa sennè aantumsiat rètenam wura, senbòru, bape na Israelsiat wona siri nani sieis ba pana, abo menrin: Sjen diaas Israelsiat na Mitsirsiat.

## § 28. Pisjaan Paska, ma Israelsiat senda beruswa Mitsir.

1. Sjen tiòpan to so Moses ma Aäron: na raria besura na paik Abib tamaanpaisiat na Israelsiat sentiria domba aantum muan diteen besiri, niè taun siri wènasja; siri diria esi, esi diria esi; mentònè simasoi tuter dombasi esi ba, bape simasoi simèser to raria 14 na paik Abib; ma na raria jani menmun si, ma nani mendur sinè riat, men-sòkiaar i na riri bena aturè, ma na aitabat aturè bebopai na aniosi napa mentaan si Ma diru jani mensòbin si, ma mentaan si tuter mamami sia ba, mentaan i, mentaran sina siri diòtu ba; ma benaipai mennunum i na àdia to keis, esi biata ba to kausapa. Mentaan i, mentòsa, menpau mensanèmi, ma soraiwaan na mendaimi, ma menrut aitatoni, so anina Sjen niè Paska (riasiwar). So diru jani nani ira tu utan Mitsir, ma nani imun aantum rètenam wura na kawàsa ma na pimuna nani senbòru wura. Bape riat na mennè aturèsi nani bierwana maso

Jau mennè aniosi: napa isajoor riat irasiwar anio jani, abo imun miat ba tapè imun Mitsirsiat. Ma nani raria nini raria festa maso miat ma maso mennè bepuipaisiat to wèroi wèroi. Ma nani menmasoi to na utan witoi nani Jònè so miat, ma nani mentaan pisjaan Paska, ma mennè aantumsiat sentutan so miat: so tannanari tapèna? nani mentòpan so siat: anina Sjen niè Paska! Sjen riasiwat Israelsiat sennè aniosi,



na diru Sjen miun Mitsirsiat sennè aantum retènam, ma kioor tatat beruswa siat.

2. Na diru rabwan Sjen Alla diònè aantum rètenam wura na utan Mitsir senbòru, na radja niè aantum rètenam, to kawàsa sarèdjeu sennè aantum rètenam, ma pimuna sinè aantum rètenam kòta. Ma Mitsirsiat senseis to baba, so na anio wura sennè bebòrupai. Kabò Faraò biprenta Israelsiat tiòpan: menda beruswa inè kawàsa! menda mensòom mennè Sjen, menkooor mennè pimunasi kòta; menda seira

wénasia, ma menbeberkat jau. Ma Mitsirsiat sentónusaar Israelsiat sentarien seira, sentòpan so siat: menmasoi rami nani amanbòru wura! Bape Israelsiat sentòpan tapè Moses diniau siat, sensaaw so Mitsirsiat pigangèna, ma Sjen diònè Mitsirsiat sentònè pi wura witoi Israelsiat sensaaw na siat. Inèni Israelsiat senda, senkooor sennè mamami bepiati kòta, sentabaan i na sansunsi sensario i.

3. Tapèna Israelsiat senda, sentarien, siat pau, muansiat wénasja 600,000, ma mariasiat sentatoor siat ba; ma senkooor tuter siat domba ma sàpi pau mò. Ma senkooor Josef niè tèrai kòta. Ma Mozes tiòpan so siat: mensanèpaitawan raria nini! so Sjen mitauni kioor miat beruswa utan Mitsir. Ma Sjen ria papon siat, na raria tuter riripai arepa, abo bierwana raanpai senda na i, ma diru riwani riripai arepa be àdia, abo siasaar siat, abo senpa senda na raria ma na diru.

4. Ma Farao didjawa Israelsiat senbatur, bape senda tindia ba, tiòpan: so tantònè senbatur ma sennanaripiba pana maso tatat?! Inèni radja tuter karèta maroba 600 riauxaar Israelsiat, ma sièmuaì siat senmasoi na Rawanambeurar sasi dirèpai. Ma Israelsiat sensajoor Mitsirsiat sendama abo senmun siat, senmateit to baba besiri. Bape Mozes tiòpan so siat: menmateit pènai! mentòsa karakwai! nani mensajoor witoi Alla nianari maso miat. Nani Sjen miun riwani miat, mantanmiat ma mensisi! Ma Sjen tiòpan maso Mozes: tuòpan so Israelsiat senda wénasja! ma au rut mèmèmu aitato, ma sui waramu na rawanam babo, nani kambo sasi misewar abo kawàsa senda na besanaja; ma nani Mitsirsiat senrin Jau! Inèni riripai arepa bibur so diupui Israel senkarumi ma misoi rabwan siat ma Mitsirsiat, tapèna diru betutira Mitsirsiat senpa ba senderiasi Israelsiat. Ma Mozes sii niè wara so rawanam babo ma Sjen diònè wana muran baba sio diru betutira, ma kambo sasi misèwar, ma Israelsiat senda na besanaja rabwan kambo; kambo sasi diòsá tapè pendèwai na sennè wara wàtan ma wara saar. Ma Mitsirsiat sendausaar siat na rawanam kòta.

5. Ma porera pena, Sjen diònè Mitsirsiat sentandoor, senmateit, ma sennè karètakananursi sisjawa, tapèna sensadadjara. Inèni Mitsirsiat sentòpan: tansòbera wénasja! Sjen miun riwani Israelsiat. Ma Israelsiat senkaira re to utan na dirè rawa wana, Sjen tiòpan so Mozes: sui waramu na rawanam babo! ma inèni besiri kambo sasi riur ja na masepar; ma Sjen diònè kambo sisa siubur Mitsirsiat tuter sennè kudasi, senmarutu na sasi rarò; Farao tuter niè kawàsa senbòru wura besiri. Ma kausapa Israelsiat sensajoor bebòrupaisiat sentupar sentaboi na

sasipai. Ma sentandoor, ma sensanëtiar Sjen ma niè hamba Moses.  
Ma Moses tuter Israelsiat sendoi ranu nini:

Iroi so Sjen, so Sjen biba wàtan.

Kiai kudasi ma siat sensa na si na rawanam!

So Sjen tanpa ma tandoi! Sjen diònë tantateen!



### § 29. Israelsiat na utan biro.

1. Inèni Moses diònë Israelsiat senbabur sasi dirè senda na utan biro Sur. Senda raria tòru to, bape sensèmua kambo ba. Inèni sensèmua kambo siri, bape kambo titieit, senpa sentunum i ba, sentap i: kambo Mara. Israelsiat senkasjo Moses, sentòpan so i: nani amantunum

witoi? Moses siaaw so Sjen, ma Sjen bierwana ai siri so i; ma Moses kiai ai nini na kambo rarò, ma kambo riesa, diteen, sentunum i. Ma senda to Elim, ma wana kambo biubira 12 ma airabo korma 70. Ma senbabur Elim senda so utan biro Sin. Inèni Israelsiat senkasjo, sentòpan: kariari! tanmasoi wènasja na utan Mitsir rami tuter mararusi siònu tuter sàpitèrai! So kuoor amat so utan biro napa tanbòru wura na babisi! Inèni Sjen tiòpan so Moses: Idjawa to Israelsiat senkasjo so. Tuòpan so siat: rawiniena nani mentaan tèrai, ma kausapa mentaan mamami to menmòsi; ma nani menrin Jau, Sjen mennè Alla.

2. Ma rawiniena pana, ajasi sitawa pau mò to sitabun kakòpa, Ma kausapa sarepa ria wariri jabasi, ma sarepa minau to, kawàsa sensajoor pi katu, biata na djo, tapè ramoorpaisi bebusa, ma sentaan i, diaan tapè mamami unum. Israelsiat sensajoor i sentòpan: Man hu? anina tapè na kabio Windèsi: witoi nini? So nini sentap i: manna. Inèni Moses tiòpan so siat: nini mamami Sjen diònè i so miat na rora abo mentaan i tawana. Menkoor masis maso raria siri wènasja maso miat mentaan i, bape esasi sibata ba to saar. Bape esiat sentadjava Moses ba, senpir esasi to saar; bape kausapa sieir, kangunasi si na na rarò. Ma na raria rimsiri Moses tiòpan so kawàsa: kabò menkoor maso saar kòta, so saar Sjen niè raria mènau (Sabbat) nani saar mensèmuai esasi ba. Ma siat senkòrusaar sensajoor: saar manna sieir ba, bekan-guna ba; bape esiat senkòrusaar ba, kausapa senda sensasèrei manna; bape sensèmuai ba, tapè Moses tiòpan to so siat. Ma Moses tiòpan so Aàron: kuoor mamora siri, ma susa i diònu tuter manna; tanpir i maso bepuipaisiat.

3. Inèni Israelsiat senbabur utan biro Sin, sentisan jabasi na Rafidim. Bape wana maria ba, senbarirui so Moses, sentòpan so i: buònè maria abo amantunum! Moses tiòpan so siat: menkasjo jau so? So mensanètiaar Alla ba, so mensasjajar Alla? Bape kawàsa senbarirui wènasja. Ma Moses siaaw so Alla, tiòpan: jau nani tanè tuter kawàsa nini? Tòkato senmun jau tuter rëwukisi! Inèni Sjen tiòpan so Moses: rut mèmèmu aitato ruora to sasipai tuter i, ma nani mantaunja jòsa so au na kambaba babo na Horeb; wana nani ruora kambaba, ma nani maria siubi na i. Moses nianari tapèna, ma maria siubi. Ma sentap utan jani: Màsa (ònusaar) ma Meriba (barirui) so Israelsiat sentònusaar tatoa Sjen, sentòpan to: Sjen misoi tuter amat te, pibai te?

4. Amaleksiat sentò senmun Israelsiat. Inèni Moses tiòpan so Josua: buiria sinjontusiat bepa, sentuter au; menda, ma menbemaroba

Amaleksiat; kausapa nani jòsa na wis katu rukami. Josua nianari tapèna, ma kausapa Moses tuter Aäron ma Hur sentòsa na wis katu rukami; ma Moses sii warapai riut sasaan aitatoni, Israelsiat sentapapisan, bape Moses riutsasaan aitatoni ba, Amaleksiat sentapapisan. So nini Moses niè warapai mirioor, Aäron ma Hur sundurètu Moses niè warapai to diru. Ma Josua miun Amaleksiat.



### § 30. Sjen Alla diòně prentasi maso Israelsiat.

1. Israelsiat senbabur utan Mitsir sembiai tòru to, senda so utan biro Sinai, ma sentisan jabasi deriasi wis Sinai. Inèni Moses kieira wis so Alla. Ma Sjen tiòpan so i: nani tuòpan tapèna so Jakob niè



bepuipaisiat: mensajoor to witoi Inanari maso Mitsirsiat to, ma tanè Ibai miat tapè na gangani niè wararau, ma Ikoor miat so Jau. Inèni nani mentadjawa bewàtan so inè kabiosi, ma nani menkòrusaar Jau, nani Inè miat, so Inè dunja betutira. Ma Moses bjaar to so kawàsa, siaaw kawàsa sennè babapaisiat, ma tiòpan so siat pi wura witoi Sjen tiòpan to so i. Ma sendaar so i masisbabera, sentòpan: witoi Sjen tiòpan to nani tannanari i wura. Ma Moses tiòpan so Sjen sendaar witoi so i. Ma Sjen tiòpan so Moses: rua so kawàsa, besreen siat raria nini ma saar; ma senpap sennè sansunsi, abo saria nini wura masis to; ma buprenta siat, tuòpan so siat: senkeira wis nini pènai? tei ria na wis nini, nani biòru bewàtan, pimuna te, sinjontu te. Inèni Moses bjaar awaab maso kawàsa ma besreen siat, ma senpap sennè sansunsi.

2. Na raria betòru na kausapa arepa biba bidjoor wis rukami tuter kabjebar ma kruja baba, ma riòtu tapè gongon baba, so nini kawàsa sentandoor. Inèni Moses kioor kawàsa to sentòsa deriasi wis. Ma wis Sinai betutira tiup tapè àdia, so Sjen bjaar so wis na àdia rarò; ma wis betutira ririorar. Ma pi riòtu tapè gongon baba riòtu to baba besiri. Moses kibio so Sjen, ma Sjen riar so i.

3. Inèni Sjen tiòpan kabiosi nini wura, tiòpan: Jau Sjen, mèmù Alla! Ikoor au beruswa utan Mitsir napa senbewomen au.

I. Suoom Alla esi pènai.

II. Nunari karwaarsi pènai; nunari pènai pi ariri pi bena na rora, pi bena na utan, pi bena na kambo; buisan aibu so si pènai, sanètiaar si pènai. So Jau Imèser Sjen, mèmù Alla! Jau, Alla, Ikasjo bewàtan siat senkembèrei Jau, ma Isasèrei tamaan sennè tatar na sennè aantumsiat ma sennè aantum tapunisiat; bape Isanèpai bewàtan kawàsa toi sensanèpai Jau, ma senkòrusaar Inè prentasi.

III. Buap Sjen mèmù Alla niè sanòpai sarèdjeu penai, so Sjen piro ba tei diap niè sanòpai sarèdjeu.

IV. Sanèpaja raria mènau, ma besreen i. Na raria rimsiri nani nunari mèmù nanaripi wura, bape raria berimmònu anina Sjen mèmù Alla niè raria; nunari pi siri pènai na raria nini; au pènai, mèmù aantummuan pènai, ma mèmù aantumbwawin pènai, ma mèmù hamba pènai, ma ambeer misoi na mèmù aniose pènai. So Sjen nianari to na raria rimsiri: rora ma utan, rawanam, ma pi wura na sasi rarò, bape na raria berimmònu Sjen minau pana. So nini Sjen biberkat raria mènau, ma diap i: Raria Sreen.

V. Sanèpai ma kuòrusaar tamamu ma sinjamu, abo musoi wòroi na utan Sjen, mèmù Alla, nani diònè so au.

VI. Mun sinjontu pènai.

VII. Tuòtap ririoot tuter tatar pènai.

VIII. Munana pènai.

IX. Buawia pènai.

X. Sanemkariria bwiniempi esi pènai; sanemkariria pènai witoi esi tianam; pibai esi niè hamba; pibai esi niè raarpai, ma pibai pi esi, esi nièwi.

4. Kawàsa sentandoor to baba, senmateit, senda sentòsa na wiarièu ma sentòpan so Moses: muèser kubio so amat, nani amantadjawa, bape Alla kibio so amat pènai, so amanmateit amanbòru. Bape Moses tiòpan so siat: menmateit mendiriorar pènai! so Alla riama so miat abo sijoortatoa miat, ma abo menkòrusaar I, ma menbetatar pènai. Kawàsa sentòsa na wiarièu, bape Moses riaji wis to arepa mamaan napa Alla misoi. Ma Sjen diniau Moses witoi nani biprenta maso Israelsiat. Ma Moses bbaar ja so kawàsa, ma tiòpan Sjen niè kabiosi wura so siat. Ma kawàsa wura sentòpan tapè tuter sòrè siri: kabiosi nini wura, Sjen tiòpan si to, nani amankòrusaar si.

5. Inèni Sjen siaaw Moses tiòpan: ruamaji so Jau na wis rukami, nani Jònè so au rëwuki sanu, Ibui na si prentasi, abo buniau si maso siat. Inèni Moses siaji Alla niè wis, i tuter niè hamba Josua; ma Moses riapwir arepa mamaan ma misoi so wis rukami raria ma diru 40.

### § 31. Karwaar sàpi aantum na brawen.

1. Inèni Israelsiat sensajoor Moses bbaar ba na wis, senda, sendur maso Aäron, sentòpan so i: nunari maso amat allasi amanpa aman-sajoor si, so na Moses, tei kioor beruswa amat na Mitsir, amanrin ba i tanè. Ma Aäron tiòpan so siat: mendur maso jau pisjaja brawen na bwawinpaisiat ma na mennè aantumsiat, ma mentònè si so jau. Ma kawàsa sendur pisjaja brawen maso Aäron, ma Aäron riaan si, ma nianari karwaar brawen siri tapè sàpi aantum. Inèni kawàsa sentòpan: mensajoor i! alla nini kioor tatat beruswa Mitsir! Ma Aäron nianari wabusoom kòta, ma tiòpan so kawàsa: saar nani tanbefesta maso Sjen! Ma kausapa bèra sentando seira, sennunum soom ma sendur pisjaan;

inèni senmasoi sentaanpi ma sentunum; keis, sentòsa senmaji. Inèni Alla tiòpan so Moses: bubur! buaar so mèmù kawàsa, so sennanari kariria pena. Seira senkòrusaar inè prentasi ba; sendumi sikarakwai; budjoor Jau pènai! Ikasjo siat bewàtan, ma inè kasjo diaan siat tapè àdia to senkeis, nani Inanari au be kawàsa baba. Bape Moses niadi so Sjen Alla, tiòpan so Sjen: kariari Sjen! kusjo siat beja pènai! sanèpaja na Abraham, Isaäk ma Jakob, nuè hambasiat, tuòpan to bewàtan so siat: nani Jònè mennè bepuipaisiat senpau tapè sibèrèresi na rora.

2. Moses bbaar wis, riut rëwuki mònu, Sjen mitauni biui na sanu na rawa mònu, niè prenta sura. Ma Josua didjawa kawàsa senna na mapar sentuaar, ma tiòpan so Moses: sentuaar tapè senbemaroba! Bape Moses tiòpan so i: pibai! sentuaar ba tapè senbemaroba, bape idjawa sendoi senriwan babera siat. Ma sundama deriasi siat, Moses sijoer karwaar sàpi aantum, ma didjawa sendoi ma senmaji, kisjo to baba, kiai rëwuki sanu tuter prentasi so djo, siòsabu sanu, ma kioor karwaar sàpi aantum beruswa siat, ma niunum i to miriaar, ma kiai susa so maria sentunum, diònè Israelsiat sentunum i. Ma Moses tiòpan so Aäron: kawàsa nini sennanari witoi so au, so buònusaar siat senbetatar baba to tapèna? Ma Aäron riar so i: inè sjen! kusjo jau beja pènai! ruin kawàsa nini sendumi sikarakwai! Sentònusaar jau inanari karwaar maso siat, so nini isaaw sennè brawen, ma senkooor sennè brawen so jau, ma inunum i na àdia, ma sàpi aantum nini siubi na àdia.

3. Inèni Moses sijoer kawàsa sentadjawa ba pana, ria ma diòsa na aturè na sennè utan ma siaaw: tei kidrusaar Sjen rami riana so jau! Inèni kawàsa Lefi sendama wura so i. Ma Moses tiòpan so siat: menpautu mensanèmi tuter njoikòroos, ma menda so wana, ma mensòbera ja so napènina, ma menperan siat wura sentadjawa ba; mennè babapai ma mennè madjawipai, ma mennè manètapai, siat sentadjawa ba senmasis babera, mensanèpai esi pènai! Kawàsa Lefi senkòrusaar Moses niè prenta ma raria jani senmun muan 3000 senbòru. Ma raria saar Moses tiòpan so kawàsa; menbetatar beja, bape nani isaji so Sjen ma isajoor tatoa ipa isèmuai maaf maso mennè tatar. Ma Moses siaji so Sjen, ma tiòpan so Sjen: kawàsa nini sennanari tatar baba beja; pua bumaaf siat te! bape pibai te, nani kui inè sanò beruswa nuè surat. Bape Sjen riar so Moses: tei betatar maso Jau nani Iki niè sanò beruswa Inè surat, Nani raria riana Isaserei sennè tatar na siat.

4. Israelsiat senna na utan Sinai to Moses diònè sennanari Jaba Alla to keis, tapè Alla bierwana i to maso Moses. Sennanari i na taun siri, ma keito riri arepa tibabun Jaba Alla. Ma Sjen diria usapui Lefi, abo sensajoriaat Jaba Alla. Inèni Israelsiat sentarien, Lefisiat sentòtap Jaba Alla ma senkoor i; ma Israelsiat senmasoi, sentisan sennè jabasi, Lefisiat sentònè Jaba Alla diòsa rabwan siat. Ma Alla diria Aäron ma niè aantumsiat be imamsiat.



### § 32. Sennanari Jaba Alla, ma senkasjo so pisjaan.

1. Sjen diniau Moses tanè Moses nianari Jaba Alla tuter Aiku bedjandi ma pi esi wura na Jaba Alla rarò. Ma Israelsiat sendur na mantaunsiat pi wura, abo sennanari pi wura to keis. Sennanari tindia tapè Sjen diniau i to maso Moses. Ma Sjen biprenta Israelsiat nani

sennunum soom na Jaba Alla mièser. Ma sennanari pi wura to keis, riripai arepa riama, diòsa babo Jaba Alla.

2. Inèni Israelsiat senbabur utan Sinai, ma sentarien so utan Paran. Sentò senda Moses niadi, tiòpan tapèna: Buòsa Sjen! buònè siat senkemberei Au senmasasepar, ma siat senkapiap Au senmateit, sentapai babur. Ma Israelsiat sentisan jabasi senmasoi, Moses niadi tiòpan so Sjen: Sjen! musoi tuter mèmù kawàsa Israel!

3. Israelsiat senkasjo so senkembèrei utan biro. Inèni Sjen Alla niè àdia niunum siat ma miun na sendurpai dirèpaisi. Bape Moses niadi so Sjen, ma àdia mioi pana. Inèni Israelsiat senseis, sentòpan: kariari! nani tei diònè pitaantitaanpi so amat? amansanèpaja na utan Mitsir amantaan diaansi sarèdjeu ma samalakasi ma kasinamsi, bape napènina amantaan pi esi ba, manna wènasja! Kabo Sjen kisjo siat to baba, ma Moses kòta kisjo siat, ma tiòpan so Sjen: kawàsa nini ipa siat ba! Sjen! so buònè jau mèser ikoor kawàsa nini? inè siat te? sensaaw so jau pi sentitaanpi, senseis senmasasoba. Nani ikoor pi sentitaanpi na toi? Ma Sjen tiòpan so Moses: buiria sinjontusiat 70. nani Irut siat bemananirsiat so muèser wènasja buprenta kawàsa ba. Ma tiòpan so kawàsa: saar nani mensèmuai pi mentitaanpi. Bape Moses tuòpan so Sjen: kawàsa nini senpau mò, amansèmuua na toi sàpisi ma dombasi masis maso siat wura? Nani senmun diaansi wura na rawanam maso siat te, abo sentaan to senmòsi? Bape Sjen tiòpan so Moses: Sjen niè warapai pia nini ba te? Sujoor tatoa wènasja, nani mensèmuai tapè Itòpan te, pibai te. Inèni wanapai kioor ajasi (kwàkelsi) pau mò, Israelsiat senmun si, sendur si raria ma diru betutira. Ma kawàsa sentaan titiaat si beja sipiaan sendaumi, ma kawàsa pau senbòru. So nini sentap utan jani: Kibroot Taäfa, anina: kubirsi na siat sentaan titiaat, so sensèra jani siat senbòru so sentaan titiaat.

### § 33. Israelsiat senkai utan Kanaän.

1. Na utan Paran Sjen tiòpan so Moses: bumis sinjontusiat, abo senkai utan Kanaän. Inèni Moses diria na usapui esi sinjontu siri, tapèna senbesura mònu, ma Moses dimis siat senkai utan Kanaän. Ma senda sendama so Eskol, napa senkutu aibo angor samu siri sinjontu mònu sunsario i na ai siri, so biba besiri, Ma bepui diru 40

sensòbera ma sentòpan: amankai utan jani to, amansajoor utan diteen besiri; amankoor aibo nini abo mensajoor i; bape kawàsa senpa wàtan, ma aniosesi sikarakwai ma si baba besiri. Amansajoor kòta sinjontusiat sentaririasi beja, maso siat amat tapè sapaansi wènasja.

2. Israelsiat sentadjawa nini, sensawaüri wura, ma diru senseis, senkasjo Moses ma Aäron, sentòpan: kariari! so amanbòru sarèdjeu na utan Mitsir ba? pibai amanbòru sarèdjeu na utan biro! Ma senkabio



babera sentòpan: tantiria mananir esi tei kioor tatat tansòberei ja so Mitsir. Inèni Moses ma Aäron sentatuan sendumi to djo; ma Josua ma Kaleb, mònu na siat senkai Kanaän to, sunsabu sunnè sansun, suntòpan so kawàsa: Utan jani diteen besiri! Sjen sanèpai tatat, nani diònè i maso tatat, bape miat menbedjoor Sjen pènai! Bape kawàsa sentò senmun Josua ma Kaleb, sensotatir sanu tuter rëwukisi.

3. Bape Sjen tiòpan so Moses; wòroi toi rami kawàsa nini sensa

sjajar Jau? wòroi toi rami nani sensanëtiaar Jau ba? Jònè sennei wura! ma Inanari au be kawàsa pau riwàni siat. Bape Moses tiòpan so Sjen: Sjen! nunari tapèna, nani Mitsirsiat ma esiat wura sentadjawa pi nini, nani sentòpan: Mensajoor! Alla na Israel kioor niè kawàsa beruswa utan Mitsir, bape pia ba kioor siat so utan witoi tiòpan to nani diònè so siat, so nini miun siat na utan biro! Mojar Sjen! bape sanèpai mèmu kawàsa! buònè maaf siat, tapè Au sanèpai siat na utan Mitsir to raria nini! Sjen riar so Moses: nani isanèpai siat ja, tapè butan Jau; bape wàtan tapè Itenam, nani dunja betutira sijoor witoi Jau nani Inanari. Nani siat wura sensajoor to witoi Inanari to na utan Mitsir ma na utan nini, bape senkòrusaar Jau ba, ma sensa-sjajar Jau be sura to, siat wura sennè to taun 20 senbabur utan Mitsir, siat wura nani sensajoor utan Kanaän ba, bape nani senbòru wura na utan biro; bape Josua ma Kaleb sunmèser sunbòru ba na utan biro. Nani Ikoor Israelsiat sennè aantumsiat so utan jani, witoi babapaisiat senkembèrei i. Bape mennè aantumsiat, nani senna na utan biro taun 40 rami, tapè senkai utan Kanaän na diru 40. Diru siri riwàni taun siri.

### § 34. Israelsiat sentadjawa ba. Korak birarui tuter Moses.

1. Kausapa Israelsiat sendama so Moses, sentòpan so i: Sujoor amat, amanda pena so utan na witoi Alla kibio to; amanbetatar to, bape amanbetobat pana. Bape Moses tiòpan so siat: so menkòrusaar Alla ba? menda pènai! nani Alla tiuter miat ba; nani Amaleksiat ma Kanaänsiat senmun miat. Mentadjawa mennè Sjen ba to, so nini Sjen nani tiuter miat ba! Bape Israelsiat sentadjawa ja ba so Moses bape senda. Inèni Amaleksiat ma Kanaänsiat sendabur siat, senmun Israelsiat, sentusar siat to Horma.

2. Korak, sinjontu Lefi siri, tuter Datan ma Abiram sinjontu Ruben sanu, sendur tuter babapaisiat 250, sentòsa so Moses, sentòpan so i: sinsjoom beja so au, buprenta amat! So nunari au baba raiwain Sjen niè sendurpai? Inèni Moses tiòpan so Korak ma esiat wura: sinsjoom beja so miat, miat Lefisiat, mendur menbedjoor Sjen! Masis barami so miat Sjen diria miat abo mensajoriaat Jaba Alla? menmajar kòta menbeimam te? Ma Moses dimis sensaaw Datan ma Abiram sun-

dama kòta, bape suntòpan: amunkemberei! Masis barami te, mun amat na utan biro nini? nunari mantaunau tapè amannè Sjen kòta te? Kuoor amat ba pana so utan diònu tuter susu ma unum, ma buònè so amat ba pana romsi ma rom anggor. Nani kuber amundèmi kòta te? Amundama so au ba pana!

3. Kabò Alla tiòpan so Moses ma Aäron: munda beruswa kawàsa nini! tòkato jònè senei wura besiri! Bape Moses ma Aäron suntatuan sundèmi to djo maso Sjen ma suntòpan so I: jò, Alla! so sinjontu siri bietatar nani kusjo to baba maso sendurpai nini wura te? Inèni Sjen tiòpan so Moses: buniau kawàsa senda beruswa Korak, Datan ma Abiram sennè jabasi. Ma Moses diniau kawàsa tapèna, ma tiòpan rami so siat: nani mensajoor Sjen dimis jau te, pibai te; siat nani senbòru tapè kawàsa wura senbòru, Sjen dimis jau ba; bape Sjen nianari pi babòru, ma diònè kakòpa bia sòrè ma tioon siat tuter sen-nèpaisiat, tapèna nani menrin sinjontusiat nini sensasjajar Sjen to. Ma Moses kibio mènau pena, kakòpa na sinjontusiat nini wabarsiat misabu tapè bia sòrè, ma tioon siat wura tuter sennè kawàsa ma pimuna ma jabasi, ma kakòpa siuburè ja. Ma kawàsa sensajoor nini, senmateit to baba, sentapai, senbabur, sensaaw: kakòpa tioon amat pènai! Bape sinjontusiat 250, sentuter Korak, Datan ma Abiram, Sjen miun siat wura besiri tuter àdia rora.

4. Bape raria saar kawàsa senbarirui ja tuter Moses ma Aäron sentòpan: manu wénasja mumun Sjen niè kawàsa! Ma sendur wura maso Jaba Alla. Alla tiòpan so Moses ma Aäron: munda beruswa siat, nani Imun siat wura! Bape Moses ma Aäron sunnadi so Alla maso kawàsa, bape kawàsa 14,700 senbòru to. Ma Sjen tiòpan so Moses: rurè aitatonisi 12 na usapui na Israelsiat, usapui siri niè esi, esi niè esi, ma pur aitatonisi na Jaba Alla rarò, ma nani Iberwana usapui witoi Jiria be Imansiat. Ma Moses nianari tapèna, ma biui usapui niè sanò babo niè aitato; ma biui Lefi niè sanò na Aäron niè aitatonisi; keis, pir si wura na Jaba Alla. Ma kausapa Moses riá, sijoor aitatonisi, sijoor Aäron niè aitato besisiwar, siara sumò ma bibo. Ma Moses kioor aitatonisi so wòrira, abo kawàsa sensajoor si, ma sennè si, senkoor si; bape Sjen biprenta Moses pir Aäron niè aitato na aiku bedjandi rarò, abo kawàsa nani senbarirui ja so Aäron pènai. Ma esiat senbarirui ja pènai.

5. Israelsiat senna na utan biro taun 40, tapè Alla tiòpan to. Sanòsi na utansi napa sentisan sennè jabasi Moses biui si na surat. Kawàsa



senkòrusaar Sjen ba, ma Sjen bidjoor siat ba, to babapaisiat wura senbòru to senkeis na utan biro, tapè Sjen tiòpan na bepapon to. Bape Moses tienam tindia, ma niadi so Alla riwani kawàsa, ma besusa beja so siat.

### § 35. Israelsiat senda so utan Kanaän.

1. Israelsiat senna na utan biro taun 40 to, sentarien so utan Kades. Na wana Mirjam, Moses raarwo, biòru ma sensera i. Ma Israelsiat senbarò maria, ma senbarirui ja so Moses, sentòpan so i: Kariari! so amanbòru ba tuter amannè manètasiat na utan biro! So kuoòr amat to nini, abo amanbòru nanina, amat tuter amannè pimunasi? So kuoòr amat beruswa Mitsir so utan kiriria nini? Nanina amanpa ba tanam, amanbarò aibosi, ma amanbarò maria amantunum. Ma Moses ma Aäron sunnadi so Sjen. Ma Sjen tiòpan so Moses: rut nuè aitato, suaaw kawàsa sendur so au ma Aäron, ma kubio so kambaba sensajoor nini, nani kambaba diònè maria.

2. Inèni Moses riut niè aitato. Ma Moses ma Aäron tuter kawàsa sendur so kambaba. Inèni Moses tiòpan so siat: mentadjawa! miat, mendumi karakwai beja! nani amunrònè kambo siubi na kambaba nini te? Ma Moses piòsasaan wara ma riora kambaba tuter aitatonu bemònu. Ma kambo siubi na kambaba, ma kawàsa ma sennè pimunasi sentunum. Bape Sjen tiòpan so Moses ma Aäron: so munkòrusaar Jau ba, ma munbehormat Jau maso Israelsiat sendèmi ba, so nini nani munkoor siat ba so utan nani Jònè maso siat.

3. Inèni Moses direr na Kades so radja Edom, tiòpan: nuè nètasiat Israel sentòpan so au: buònè amandátu nuè utan. Bape radja Edom riar so siat: nani mendatu inè utan pènai! Ma riana tuter kawàsa pau abo bidjoor siat. So nini Israelsiat senda so wis Hor. Ma senna na wis Hor, Sjen tiòpan so Moses: so munkòrusaar Jau ba na kambo Meriba, Aäron sijoòr utan Kanaän ba, bape biòru na nina. Kueira wis nini, au tuter Aäron ma niè aantum Eleasar, ma buònè sansun imambaba na Aäron maso Eleasar. Ma Moses nianari tapè Alla tiòpan; ma Aäron biòru na wis, ma Israelsiat senseis i raria 30.

4. Sentarien ja, senda na raanpai so Rawanambeurar, abo tapèna senda wariri utan Edom. Bape Israelsiat senkembèrei raanpai nini,

senbarirui so Alla ma Moses, sentòpan: so menkoor amat beruswa utan Mitsir abo amanbòru na utan biro nini? Nanina amannè pisjaan ba, ma maria ba; ma manna betapisan beja, amankembèrei amantaan i rami! Inèni Sjen dimis so siat tawaikiaansi sikarib siat, ma siat pau senbòru. So nini sentòpan so Moses: amanbetatar to! bunadi so Sjen, suaaw so I kioor tawaisi nini beruswa amat. Ma Moses niadi so Sjen, ma Sjen tiòpan so i: nunari na kansa tawai siri ariri tawaikiaan,



ruapau i na ai dirieu babo ma nani tei sijoor so i, so tawai kirib i to, nani biòru ba. Moses nianari tawai na kansa, ma ruapau i na ai dirieu babo; ma tawai kirib esi, bape dipon tawai kansa, biòru ba.

5. Ma Moses direr so Sihon, radja na Amoritsiat, tiòpan: buonè amandatu nuè ntan; nani amanda so rom esi ba; amanpòtu aibo esi ba; amantunum na mèmù maria ba; amanda na raanpai babo wènasja to amandatu to mèmù utan. Bape Sihon didjawa ba, bape riama tuter

to diawi Alla! Mentòpan witoi? Sensaaw wura: nani biòru! Inèni senkanisu bèra rè. Ma siat sendut Sjen, sensòrèpëso ma senmari I, sentabun niè rè, senrora I, ma sentòpan so I: tuòpan: teĩ riora au? Ma senkabio kariria tòro so I.

---

### § 53. Petrus diawi.

1. Senkooor Sjen so Kajafas niè anio, Simon Petrus riauxaar siat tuter murid esi rin Imam baba. Ma esi riapwir Imam baba niè anio, bape Petrus diòsa na wòrira. Ma murid esi kibio so bwabwin diaran aturè ma kioor Petrus riapwir kòta. Ma hambasiat senduria àdia, senkaruri siat, ma Petrus kòta. Ma hamba bwawin na Imam baba riamasijoor Petrus kiruri mitauni, dipon i ma tiòpan so i: „au kòta tuter Jesus na Nasaret! Bape Petrus diawi, tiòpan: irin i ba, ma irin ba tuòpan witoi. Kabò Petrus bibur siat, ma kokori muan kibio berètenam.

2. Ma hamba bwawin esi sijoor Petrus, tiòpan so siat sentòsa tuter i: i ma anina siri na siat, tiuter kòta Jesus na Nasaret! Ma tiòpan so Petrus: au siri na niè muridsiat ba te? Ma Petrus diawi ja, siawora, tiòpan: irin sinjontu nini ba!

3. Ma wòroi barami, Imam baba niè hamba esi, siri na Malkus niè usapui, tiòpan: wàtan! i kòta siri na siat! i kòta sinjontu Galilea! ma tiòpan so Petrus: isajoor au ba te tuter i na Getsemane? Ma esiat sentòpan so Petrus: wàtan! au siri na siat! kubio kòta tapè Galilesiat. Ma kabò Petrus pioras mitauni, siawora, tiòpan: irin sinjontu ba menkabio na i! Ma Petrus kibio rami, kokori muan kibio bemònu.

4. Ma Sjen siòbera mitauni, sisir i ma dipon Petrus. Ma Petrus sanèpaja tanè Sjen tiòpan to so i: kokori muan kibio bemònu barami, buawia so Jau betòru to,” bibur so wòrira ma sieis pena besiri.

---

### § 54. Sjen Jesus maso Sanhedrin; ma Judas miun mitauni.

1. Ma pòsibua pena Sanhedrin sendur ma senkooor Sjen so siat, sentutan I: Au Kristus te, tuòpan i so amat! Ma Sjen riaar so siat: Itòpan i te nani mensanètiaar Jau ba, ma Jutan miat te nani mendaar

so Jau ba, ma mendera Jau ba. Bape nani mensajoor kawasa Aantum misoi na Alla pia wura niè wara watan! Ma sentòpan wura so I: au Alla aantum te? Sjen tiòpan so siat: tapè mentòpan! Kabò sentòpan: amantataar kabio esi rami te? Mantaunamat amantadjawa nini na niè sòrèpai to! Ma kausapa pena senbehukum I, sentòpan: nani biòru! Sentabit I ja, senkoor I maso resident Pilatus.

2. Ma Judas, bioob Sjen, sijoor pana senbehukum Sjen to, miteit beja; kioor sòbera kumpang 30 maso i mamsiat ma babapaisiat, tiòpan so siat: ibetatar beja! irawajan I niè tatar ba! Bape sentòpan so i: amannè tatar te, mantaunau! Inèni Judas kiai kumpangi na anio Alla rarò, dipaira so aniosepai wòrira ma miun mitauni, dibakiri mitauni tuter wai na niè raupai; bape tiawa na bebetera so djo, ma nie sanè siabu ma sanèwapai sitawa, biòru.

3. Ma Imamsiat senkamò kumpangi, sentòpan: kumpangi nini sinè wòri, tankai si pènai so aiku kumpang na Anio Alla, amamò pidikoor na riat! Ma senkabio babera to, senbòri utan kakòpa na tukang mararu so kubir ambeersiat. So nini sentap utan kubirsi nini: Akeldama, anina: utan riat.

---

## § 55. Sjen Jesus maso resident Pilatus ma radja Herodes.

1. Babapaisiat wura sentòsa, senkoor Sjen Jesus maso resident Pilatus, na kausapa bera rami. Ma Jehudisiat sendapwir anio hukum pibai, abo sennè wòri ba bape senpa sentaan pisjaan Paska. Ma Pilatus siubi rari so siat ma tiòpan: Sinjontu nini nianari witoi? Sendaar so i: kiriria ba rèto, nani amankoor i maso au te? Pilatus tiòpan: menkoor i, menbehukum i tapè mennè prenta! Jehudisiat sentòpan so resident: amanpa ba amanbehukum esi! Tapèna pena abo Sjen biòru tapè mitauni tiòpan to. Kabò sentòpan: diniau kariria maso kawasa! diniau siat: senbait tjo ba maso Kaitser! tiòpan: mitauni Kristus, anina radja!

2. Pilatus riapwir anio hukum, siaaw Sjen, diutan i: au Jehudisiat sennè radja te? Sjen riar so i: inè karadjaän nia na dunja nini ba; inè karadjaän nia na dunja nini, inè hambasiat senmun bedjoor Jau abo Jehudisiat sensèmua Jau ba! Pilatus diutan Sjen: au radja bewatan te? Sjen riar so i: tuòpan tapèna! so nini ibesinjontu to! ma so nini

irama to so dunja abo jiniau iseeri pi wàtan! Tapèna: tei sanépai pi wàtan didjawa Jau! Pilatus tiòpan: pi wàtan, witoi nini? Tiòpan tapèna to siòtira ma tiòpan so Jehudisiat; isèmua tatar ba na sinjontu nini!

3. Inèni imamsiat ma babapaisiat sentòpan kariria pau na Sjen, bape mitauni riar besiri ba pana. Pilatus tiòpan so Sjen: budjawa ba te witoi sentòpan na au? Bape riar kabio siri ba, tapèna resident tindoor. Bape resident didjawa: Sjen sinjontu Galilea, dimis Sjen maso radja Herodes Antipas, radja na Galilea, misoi kòta na Jerusalem. Ma Herodes sijoor Sjen, sanèwèsjeen to baba, amamò wòroi to sanèwèsjeen sijoor Sjen abo didjawa I. Ma Herodes sanètiaar sijoor Sjen nani nianari pi tandoor maso i. Inèni diutan pi pau so Sjen, bape Sjen riar kabio siri ba so i. So nini Herodes tuter niè soldadusiat senkapiap ma sensòrèpèso Sjen, sensansun I tuter sansun benataar, ma sentamis I siòbera so Pilatus.

---

## § 56. Pilatus behukum Sjen.

1. Resident ririn pena na festa Paska rièra na pandjaran sinjontu siri, Jehudisiat sentiria i. Ma sinjontu esi sanò Barabbas, nia na pandjaran, Jehudisiat senrin to sentapur i tuter esiat senmun sinjontusiat. Inèni Pilatus tiòpan so Jehudisiat: mensanèwèsjeen irera tei na sanu, Barabbas te, Jesus te sentap i: Kristus, Jehudisiat sennè radja. Pilatus tiòpan tapèna so rin senkooor Sjen so i amamò babasiat senkasjo i. Ma Pilatus misoi na karapèsa hukum, bwiniempi siaaw i, tiòpan so i: behukum sinjontu tindia nini pènai! jenamia imarioor beja so i.

2. Inèni imamsiat ma babapaisiat sentaniau kawàsa: sentiria Barabbas bape Jesus biòru. Inèni resident diutan siat: tei na sanu nani irera maso miat? Sensaaw: amankembèrei nini! ruera Barabbas! Bape Pilatus sanèwèsjeen rièra Jesus, diutan so siat: bape nani inanari witoi tuter Jesus, sentap i: Kristus? Sensaaw: mun i na aitabat! mun i na aitabat! Pilatus diutan siat esia: nianari kariria witoi? nianari tatar siri ba! nani irora i ma irera i! Bape senmènau ba, sensawaüri wora, sensaaw; biòru na aitabat! sensaaw wènasja: mun i na aitabat!

3. Ma Pilatus sijoor pia siat ba, miteit tókato sentò mamun,

siaaw paarwasi tuter kambo, misoi, rioram warapai, kawâsa sensajoor nini, ma tiòpan so siat: inè tatar ba na sinjontu tindia nini niè riat! Mantaunmiat! Inèni sensaaw wura: niè riat miun amat ma amannè aantumsiati sarèdjeu! Inèni Pilatus kiòrusaar siat, diònè senrora Sjen abo senpa I na aitabat. Inèni soldadusiati senkoor Sjen na anio hukum rarò, sensaaw esiat wura sendur, sendera Sjen niè sansun, ma senrora i; keis. sensansun I tuter sansun beurar (sansun offisir) ma sensun



tòpi (makota) na kandai, senso i na niè ru, ma sentòne riusasaan aitatoni tuter wara wàtan, Inèni sensòrèpèso I, sentisan aibu so I, sentòpan so I: tabea au radja Jehudi! Ma senkanisu bera rè, senrut aitatoni bruswa i, senrorapori ru ma senbasapa tarare.

4. Pilatus siubi ja ma tiòpan so Jehudisiati: mensajoor, ikoor I ja so miat abo menrin isajoor to: niè tatar pibai. Sjen siubi tuter makota na kandai ma sansun beurar. Ma Pilatus tiòpan so Jehudisiati: mensajoor

sinjontu pai! Bape mananirsiat Imam ma babasiat sensajoor I tapèna, sensaaw: mun i na aitabat! mun i na aitabat! Pilatus tiòpan: menkoor i, menmun i na aitabat! Jehudisiat sensaaw: amannè prenta tiòpan: biòru! so nianari mitauni Alla aantum!

5. Pilatus didjawa kabio nini, miteit to baba raiwain, riapwir anio hukum ja ma diutan Sjen: teĩ au? Bape Sjen riar so i ba. Pilatus tiòpan so I: ruar so jau ba te? ruin ba te: ipa imun au na aitabat, ma ipa irera au? Sjen riar so i: mantaunau pua Jau ba, bape suèmua pajapai nini na rora; so nini siat senkoor Jau maso au, senbetatar raiwain au! Inèni Pilatus titoa rièra Sjen, bape Jehudisiat sensaaw so Pilatus: ruera i nani kaitser kisjo au! so teĩ bieradja mitauni biòjoor kaitser! Pilatus didjawa kabio nini, kioor Sjen Jesus na anio reponpai, misoi na karapèsa hukum, tiòpan so Jehudisiat: mensajoor mennè radja! Bape sensaaw: koor beruswa i! koor beruswa i! mun i na aitabat! Pilatus tiòpan so siat: imun mennè radja na aitabat te? Sendaar so i: amannè radja ba! amannè kaitser mièser! **Kabò** Pilatus biprenta semmun Sjen na aitabat.

---


### § 57. Senpa Sjen na aitabat.

1. Soldadusiater sendera sansun beurar ma sensansun Sjen tuter mantaunniè sansun. Ma senkoor tuter I sinjontu kariria mònu abo senmun sanu tuter I. Senkoor Sjen abo senpàku I na aitabat, ma Sjen sirio niè aitabat. Ma senda senkoor I, senwaaw Simon na Sirene, ria sòbera na niè rom, sentò sirio Sjen niè aitabat na Sjen niè karu. Ma kawàsa pau ma bwawinsiater sendausaar Sjen, senseis I. Ma Sjen siòbera ru sijoor siat, tiòpan so siat: aantumbwawinsiater na Jeruzalem miat! menseis so Jau pènai! bape menseis so mantaunmiat! ma so mennè aantumsiater! So riarasi nani sirama nani sentòpan: Slamater siat sensanè masa ma bwawinsiater senbaro aantum! so na riarasi jani nani sensaaw: wispaisi mentaubur amat! wis katusi mentup amat! So kabò sennanari tapèna maso aikamaru, nani airamuan tanè?

2. Ma senda so wis katu Golgota napa senmun Sjen. Ma sentò senpàku I na aitabat, sentònè so I angor tuter mirre, bape Sjen kiembèrei diunum i. Ma senpàku I na aitabat, ma sinjontu kariria

sanu kòta, siri na Sjen niè wara wàtan, esi na niè wara saar, ma Sjen rabwan sanu; tape Nabi Jesaja tiòpan to na I: sentatoor I tuter kaririasiat. Ma senpàku Sjen pena, Sjen tiòpan: Jai! kusjo siat pènai! amamò senrin ba sennanari witoi! Ma anina oras 9 na kausapa senpàku Sjen na aitabat.

3. Ma senpaku babo Sjen niè ru wòkatiani esi, Pilatus biui na i to: Jesus na Nasaret, Jehudisiat sennè radja. Ma biui nini na kabiò



tòru: kabiò Jehudi, kabiò Hellas ma kabiò Rome. Inèni Jehudisiat sensajoor nini, babapaisiat senda so Pilatus sentòpan so i: bui pènai, Jehudisiat sennè radja, bape bui: tiòpan: jau Jehudisiat sennè radja. Bape Pilatus riar so siat: witoi ibui to, misoi tapèna! Ma soldadusiat senbeat, senpàku Sjen na aitabat to, sentaas Sjen niè sansun ariri siat, bape Sjen niè sansun baba biata, sentòpan: amansabu i pènai! Sansun nini sentawar i ba, bape tiutira wura. Ma senkai onde abo sensajoor



teï na siat niè i betutira. Tapèna Dafid rioi to na Masmur 22: „sentaas inè sansun, ma senkai onde so inè sansun”. Tapèna soldadusiat sennanari.

## § 58. Sjen Jesus na Golgota.

1. Siat senda siwar Sjen, senkawe sendumi, sensòrèpèso Sjen, sentòpan: aje! au! tuòtap anio Alla! ma nunari esi babòru na raria tòru! ruera mantaunau! Au Alla aantum te, buaar na aitabat! Ma mananirsiat imam, ma panditasiat Jehudi, ma babapaisiat, ma Farisiasiat, siat kòta sensòrèpèso Sjen, senkabio babera, sentòpan: sanèpai esiat to, bape piaba sanèpai mitauni! I Kristus, radja Israel te, wèsjeen! bjaar na aitabat ma nani tansanètiaar i! Sanètiaar Alla to, wèsjeen! Alla sanèpai i ma rièra i! so mitauni tiòpan to: Jau Alla Aantum! Ma soldadusiat kòta sensòrèpèso I, sentòpan so i: au radja Jehudi te, wèsjeen! ruera mantaunau!

2. Ma siri na sanu sunrabakiri kòta na aitabat siòrèpèso Sjen kòta, tiòpan so I: au Kristus te, wèsjeen! ruera mantaunau ma nanu! Bape esi na sanu, dieuso i, tiòpan so i: au kòta muteit Alla ba? au kòta suèmua siksa tapè i, bape tanu tunsèmua tindia, tunsèmua siksa ariri tunnanari to! bape nini nianari pi kariria siri ba! Ma tiòpan so Sjen: Sjen: nani ruapwir nuè karadjaän sanèpaja jau. Ma Sjen tiòpan so i: Itòpan so au be wàtan: raria nini nani musoi tuter Jau na Eden!

3. Ma Sjen sinjani, ma Sjen sinjani katu, ma Maria Magdalena, sentòsa deriasi aitabat. Ma Sjen sijoos sinjani diòsa tuter murid Johannes, tiòpan so sinjani: bwawin! sujoos nuè aantummuan! Ma tiòpan so Johannes: sujoos sinjamu! Inèni Johannes kioos Sjen sinjani ma misoriaat i.

4. Inèni raria worabwan pana worepai bemamaan to oras 3, mimaan wàtan na dunja betutira. Ma na oras 3 Sjen siaaw tuter raukana baba: Eloï, Eloï, Lama, Sabaktani! anina: Inè Alla: Inè Alla! so bubur Jau to? Ma esiat sentòsa jana, sentadjawa nini, sentòpan: siaaw Elia! Inèni Sjen rin: nianari pi wura Nabisiat senbui to na i keito, siaaw: rauparaar! Ma deriasi aitabat diòsa pipa siri tuter angor sjasa; ma sinjontu esi siaan spons siri na angor sjasa, disan i na adutipai, ma diòne Sjen sium i diunum. Bape esiat sentòpan so i: mojar! tansajoos tatoa Elia nani riama riera i te! Ma Sjen diunum to, siaaw: Keito! Inèni siaaw esaja

tuter raukana baba, tiòpan: Jai! jònè inè rwanunum so waramu! Ma kiasir rau, biòru.

5. Sjen biòru, sisè baba, sioor Anio Alla rarò sreen wàtan, misabu na babo to djo, ma dunja ririorar so mundia baba; ma kambabasi si-masabu, ma kubirsi sisèban, ma pau na kawàsa sreen, senbòru papon to, sentando, ma sensubi sennè kubirsi to, sendapwir aniose, ma kawàsa pau sensajoor siat. Ma offisir biprenta soldadu utin tuter niè soldadusiat sentaran aitabat, sensajoor mundia ma pi tandoor esi, sennateit tòrò, sentòpan: wàtan! nini sinjontu tindia! I Alla Aantum! Ma kawàsa pau sendur wana, sensajoor pi nini wura, sensòbera ja so Jerusalem, senbasaar sentaromi. Ma siat sensanèpai Sjen, ma bwawinsiat na Galilea sendausaar Sjen abo sensajoriaat I, asianina: Maria Magdalena, Maria, Jakobus ma Joses sinjani, ma Jakobus ma Johannes sinjani, ma esiat tuter siat, sentòsa na wòroi, ma sensajoor pi nini wura.

### § 59. Senpir Sjen niè tèrai na kubir.

1. Ma rawinièna pena asiana raria Sabbat pana, ma Sabbat nini sentap i: Sabbat biba. So nini, mananirsiat sensaaw so Pilatus: diònè senrora papor sendaïmi, abo senbòru, ma sensèra si seira abo tèrai na bebòrupaisiat sitabakiri pènai na aitabat na raria Sabbat. Ma soldadusiat senda, senrora papor sendaïmi na sanu senmun sanu tuter Sjen; bape sendama so Sjen sensajoor biòru to. So nini senrorapapor Sjen niè aipai pibai. Bape soldadu siri disan Sjen niè sanèkasin tuter saneinjoi, ma riat tuter kambo riawa na kapor nini.

2. Ma mananir Jehudi esi, sanòpai Josef, na Arimatea, miajar ba tiuter siat senbehukum Sjen. Sinjontu nini diteen ma tindia, ma dinòta kòta karadjaän Alla, miteit Jehudisiat bape sanèpai Sjen. Inèni rawinièna pena, ria so Pilatus, ma siaaw so i Sjen niè tèrai. Ma Pilatus tindoor didjawa Sjen biòru to. So nini siaaw offisir ma diutan i: Jesus biòru wòroi to te? Ma didjawa Sjen biòru bewàtan, diònè Sjen niè tèrai maso Josef. Ma Josef biòri sisè bebusa diteen besiri, kioor Sjen niè tèrai bruswa aitabat, tibaan i tuter sisè.

Ma Nikodemus, na papon to ria na diru esi maso Sjen, kabò riana kòta, kioor airawi seirwèsjeen pau mò. Ma sentabaan Sjen niè tèrai tuter airawi seirwèsjeen na sisèpai, tapè Jehudisiat sennè buwai. Ma Josef

na Arimatea niè rom esi deriasi Golgota, ma na rom nini niè kubir babòru, sennanari i tapè swep na kambaba rarò. Na kubir nini, bebòrupai esi biata na i ba rami, senpir Sjen niè tèrai, so tòkato Sabbat; ma sensor kubir sòrè tuter rëwuki biba.

Ma bwawinsiat sendausaar Sjen na Galilea sensajoor kòta senpir Sjen niè tèrai na kubir rarò, keis senbabur. Ma na Sabbat senmënanu tapè Alla biprenta. Ma Sabbat kieis inèni sennanari airawi seirwësjeen. Ma kausapa mananirsiat imam ma Farisiat senda so resident Pilatus, sentòpan so i: sinjontu karira arapai tienam rami tiòpan to: raria betòru nani tindo! So nini buòné prenta sensor kubir bewàtan, to raria tòru si keis to, abo niè muridsiat senkoor niè tèrai na diru pënai, ma sentòpan so kawàsa pënai: biòru, bape tindo to! Amamò sennanari tapëna, nani kariria bebabòru biba raiwain kariria betawa. Bape Pilatus tiòpan so siat: mantaunmiat, mennè soldadusiat to, mentònë sentaran kubir. Menda! mennanari tapè menmajar. Ma senda, sentònë soldadusiat sentaran kubir, ma sensor bedjoor kubir tuter sennè tjap.

## § 60. Sjen tindo na bòru.

1. Raria Sabbat kieis to, Maria Magdalena ma Maria, Jakobus sinjani, ma Salome senda, senbòri airawi seirwësjeen maso Sjen nie tèrai. Ma raria bepapon na domingo, posibua, senda so kubir, senkoor airawi seirwësjeen; ma bwawin esiat senda tuter siat. Ma senda pena senkabio babera, sentòpan: tei nani kididir rëwuki bruswa kubir sòrè te? Ma besiri mundia baba, so melaikat na Sjen bjaar na rora so kubir, kididir rëwuki bruswa kubir sòrè, ma misoi babo i. Ma i tapè kabjeban, ma niè sansun bemamara benataar. Ma soldadusiat sentaran kubir sentandoor tòrò tapè senbòru, senmateit to baba besiri.

2. Ma bwawinsiat sendama so kubir, sensajoor rëwuki baba kididir bruswa kubir sòrè to. Ma Maria Magdalena sijoor: kubir bireri, bibur, dipaira so Petrus ma Johannus, tiòpan so sanu: senkoor Sjen bruswa kubir! ma amanrin ba senpir i napa! Inèni bwawin esiat sendapwir kubir, bape sensëmua Sjen niè tèrai ba, senrin ba tanè ninì. Inèni sensajoor melaikat mònu sunròsa tuter siat, sunbesansun tuter sansun bemamara benataar, senmateit to baba, ma sentatuan sendèmi so djo.

3. Ma melaikat tiòpan so siat: menmateit pënai! irin mensasèrei

Jesus na Nasaret biòru to na aitabat. Tanè mensasèrei bietenam na bebòrupaisiat? Nia na nini ba! tindo to tapè tiòpan na papon to? Mendama! mensajoor utan senpir i napa to! Ma menda seira so niè muridsiat nani mentòpan so siat, ma so Petrus kòta: Sjen tindo to na biòru! ma ria pipon miat so Galilea! aniwana nani mensajoor Sjen. Mensanèpaja wènasja, tanè misoi rami tuter miat na Galilea tiòpan to so miat: Kawàsa Aantum nani senboob I maso kawàsa kariria,



ma nani senmun I na aitabat, bape raria betòru nani tindo. Ma bwawinsiat sensanèpaja kabiosi nini. Ma senda seira, senmateit ma sensanèwèsjeen, sentapaira abo sentòpan nini maso muridsiat, bape sentòpan nini maso kawàsa esiat ba, so senmateit.

4. Petrus tuter Johannes sunda so kubir. Ma sun deriasi kubir, Petrus ria sidadjara: tapèna Johannes riama papon so kubir. Ma tituan titira apui, sijoor sisè sibata, bape siuwapui kubir ba rami. Inèni Petrus

riama so kubir ma siuwapui, sijoor sisë sibata, bape sisë na ru biata ba tuter esi, bape sendojar i ma biata mièser. Inèni Johannes siuwapui kòta ma sijoor pi nini, ma sanëtiaar pena. So senrin ba rami tanè surat Refo kòta tiòpan : Sjen titaar tindo na biòru. Ma murid sanu sunbabur, sunsòbera so anio.

**§ 61. Sjen Jesus bierwana mitauni maso bwawinsiat, maso Maria Magdalena, ma maso muridsiat.**

1. Bwawinsiat senbabur kubir, senda so muridsiat, abo sentòpan so siat witoi sentadjawa to na melaikat, Sjen riasun siat, tiòpan so



siat : „tabea miat ! Ma sentatuan maso I, sentapurtawan niè aipaisi, ma sennadi so I. Sjen Jesus tiòpan so siat : menmateit pènai ! menda, mentòpan so Inè nètasiat : senda so Galilea, ma wana nani sensajoor Jau !

2. **Maria Magdalena** ria riwani ja so kubir, diòsa na kubir wòrira ma sieis. Ma titira so kubir rarò, inèni sijoos melaikeat mònu tuter sansun bemamara, esi misoi na rupai wanapa, esi misoi na aipai wanapa. Ma suntòpan so i: bwawin, sueis so? Riaar so sanu: so senkoor inè Sjen ma iriu ba senpir I na toi! Tiòpan nini to, siòbera mitauni, sijoos Sjen diòsa tuter i, bape ririn Sjen ba. Sjen tiòpan so i: bwawin sueis so? suserai tei? Maria sanèpaja sijoos tukang rom, tiòpan so i: Tuan! kuor I te, tuòpan maso jau pur I nanè, ma nani ira ikoor I ja! Sjen tiòpan so i: Maria! Ma Maria siòbera mitauni tiòpan so I: Rábuni (anina tapè tantòpan: Sjen!) Sjen tiòpan so i: rutawan Jau pènai! Isa ba rami so Jai; bape rua so Inè nètasiat ma tuòpan so siat: Isa so Jai ma mentamami! so Inè Alla ma mennè Alla!


3. Soldadusiat sentaran kubir to, sentapaira so aniose Jerusalem, sentòpan so mananirsiat imam witoi sensajoor to. Ma mananirsiat imam sendur tuter babasiat, senkabio babera na pi nini; keis, sentònè kumpang pau maso soldadusiat, sentaniau siat: nani sentawi kawasa, sentòpan so siat: na diru amantena, Jesus niè muridsiat sendama, senmanana niè tèrai! Ma sentòpan: nani Resident didjawa nini te, nani sentònè soldadusiat senmateit ba, so sentaniau i: kisjo siat ma mojar. Ma soldadusiat senkoor kumpangsi, sentopan maso kawasa witoi babasiat sentaniau siat to.

4. Muridsiat sendur pena, senbesusa ma senseis so Sjen. Maria Magdalena riama, tiòpan so siat: sijoos Sjen to, ma tiòpan kòta so siat witoi Sjen tiòpan to so i. Bape sensanètiaar ba: Sjen tindo to ma Maria sijoos i to; sentòpan: kibio sarèdjeu! Bape na raria Simon Petrus kòta sijoos Sjen!

## § 62. Murid mònu sunda so Emmaus sunsajoor Sjen.

1. Rawiniena pena, murid mònu sunda na Jerusalem so aniose Emmaus, wòroi oras 2. Ma sunda sunkabio na pi wura sunsajoor ma sunradjawa to na Sjen. Ma sunkabio tapèna, Sjen mitauni riama ria tuter sanu bape diònè sunririn I ba. Inèni diutan so sanu: munkabio na witoi, ma munbesusa so? Ma siri na sanu, sanò Kleopas, tiòpan so Sjen: muèser ambeer na Jerusalem? ruin ba te pi wura na raria ninasi? Sjen diutan so i: witoi? Suntòpan so I: pi wura na Jesus na Nasaret, i Nabi, nianari ma kibio pi pau ma diteen na

Alla maso kawasa wura. Bape mananirsiat imam ma babapaisait sentònè biòru na aitabat. Ma amansanètiaar to, nani rièra kawasa Israel; bape raria nini raria betòru to pi nini wura si keis to. Bape amannè bwawinsiat esiat sentòne amantandoor, so kamsèrani senda so kubir, bape sensèmua niè tèrai ba, bape sentòpan so amat: sensajoor melaikat-siat sentòpan: Sjen tiènam ja. Ma esiat na amat senda so kubir, sensajoor kubir bireri, bape Sjen sensajoor i ba.



2. Inèni Sjen tiòpan so sanu: O! muntataar manu! musanètiaar kawauwaru beja witoi Nabisi sentòpan to! Kristus titaar mirioor nini wura ba te, abo tapèna riapwir niè karadjaän? Inèni Sjen diniau sanu na Moses ma Nabisiat wura, ma na surat Refo betutira, senbui witoi to na Sjen. Inèni sendama so Emmaus, ma Sjen ria tapè senpòsasiè. Bape sunrònusaar I, suntòpan so I: musoi tuter nanu! rawiniena pena, tòkato diru. Ma Sjen riapwir abo misoi tuter sanu. Ma senmasoi sentò sen-

taanpi, Sjen riut mamami, biberkat i, kiròtu i, ma diònè i maso sanu. Inèni besiri sunrin Sjen, bape sunrin I to, besiri mirieer pana, sunsajoor I ba to. Inèni suntòpan babera: tunsanèwesjeen besiri ba te, diniau nanu na raanpai, ma diniau tindia nanu na Refo? Ma sunròsa seira, sunsòbera so Jerusalem. Ma sundama napa muridsiat sendur to, siat sentòpan maso sanu: Wàtan! Sjen tindo to! Simon sijoor I to! Inèni sanu kòta suntòpan tanè riama maso sanu, ma ria tuter sanu, bape tanè sunrin I ba rami to sunsajoor kiròtu mamami maso sanu.

### § 63. Sjen bierwana mitauni maso niè muridsiat.

1. Ma diru pena na raria bepapon na domingo, muridsiat sendur na anio rarò, ma sensor karakwai atorè so senmateit Jehudisiat. Bape besiri Sjen diòsa rabwan siat, ma tiòpan so siat: dame maso miat! Ma sentandoor tòrò! ma senmateit beja! sensanèpaja sensajoor rwanunum siri. Inèni Sjen tiòpan so siat: menmateit so? ma mensanèpaja tapèna na mensanè rarò so? Mensajoor Inè wara ma ai, Jau anina! mantaunjau! Mendut tatoa Jau! mensajoor tatoa! amamò rwanunum niè tèraï ma sinasi ba tapè mensajoor, inèsi. Ma Sjen tiòpan nini to, bièrwana so siat niè wara ma ai. Ma sensanètiaar tindia ba rami, so sensanèwesjeen beja. Inèni Sjen tiòpan so siat: mennè pisjaan esi te? Ma sentonè so I: diaan besòbin sòpèpai ma unum. Ma sensajoor wura Sjen diaan pi pena. Inèni Sjen tiòpan so siat: Imasoï rami tuter miat Itòpan to so miat: pi wura sirama wàtan witoi menwasja na Jau na suratsi na Moses ma Nabisiat ma na Masmursi. Ma Sjen tiòpan esia so siat: dame maso miat! Tapè Jai dimis Jau to, Jamis miat kòta! Inèni Sjen siòbewana so siat ma tiòpan: Mensèmua Rwanunum Sreen: menbemaaf esi niè tatar, sièmua maaf kòta; menbemaaf esi niè tatar ba, niè tatar misoi.

2. Bape Tomas, sentap i kòta, Didimus (kasusir) riur ba tuter siat diru Sjen riama so muridsiat. Sensajoor i sentòpan so i: amansajoor Sjen to! Bape Tomas tiòpan so siat: isajoor kòtièti na paku ba na niè wara, ma jisan inè warakia ba na kòtièti na paku; ma jisan inè wara ba na niè sanèkasin, nani isanètiaar ba pana! Ma raria 8 sikeis, muridsiat sendur ja na anio rarò, ma Tomas tiuter siat. Ma sensor aturè to, Sjen Jesus diòsa besiri rabwan siat, tiòpan so siat: Dame maso miat



Inèni Sjen tiòpan maso Tomas : koor warakiamu nanina, sujoor inè wara! ma buisan waramu na Inè sanèkasin! ma sanètiaar ba pènai, bape sanètiaar! Bape Tòmas riar so Sjen : Inè Sjen! ma inè Alla! Inèni Sjen tiòpan so Tomas : amamò sujoor jau to au sanètiaar, bape slamat siat sensajoor ba rami, bape sensanètiaar pana.

#### § 64. Sjen bierwana mitauni na ruru Tiberias.

1. Sjen Jesus bièrwana mitauni esia maso niè muridsiat na ruru Tiberias tapèna: na wana sendur to: Simon Petrus, ma Tomas, ma Natanael na Kana na Galilea, ma Sebedeüs niè aantum sanu, ma murid mònu esi. Petrus tiòpan so siat: ibò, ikai djara! Esiat sentòpan so i: amandot au! Sensa karures, senbò, bape diru betutira sensèmua diaan siri ba. Ma masepar pena Sjen diòsa na ruru dirèpai, bape muridsiat senrin I ba. Sjen siaaw so siat: Marariamiat! mennè pitati-taanpi ba te? Sendaar so i: pibai! Sjen tiòpan so siat: menkai djara na rawa wàtan na karures, nani mensèmua! Senkai djara na rawa wàtan inèni senpa ba sensèrapi i, so diaan pau besiri.

2. Kabò Johannes tiòpan so Petrus: Sjen to! Petrus didjawa Sjen nini, sisun mitauni tuter sansun biba, kiòpas ma diaas are so Sjen; bape murid esiat senbò karures ma senbò djara tuter diaansi, so senderiasi dirè pana. Ma senbiaar to, sensajoor adia ma diaan tuter mamami sibata na adiarariè. Sjen tiòpan: menkoor diaan menpòtè-pèsasi! Simon Petrus ria, sirapi djara ma re, ma djara diònu tuter diaansi baba, 153; ma diaansi borei tapèna, bape djara misabu ba. Inèni Sjen tiòpan so siat: mendama, mentaanpi! Ma muridsiat senmateit sentutan. I: tei au nè? senrin pena: Sjen nini. Ma Sjen riut mamami, diònè i so siat, ma diònò diaan kòta so siat.

3. Sentaanpi to, Sjen tiòpan so Petrus: „Simon, Jona aantum! sanèpai Jau to baba raiwain siat te? Petrus riar so Sjen: Jò Sjen! ruin isanèpai Au! Sjen tiòpan so i: sujoriaat inè domba aantumsi! Inèni Sjen tiòpan ja so i: Simon, Jona aantum! sanèpai Jau te? Petrus riar so I: jò, Sjen, ruin isanèpai Au! tiòpan so i: sujoriaat inè dombasi! Inèni Sjen tiòpan so i betòru: Simon, Jona aantum! sanèpai Jau te? Ma Petrus besusa so Sjen diutan i tapèna betòru to, riar so Sjen, tiòpan: Sjen: ruin pi wura, ruin kòta isanèpai Au! Sjen

tiòpan so i: sujoriaat inè dombasi. Itòpan be wàtan so au: to kabò ruapau mantaunau ma rua napa muajar; bape nani au mansaar pena, nani suī waramu, ma siri esi nani riapau au, ma kioor au napa muajar ba! Ma Sjen tiòpan tapèna abo berwana tanè nani Petrus biòru ma sioom Alla. Inèni Sjen tiòpan so Petrus: ruausaar Jau.

### § 65. Sjen sia so rora.

1. Muridsiat senda so wis na Galilea napa Sjen direr siat to. Ma manètasiat 500 sendur tuter siat. Ma sensajoor Sjen sennadi so I, bape esiat sensanèpaja sasera. Ma Sjen riama tiòpan so siat: Isèmua to pajapai wura na rora ma na utan! Menda! mentaniau kawàsa wura, mentònè Masi Sreen siat na sanòpai na Tamani, ma na Aantum, ma na Rwanunum Sreen, mentaniau siat: senkòrusaar pi wura witoi Jiniu miat to! Tei sanètiaar ma sièmua Masi Sreen to, nani sièmua slamat. Bape tei sanètiaar ba, nani niei. Ma siat sensanètiaar nani sennanari pi nini: na Inè sanòpai sentatar bilessi, ma nani senkabio tuter sensòrètaparèpasi babòru; nani sendut tawaisi ma sentunum pi mirmur nani miun siat ba pana! senpir senbarami babo bepòtapaisiat nani bepòtapaisiat sentateen! Ma Imasoi tuter miat tawana, to utan niei pana.

2. Sjen Jesus bièrwana tienam ja raria sura be at, diniau niè muridsiat na Karadjaan Alla. Ma raria diupui misoi tuter siat na Jerusalem, tiòpan so siat: menmasoi na Jerusalem, mentanòta to mensèmua witoi Itòpan to so miat nani Jai diònè so miat. Menmasoi na Jerusalem to mensèmua pajapai na rora. Johannes bemasi diònè Masi Sreen tuter kambo, bape bepui raria bepau ba nani mensèmua Masi Sreen tuter Rwanunum Sreen. Ma siat sendur tuter I sentutan I: Sjen! inèni nani nunari karadjaän Israel ja te? Bape Sjen riaar so siat: mentutan pènai witoi Jai mièser rin i! Bape nani mensèmua pajapai na Rwanunum Sreen, nani riama so miat, ma miat nani Inè besajorapai-miat na Jerusalem, na Judea betutira, na Samaria, to dirèpasi na utan. Ma Sjen kioor siat to deriasi Bètaniè na wis Oleif, ma sii niè wara babo, biberkat siat. Ma biberkat siat pena, sensajoor Sjen sia so rora, to arepa siri bidjoor sendèmi.

3. Ma Sjen siaji pana, muridsiat sentòsa sentàpon so rora rami, sinjontu

mònu sunròsa tuter siat, sunbesansun sansun bemamara benataar, ma suntòpan so siat: miat Galilea miat! so mentosa ma mentapon so rora so? Jesus nini, siaji to so rora bruswa miat, nani riama ja tapè



mensajoor siaji to! Inèni muridsiat sensòbera ja so Jerusalem, sensanè-wèsjeen to baba. Ma tawana senmasoi na Anio Alla, sensènendik ma senbetrimakàsi Alla.

### § 66. Festa Pentakosta (raria sura be rim).

1. Ma na festa Pentakosta muridsiat sendur tapè senririn pana. Ma besiri riama na rora pi riotu tapè wana baba besiri, ma sentadjawa i na anio betutira. Ma pi tapè sòrètaparèsi, tapè àdia bibiaarsi, siòsa na sendumi babo, siri niè esi, esi niè esi. Ma siat wura sensèmua

Rwanunum Sreen, ma senkabio be ambeer tapè Rwanunum Sreen diniau siat. Ma na Jerusalem sendur to kòta Jehudisiat sensanètiaar Alla, senna na utan borei. Siat sentadjawa to pi riòtu to baba sendur wura, ma sentandoor so sentadjawa muridsiat senkabio na sennè kabio, senkabio be ambeer. Ma sentandoor to baba, senkabio babera: mensajoor! siat wura senkabio jani, Galileasiat ba te? Tanè amantadjawa senkabio na amannè kabio? Kabio Parter ma Meden, ma Elam



ma Mesopotamië, ma Judea, ma Kapadosië, ma Pontus, ma Asië, ma Frigië ma Pamfilië, ma Mitsir, ma rawesi na Libië derias Sirenë, ma Romë, ma Kreta, ma Araab, ma ambeersiat senkòrusaa buwai Jehudi, amantadjawa siat na amannè kabiòsi sensènendil nanaripi baba na Alla! Ma siat wura sentandoor, senpa ba pans senkabio babera: Witoi nini? Bape esiat sensòrèpèso siat sentòpan Sentunum.

2. Bape Petrus, diòsa pena tuter muridsiat, kibio tuter raukana baba, tiòpan maso siat: Jehudi miat, ma miat wura menna na Jerusalem! amantunum pibai! so kabò oras tòru wenasja na kausapa! Bape pi nini anina witoi Nabi Joel tiòpan to, tiò tapèna: Sjen Alla tiòpan to: „nani na raria bepapai Ibubu na Inè Rwanunum Sreen babo kawàsa wura!” Miat! Israelmiat: mentadjawa! Jesus na Nasaret, sinjontu Alla, tapè mensajoor to na pi tandoor pau Alla nianari to tuter I rabwan miat; mantaunmiat menrin i pana, inè? Bape mentapur I, ma mentònè I maso kawàsa karwaar senbarami, ma siat senpaku I na aitabat, senmun I to biòru! Bape Jesus nini, Sjen Alla diònè tindo na biòru! Ma kabò misoi pena na Alla niè wara wàtan, ma sièmua to Rwanunum Sreen, tapè Tamani tiòpan to so I, kabò diònè witoi mensajoor ma mentadjawa pena! Tapèna kawàsa Israel inèni wura senrin: Alla riut I be Sjen ma Kristus wàtan! Jesus arapai, menmun I to na aitabat!

3. Ma sentadjawa kabiosi nini, sentandoor to baba, sentòpan so muridsiat: Manètamiat! nani amat tanè? Inèni Petrus tiòpan so siat: menbetobat, ma mensaaw Masi Sreen na Sjen Jesus Kristus niè sanòpai, abo mensèmua maaf na mennè tatar! ma nani mensèmua kòta RwanunumSreen. Ma siat sensanèwèsjeen senkòrusaar kabio nini, sensèmua. Masi Sreen, ma asianina na raria arapai kawàsa sjaran be tòru (3000). Ma senkòrusaar witoi Rasulsiat sentaniau siat, ma sensanèpai babera siat; ma sentuter siat na Pisjaan Sreen ma na nadi. Ma sentawajan sennè pigangèna, senboob ariri siat senbaro. Ma sendur tawana na Anio Alla, sensènendik Alla ma sensanèwèsjeen to baba; ma kawàsa wura sensanèpai siat. Ma Sjen diònè tawana esiat sentuter siat sensèmua slamat.

## § 67. Petrus nianari diteen ja sinjontu riamoja ba.

1. Raria esi Petrus ma Johannes sanu sunda so Anio Alla, na oras nadi, oras rimat (9). Ma sinjontu ria mojaba na sinjani diawin i, tawana senbai i senkoor i so aturè na Anio Alla, abo diraria pipi na kawàsa senda so Anio Alla; Sinjontu nini misoi, ma sijnor Petrus ma Johannes sanu sunda so Anio Alla, diraria pipi na sanu kòta. Ma Petrus dipon i, tiòpan so i: bupon nanu! Ma sanèpaja sièmua pi esi na sanu, dipon sanu. Ma Petrus tiòpan so i: serak ma brawen inè ba, bape witoi inè

jonè so au: na Jesus Kristus na Nasaret niè sanò: buòsa ma rua! Ma Petrus riut niè wara wàtan, riusasaan i; ma besiri niè aipaisi ma aigameinsi sipa pana, ma diòsa kiòpas, ma ria. Ma tiuter sanu, riapwir Anio Alla, ria ma kiòpas ma sièndik Alla. Ma kawàsa wura sensajoor ria ma sièndik Alla; ma senrin i, misoi tawana na aturè na Anio Alla, diraria, sentandoor to baba, sendur, so sensajoor riut Petrus ma Johannes.

2. Ma Petrus sijoor nini, tiòpan so siat: Miat, Israelmiat mentandoor na pi nini so? mentapon nanu so? tapè amunnanari pi nini, ma tapè amunpa pi nini so amunsanètiaar Alla! Alla na Abraham, Isaäk ma Jakob, Alla na tantamamisiat bièhormat niè Aantum Jesus, miat mentònè I maso Pilatus, ma Pilatus miajar rièra I, bape menkembèrei nini so menkapiap I, Sinjontu tindia ma Sreen wàtan, ma menèwori sinjontu mamun! Menmun Radja na tenampai! Bape Alla diònè tindo na biòru; ma na nini amunbesajora to! Ma sanetiaar na Sjen niè sanò, sanò na Sjen diònè sinjontu nini, mensajoor i, ma menrin i, pia ria. Sanètiaar na Sjen diònè sinjontu nini diteen wàtan, rabwan miat. Bape manètamiat! irin: miat ma mennè mananirsiat mentataar mennanari tapèna. Bape manètamiat! menkòrusaar ma menbetobat, abo Sjen nani pia kii mennè tatar.

3. Ma Petrus kibio rami imamsiat ma mananir na Anio Alla sendama so sanu, senkoo sanu, ma sensorbedjoor sanu to kausapa. Ma kausapa sendur pena senkoo Petrus ma Johannes maso siat, ma sentutan sanu: tanè ma na tei niè sanò sunnanari pi nini. Ma Rwanunum Sreen diniau Petrus, ma Petrus tiòpan so siat: miat, mananirsiat ma babasiat Israel! amunnanari pi nini na Jesus na Nasaret niè sanòpai, menmun I to na aitabat, bape Alla diònè tindo ja na biòru! na I, sinjontu nini diòsa diteen napèna maso miat. Na Jesus mièser tansemua Slammat! So na dunja kawàsa senpa sensèmuai Slammat na sanò esi ba! Ma mananirsiat sentandoor, so sensajoor sunkabio sunmateit siat ba. Ma sentòpan so sanu: munkabio ma munraniau na Jesus niè sanò pènai! Bape suntòpan so siat: mantaumiati mensanèpaja: tindia te maso Alla: amunkorusaar miat raiwain Alla? amunpa ba amunkabio ba na witoi amunsajoor ma amuntadjawa to. Ma sentoür sanu to baba, sentònè sunbabur, so sensèmuai pisiri ba na sanu senpa senbesiksa sanu; ma senmateit kawàsa kòta, so kawàsa sensajoor pinini to sensèndik Alla.

---

### § 68. Ananias ma Sâfira.

1. Ma siat sensanëtiar Sjen Alla, sensanëpai babera siat; ma teĩ niè raarpai, tiòpan ba: inè nini; bapa tiòpan: amanèwi wura! Ma siat sennè romsi, pibai aniosi, sentawajan si ma senkoor pidikoor maso Rasulsiat abo sentaas si ariri siat senbaro.

2. Ma sinjontu esi, sanò Ananias, ma bwiniempi sanò Sâfira, diwajan rom, ma diniwar rawesi na pidikoor, ma bwiniempi rin i kòta, ma kioor rawesi esi maso Rasulsiat. Bape Petrus tiòpan so i: Ananias! tanè budjawa bilis, ma buawi Rwanunum Sreen, ma buniwar rom pidikoor rawesi? Misoi so au, nuè i ba te? ma buwajan i to, nuè pidikoor ba te? au sanëpaja pinini na sanèmu so? Buawi kawâsa ba, bape buawi Alla! Ma Ananias didjawa kabio nini, tiawa, biòru besiri. Ma katimsiat sentabaan bebòrupai, senkoor i ma sensëra i.

3. Ma papui oras tòru Sâfira riapwir, bape rin barami sawani tanè. Ma Petrus diutan i, tiòpan so i: tuòpan so jau: munrawajan rom na pi munrikoor nini te? Sâfira riar so Petrus: jò! asinini! Petrus tiòpan so i: tanè munsanëpaja babera munrawi Sjen niè Rwanunum? Sujoor! aipaisi na siat sensëra sawamu to, sideriasi aturè to, ma sendama abo sensëra au kòta. Ma Sâfira kòta tiawa ma biòru. Ma katimsiat sendapwir pena, sensajoor biòru to, senba i so wòrira, ma sensera i tuter sawani. Ma siat wura sensajoor ma sentadjawa pi nini, sentandoor, senmateit to baba besiri.

4. Ma muridsiat sennanari pi tandoor pau maso kawâsa. Ma sensanëpai babera siat, ma senmasoi wura tindia na anio rèpon, sentap i Salomo anio rèpon. Ma kawâsa esiat, sendur pibai tuter siat, bape senbehormat muridsiat. Ma kawâsa pau ja sensanëpai Sjen, muansiat ma bwabin-siat borei. Ma senkoor bepòtapaisiat na andio sisè, ma senpir siat na raanpai, abo Petrus riana, niè rwanunum kimadiwan bepòtapaisiat. Ma kawâsa na aniosesi deriasi Jerusalem sendama kòta, senkoor bepòtapaisiat ma kawâsa tuter rwanunum kariria, ma siat wura sentateen ja.

5. Ma Imam baba diòsa, ma mananirsiat sendur tuter i, asianina kòta Sådusesiat, ma senkasjo bewâtan. Ma sentapur Rasulsiat, ma sensoor-bedjoor siat na pandjaran. Bape melaikat na Sjen sièban na diru pandjaran aturè, ma kioor siat so worira to, ma tiòpan: menbabur so Anio Alla, ma mentaniau kabiosi na tenampai bewâtan maso kawâsa. Sentadjawa nini to, kausapa senda so Anio Alla, ma sentaniau

kawàsa. Bape Imam baba ma mananir esiat sendama sendur pena, sensaaw babasiat ma mansaarsiat Israel, ma sentamis hambasiat so pandjaran abo senkooor Rasulsiat. Bape sendama to na pandjaran, sensèmna Rasulsiat ba; sensòbera, ma sentòpan maso babasiat: pandjaran sīoor bewàtan, ma sinjontusiat sentaran sentòsa wòrira deriasi aturè, bape amansèban aturè, Rasul siri nia na rarò ba.

6. Ma Imam baba, ma mananirsiat na Anio Alla, ma mananirsiat na imamsiat, sentadjawa kabiosi nini, senrin ba pi nini tanè! Ma sinjontu siri riama tiòpan so siat: sinjontusiat mensoorbedjooor siat to na pandjaran, sentòsa na Anio Alla ma sentaniau kawàsa! Ma mananir na Anio Alla ria tutur hambasiat so Anio Alla, ma kioor Rasulsiat, bape kibio rina so Rasulsiat, so senmateit kawàsa tòkato senso mananir tuter rëwuki te.

## § 69. Stefanus.

1. Ma kibio Alla biba pena, ma na Jerusalem kawàsa borei sensanëtiaar, ma imamsiat pau kòta sensanëtiaar. Ma abo Rasulsiat sentaniau wënasja, sentiria sinjontu betindia rimmònu abo sensajoriaat kawàsa Kristen senbaro raarpai. Ma siri na sinjontu rimmònu nini sanò Stefanus, sanëtiaar to baba, ma nianari pi tandoor pau, ma diniau kawàsa sensanëtiaar ba, ma senpa ba senbedjooor niè kibio, so biëpande wàtan ma niè Rwanunum Sreen. Inèni esiat sentawi Stefanus, sentòpan so Jehudisiat sennè babapaisiat: amantadjawa to: kibio kariria na Moses ma na Alla! Ma babapaisiat sentadjawa nini, sendur abo senbehukum Stefanus. Ma Stefanus diòsa maso Sanhedrin, babapaisiat sentapon i sensajooor niè rè tapè melaikat niè rè. Ma Imam baba diutan i: witoi sentòpan na au, nini tapèna wàtan te?

2. Inèni Stefanus riar so siat, ma kibio na witoi Alla na Abraham, Isaäk ma Jakob nianari to maso sennè paponpaisiat, ma tanè senkem-bèrei sentadjawa. Ma Stefanus tiòpan so siat: miat, mendumi karakwai! mentadjawa ba! menbedjooor Rwanunum Sreen raria wura! tapè mennè paponpaisiat tapèna miat kòta! Mentamamisiat sentusar Nabi wura ba te? Jò, senmun kòta siat sentaniau siat na Tindiapai nani riama. Ma Tindiapai riama to, miat menmun I to biòru! Miat mensè-mua torat to, bape menkòrusaar torat ba! Ma mananirsiat sentadjawa Stefanus niè kabiosi, senkasjo to baba, sensanèmaas senpa ba pana, ma senkari sendirèmi maso i.



3. Bape Rwanunum Sreen tuter Stefanus, dipon so rora, ma sijoor pi diteen wàtan na Alla, ma sijoor Sjen Jesus diòsa na Alla niè wara wàtan, inèni siaaw: isajoor rorapai sièban, ma kawàsa Aantum diòsa na Alla niè wara wàtan! Bape babapaisiat sentananaar beja, sennòsan sentaragondi, sentapur Stefanus, senpapar i so wòrira bruswa aniose, ma senso i tuter rëwukisi to biòru. Ma siat senso i tuter rëwukisi pena



sentatai sennè sansun, senpir si so katim siri, sanò Saulus, abo sijo-  
riaat si. Ma senmun Stefanus tuter rëwukisi pena, Stefanus siaaw :  
Sjen Jesus! kuor inè rwanunum! ma tiawa to djo, siaaw tuter rau-  
kana baba: Sjen! kusjo siat so tatar nini pënai! Ma tiòpan tapèna  
to, biòru. Ma esiat na kawàsa sensanëtiaar Sjen senkoor Stefanus niè  
tërai, sensëra i, ma sentariori so i. Bape Saulus sanèwèsjeen sijoor  
senmun Stefanus.

## § 70. Mananir na Etiopië.

1. Na rariasi jani sentapur Sjen niè kawàsa na Jerusalem, inèni senbabur Jerusalem, senda so utan Judea ma Samaria; Rasulsiat senmèser senmasoi. Ma Saulus miun sendurpai sreen, tipur muansiat ma bwawinsiat na sennè aniosi, sioorbedjoor siat na pandjaran. Ma napa siat, senbabur Jerusalem, senda, sentaniau Sjen niè kabio maso kawàsa.



Ma siri esi na sinjontu 7 sentiria siat to, sanò Filippus, nia na Samaria. Ma melaikat na Sjen tiòpan maso Filippus: buòsa! ma rua so mirei so raan biaar na Jerusalem so Gasa na utan mumi! Ma Filippus diòsa ma ria. Ma sinjontu bemetan, hamba ma mananir baba na Kandaatse, Radja bwawin na Etiopië, sijoriaat radja niè pigangèna wura, ria to

so Jerusalem abo niadi; ma siòbera ja so niè utan, misoi na niè karèta, ma wiasja surat na Nabi Jesaja.

2. Ma Rwanunum Sreen tiòpan maso Filippus: rua so karèta nini! Ma Filippus ria so i, ma didjawa sinjontu bemetan wiasja surat Jesaja. Filippus diutan i: ruin kòta te witoi wuasja? Ma riar so Filippus: esi diniau jau ba! tanè irin nini? Ma siaaw Filippus sia karèta ma misoi tuter i. Ma wiasja na surat tapèna: „I tapè domba, senkoor I abo senmun I; ma tapè domba aantum senkiaar niè tumpai, kibio ba, tapèni kòta bia niè sòrè ba.” Ma mananir tiòpan maso Filippus: tuòpan so Jau, Nabi kibio na tei, na mitauni te, na sinjontu esi te? Ma Filippus kibio papon na surat nini, inèni diniau i na Sjen Jesus.

3. Ma sunda pana, sundama so kambo esi. Ma mananir tiòpan so Filippus: sujoor kambo! witoi bidjoor Masi Sreen na jau rami te? Ma Filippus riar so i: au sanètiaar te tuter panèmu betutira, nani suèmua Masi Sreen kòta! Ma mananir riar so i, tiòpan: isanètiaar: Jesus Kristus anina Alla Aantum! Inèni biprenta karèta minau; ma sunbaar awaab so kambo, ma Filippus diònè Masi Sreen so i. Ma sunkeirarè to, Rwanunum Sreen kioor Filippus bruswa sinjontu bemetan, sijoor Filippus ba pana, bape ria ja raanpai, ma sanèwèsjeen to baba.

---

## § 71. Tanè Rasul Paulus betobat.

1. Saulus, kiapiap kawàsa sensanètiaar Sjen Jesus, tiò miun siat; ma siaaw surat na Imam baba, kioor i maso Jehudisiat na aniose Damaskus sennè mananirsiat, abo esiat na siat sensanètiaar Sjen Jesus senna na Damaskus, muan te, bwawin te, nani tipur ma diabit siat, ma kioor siat so Jerusalem. Ma sièmua surat to, ria so Damaskus. Ma riama pena deriasi Damaskus, besiri sasaar na rora besasaar i, ma tiawa to djo, didjawa raukana siri, siaaw so i: Saul! Saul! busar Jau so? Ma Saulus tiòpan: tei au Sjen? Ma Sjen riar so i: Jau Jesus busar Jau! rumu misoi kirakwai wènasja anina sinsoom maso au. Ma Saulus miteit ma tindoor besiri, tiòpan: Sjen! muajar inanari witoi? Ma Sjen tiòpan so i: buòsa! ruapwir aniose! ma na wana nani budjawa witoi nani nunari. Ma siat sendausaar Saulus sentandoor, sentadjawa raukana bape sensajoor sinjontu siri ba. Inèni

Saulus diòsa, siwu rè, bape rèpupui pena, ma sèndut i, senkoor i so Damaskus. Ma Saulus misoi rèpupui, ma diaan ma diunum pibai, raria tòru.

2. Mu murid esi nia na Damaskus, sanò Ananias. Ma Sjen siaaw i, tiòpan so i: Ananias! Ma Ananias riar so Sjen: „Jau Sjen! Ma Sjen tiòpan so i: buòsa! ma rua so raanpai sentap i: raanpai tindia, ma suaaw na Judas niè anio sinjontu esi, sanò Saulus na Tarsen,



so niadi pena. Ma Saulus rin pena nani esi riama so i ma waratawan i abo sijoora ja. Bape Ananias tiòpan so Sjen: Sjen! idjawa to na kawàsa pau: sinjontu nini nianari kariria maso nuè kawàsa sreen na Jerusalem, ma kioor surat na Imam baba, abo tipur na aniose nini kawàsa wura sensanètiaar ma sensanèpai Au! Bape Sjen tiòpan so Ananias: rua sarèdjeu! jiria sinjontu arapai to abo diniau na Jau kawàsa karwaar, ma radjasiat ma kawàsa Israel. Ma nani Iberwana so i

sièmua marioor toi so Inè sanò. Inèni Ananias ria so Saulus, wiarátawan i ma tiòpan so i: Saulus! manèta! Sjen dimis jau so au abo sujoor ja, ma abo suèmua Rwanunum Sreen. Ma besiri tiawa bruswa niè rè pi tapè nuna, inèni sijoor ja. Ma diòsa pena, sièmua Masi Sreen. Ma diaan pi to, pia ja. Inèni diniau Jehudisiat na sennè anio hari, diniau siat: Jesus Kristus anina Alla Aantum. Bape Jehudisiat senkasjo i, sentò senmun i, sentaramaan i na aturèsi na aniose. Bape Sjen niè muridsiat sentuter i, diru sentu i tuter waipai na aniose niè waarrèwuki, ma tapèna Saulus bibur. Ma Saulus ria so Jerusalem so Sjen niè muridsiat, bape senmateit diawi siat. Bape Barnabas kioor i so Rasulsiat, ma tiòpan so siat tanè Sjen kibio so Saulus, ma tanè Saulus diniau to na Damaskus: Jesus anina Kristus. Ma na Jerusalem kòta Saulus diniau na Sjen Jesus. Bape Jehudisiat senkasjo i, sentò senmun i, amana manètasiat senkoor i so Kaitsarea, sentamis i so Tarsen.

---

## § 72. Eneas ma Tabita, sentap i kòta: Dorkas.

1. Rasul Petrus ria so aniose pau pena, riama kòta so kawàsa sensanètiaar Sjen senna na Lidda. Ma na Lidda sinjontu siri, sanò Eneas, biata to taun rimtòru, riamoja ba, Ma Petrus tiòpan so i: Eneas! Jesus Kristus nianari au buteen ja! buòsa! kuoor nuè andio sisè! Ma Eneas diòsa besiri. Ma kawàsa wura na Lidda ma Sarona, sensajoor i, sensanètiaar Sjen.

2. Ma bwawin rina esi nia na Joppe, sanò Tabita, sentap i kòta Dorkas; bwawin nini nianari pi diteen pau, ma sanèpai kawàsa senbaro. Ma raria siri piòta ma biòru, ma senroram i to, senpir i na anio rarò. Ma Joppe deriasi Lidda; ma muridsiat sentadjawa Petrus nia na Lidda, sentamis sinjontu mònu so i, sunsaaw i, riama seïra. Ma Petrus diòsa ma riausaar sanu, ma senkoor i so anio rarò bebòrupai biata na, inarisiat wura 'sentòsa jana, senseis, ma senberwana maso Petrus sansunsi Dorkas mitauni diawar si maso siat. Bape Petrus dimis siat wura so wòrira pana, disan aibu ma niadi; ma dipon bebòrupai tiòpan so i: Tabita! tundo! Ma Tabita siwu rè, sijoor Petrus pana, tindo. Ma Petrus riutawan i, diònè Tabita diòsa, ma siaaw kawàsa Kristen, ma

inarisiat, ma biërwana Tabita maso siat tienam ja. Ma sentadjawa nini na Joppe betutira, ma kawàsa borei sensanëtiaar Sjen. Ma Petrus misoi diru pau na Joppe tuter Simon, tukang sàpi rawa.

### § 73. Offisir Kornelius.

1. Na aniose Kaitsarea anina offisir na soldadu Italië utin, sanò Kornelius, kiðrusaar ma sanëpai Alla, ma kawàsa wura na niè anio tuter i. Ma Kornelius sanëpai kawàsa senbarò tuter niè raarpai; ma tawana niadi bepau maso Alla. Ma raria esi niadi ja na oras tòru rawiniena, sijoor melaikat riama so i, ma tiòpan so i: Kornelius! Ma Kornelius dipon i, miteit to baba ma tiòpan: buòtò Sjen! Melaikat tiòpan so i: Alla sanëpaja pana tapè nuadi so I, ma tanè au sanëpai kawàsa senbarò. Bumis sinjontusiat so Joppe, abo sensaaw Simon, sentap i Petrus, misoi tuter Simon, tukang sàpi rawa, niè anio diòsa deriasi sasi dirè, nani diniau au nani nunari witoi. Melaikat bibur to, Kornelius siaaw hamba mònu tuter soldadu siri sensanëtiaar Alla, ma dimis siat so Joppe.

2. Ma senda pana, saar sendama deriasi Joppe na raria worabwan, Petrus nia na anio babopai abo niadi. Ma Petrus bibisi pena, sanèwès-jeen diaan pi, ma senraan pisjaan so i, kabò sijoor pisiri tapè dienamia, bape diena ba; sijoor rora sièban, ma tapè sentu sèraui sisè baba, senkasjees i tuter wai na samabu at. Ma sentu i to, Petrus sijoor rarò, ma sijoor na sisè rarò: pimuna wura tuter aipai at, ma pimuna pisabir, ma pimuna sianiaar, ma ajasi. Ma didjawa raukana esi, tiòpan so i: Petrus! buòsa! mun ma buaan pi! Bape Petrus tiòpan: Sjen! mojar! jaan ba pi kariria ma pi niè wòri! Bape raukana riar so i: witoi Alla besreen to, buap i pi niè wòri pènai! Ma raukana kibio tapèna betòru maso Petrus, ma Petrus riar kòta tapèna to betòru; keis, sijoor sèraui tapè sensèraap i ja so rora, mirièer.

3. Ma Petrus sanëpaja rami witoi sijoor ma didjawa to, Kornelius niè hamba sentòsa na anio niè aturè, sentutan: Simon, sentap i Petrus, nia na anio nini te? Ma Rwanunum Sreen tiòpan so Petrus: sinjontu tòru sendama to, sensaaw au, buòsa! buaar so siat, ma ruausaar siat! miteit pènai! so Jamis siat maso au. Ma Petrus ria so siat ma tiòpan so siat: janina, mensasèrei jau, mendama na toi ma mendama so? Ma

sentòpan nini to so i, Petrus siaaw siat sendapwir anio, senmasoi tuter i. Ma kausapa Petrus riauxaar siat so Kaitsarea. Ma Kornelius riur niè kawàsa ma niè manètasiat dinòta siat. Ma sijoor Petrus riama pena riabedjoor i ma disan aibu so i. Bape Petrus tiòpan so i: mojar! buòsa! jau kòta sinjontu wenasja. Inèni Kornelius tiòpan pi wura maso Petrus; keis, tiòpan so Petrus: Alla sijoor amandur wura abo amantadjawa witoi Sjen Alla biprenta so au.

4. Inèni Petrus tiòpan: wàtan! kabò idjawa ma isajoor to: kawàsa wura masis babera maso Alla! ma Alla sanèwèsjeen siat wura senkòru-saar I ma sentenam tindia. Alla direr kabio nini maso kawàsa Israel: dame na Jesus Kristus, Sjen na kawàsa wura. Ma amat wura besajora witoi nianari to na utan Jehudi ma na Jerusalem. Senmun I to, sentabakiri i na aitatat, biòru. Bape Alla diònè tindo to na biòru na raria betòru. Ma mitauni biprenta amat amantaniau kawàsa ma amantòpan so siat: Alla diònè so I: nani biehukum kawàsa sentenam rami ma senbòru to. Nabisiat wura sentaniau to na I: tei sanètiaar I, sièmua maaf na tatar so niè sanòpai. Ma Petrus kibio tapèna rami, siat wura sentadjawa i, sensèmua Rwanunum Sreen, ma sensènendik Sjen. Ma Jehudisiat sensanètiaar Sjen, sendausaar Petrus, sentandoor, so sensajoor: kawàsa karwaar kòta sensèmua Rwanunum Sreen. Ma Petrus tiòpan: siat sensèmua Rwanunum Sreen to tei pia bedjoor siat, sensèmua Masi Sreen kòta? Ma sensèmua Masi Sreen to, sensaaw Petrus tuter niè manètasiat senmasoi raria esasi rami tuter siat.

#### § 74. Petrus siubi na pandjaran.

1. Na rariasi jani radja Herodes tipur esiat na Sendurpai Sreen, tiò miun siat, ma pièran Jakobus, Johannes babai. Ma sijoor pena Jehudisiat sensanèwèsjeen nini, tipur Petrus kòta, deriasi festa Paska, ma sioorbedjoor i na pandjaran, ma biprenta: sentaran i tuter biaranpai at, biaranpai siri anina soldadu at. Ma Herodes tiò: festa Paska keis nani miun Petrus. Ma Petrus nia na pandjaran pana, kawàsa Kristen senmènu ba sennadi maso Alla so Petrus.

2. Ma Herodes tiò: kausapa nani miun Petrus. Ma diru Petrus dièna rabwan soldadu mònu, sentabit i tuter rante mònu, ma soldadu esiat sentaran aturèsi na pandjaran. Ma Petrus dièna pana, melaikat

na Sjen diòsa so i, ma niè sasaar besàsaar pandjaran rarò; ma biaun Petrus niè sanèkasin, diònè tindo, tiòpan so i: buòsa seira! Ma rante sanu sumarera bruswa niè wara. Ma melaikat tiòpan so Petrus: puusanèmu au! kusjees soraiwaan, susun au, ma ruausaar Jau. Ma Petrus nianari tapè melaikat tiòpan so i, riausaar i, bape sanèpaja diènamia wénasja. Ma suwar to biaranpai bepapon ma bemònu, sundama so aturè bena wòrira, sennanari i na sumbeer tèrai. Ma aturè nini kòta tisèban na mitauni. Ma sunsubi to, sunda na raanpai siri rami, ma kabò besiri melaikat mirièer bruswa Petrus.

3. Inèni Petrus tindoor bewàtan, tiòpan: kabò irin Sjen dimis niè melaikat, kioor jau bruswa Herodes ma Jehudisiat. Ma diòsa, sanèpaja sasera ria so toi. Ma ria so Johannes Markus sinjani nie anio, napa kawàsa Kristen sendur sennadi pena. Ma Petrus pira aturè, hamba bwawin, sàndò Rode, ria abo didjawa: tei pira. Ma didjawa Petrus niè raukana, sanèwèsjeen, bape piro sièban aturè, dipai so anio rarò, tiòpan: Petrus riana to! Bape sentòpan so i: pibai! niè rwanunum te. Bape Rode riar: wàtan! Petrus anina! Ma Petrus minau ba pira aturè to sensèban so i. Ma sensajoor i, sentandoor to baba. Ma Petrus waratawan siat sensisi, tiòpan so siat tanè Sjen kioor i bruswa pandjaran; inèni diniau siat: sentatòpan nini so Jakobus, Sjen Jesus madjawi, ma maso manètasiat. Ma Petrus bibur siat, ria so aniose esi.

---

### § 75. Paulus ria, abo dinian kawàsa karwaar.

1. Na aniose Antiokiè, sentap papon Sjen niè muridsiat: Kristensiat. Ma asijana nabisiat ma panditasiat esiat. Ma Rwanunum Sreen diniau siat, tiòpan: mentamis Paulus ma Barnabas abo sennanari witoi isaaw na sanu. Ma sentaan pi ba to diru, ma sennadi to, senbeberkat sanu, ma sentònè sunda. Ma sunda so Seleusiè, sunrot kàpal, dipai so nu Siprus, ma sunbaar to na nu, sunda to aniose Salamis napa sunraniau kawàsa na Sjen.

2. Inèni sunda so rawa wana na nu to aniose Pafos. Ma Jehudi esi nia na Pafos, sanò Barjesus, bièindèri, sentap i Élimas (anina: pande) misoi tuter Resident Sergius Paulus, i ma bièpande. Ma Resident siaaw Paulus ma Barnabas, so sanèwèsjeen didjawa Sjen niè kabio na sanu. Bapa indèri kièmberei nini, sisèrei bidjoor Resident, miteit nani



Resident sanëtiar Sjen. Bape Paulus dipon indèri, tiòpan so i: au, sjètan aantum! buawia ma puoras wënasja, kuëmberei pi tindia wàtan! nani mënau ba te budjoor Alla niè nanaripi? Sjen niè warapai bidjoor au! rèmu supupui, nani wòroi sujoor sasaar ba pana! Ma besiri sijoor mojaba, ma sisèrei esi riut i ma kioor i. Ma Resident sijoor nini, tindoos so Alla niè kabio, ma sanëtiar pana.

3. Inèni Paulus ma siat sendausaar i senbabur aniose Pafos, sentapai so aniose Pergè na utan Pamfilië. Ma na raria hari sendur tuter Jehudisiat na anio hari. Ma esi wiasja Torat ma surat Nabisiat to, mananir na anio hari diutan siat, tiòpan: manëtamiat! mennè kabio diteen maso kawàsa nini te, mentòpan i sarèdjeu! Ma Paulus diòsa tiòpan so siat: miat kawàsa Israel, ma miat mensanëtiar Alla, mentadjawa! Sjen Alla na Israel nianari to witoi tiòpan to maso tannè bepaponpaisat, diòne Jesus, Djuru Slammat riama to na usapui Dafid. Ma Paulus diniau siat na Sjen Jesus, tanè senmun I to biòru, bape tindo, ma tanè siat sensanëtiar Djuru Slammat, sensèmua maaf na sennè tatar. Ma Paulus diniau mënau to, ma Jehudisiat senbabur anio hari to, kawàsa karwaar sensaaw Paulus diniau siat kòta. Ma inèni pau na siat sensanëtiar! Bape Jehudi esiat sensanëtiar ba, senkasjo Paulus ma Barnabas, ma senkabio bedjoor sanu. Bapa sun-tòpan so siat: amunkabio papon so miat, bape mensanëtiar ba, ma menkëmberei mentadjawa, amunda amunraniau kawàsa karwaar! Ma Jehudisiat kariria sentusar Paulus ma Barnabas inèni sunda so Ikonië.

## § 76. Paulus na aniosesi Ikonië, Listrë ma Derbë.

1. Na anioso Ikonië Paulus ma Barnabas sunraniau na Jehudi sennè anio hari. Ma Jehudisiat, ma kawàsa Hellas pau, sensanëtiar Sjen. Ma raria pau sunraniau na jana; ma Sjen mitauni tiuter sanu, sunpa sunnanari pi tandoor pau. Ma kawàsa sentaas siat: esiat sentadjawa so Jehudi sensanëtiar Sjen ba, esiat sensanëtiar witoi Paulus ma Barnabas sunraniau siat. Ma siat sensanëtiar ba, sendur, sentò senmun Paulus ma Barnabas. So nini sunda so aniose esasi sanò Listrë, ma Derbë na utan Likaonië, ma sunraniau na jana kabio Sjen maso kawàsa. Ma sinjontu ria mojaba na Listrë, niè aipai supa ba na sinjani diawin i, misoi ma didjawa Paulus. Ma Paulus dipon i, ma

sijoor sanëtiaar nani diteen, tiòpan to baba so i: buòsa to tindia na aimu! Ma diòsa besiri ma ria. Kawàsa sensajoor pinini pana, sensaaw to baba na kabio Likaonië: Allasi senbaar mèso tapè sinjontusiat! Ma Barnabas sentap i Jupiter, ma Paulus sentap i Mercurius, so Paulus kibio. Ma imam na Jupiter na aniose Listrè kioor sapisì ma mirandin, tiò niunum soom so sanu. Bape Barnabas tuter Paulus sunradjawa pinini, sunsabù sunnè sansun, sunrapai rabwan kawàsa, sunsaaw: sinjontumiat! mennanari tapèna so? Nanu sinjontu wènasja tapè miat! ma amunraniau miat: mensòbera miat beruswa pi sarèdjeu nini so Alla tiënam, nianari rora ma utan, rawanam ma pi wura na rawanam rarò? Alla nini sanèpai tatat ma diniau tatat. Ma katu sunpa ba sunbedjoor kawàsa. Inèni Jehudisiat na Antiokië ma Ikonië sendama pana, sentaninau kawàsa: senmun Paulus. Ma senso i tuter rëwukisi to biòru tòpara. Ma sentòpan biòru to, senpapar i so aniose wòrira. Bape muridsiat sendama, sentòsa wariri i, diòsa ja, ma riapwir aniose ja. Bape kausapa Paulus ma Barnabas sunda so Derbë; keis, sunsòbera so Listrè, Ikonië ma Antiokië, sunraniau muridsiat abo sensanëtiaar bewàtan, ma tanè tanpa tandapwir Karadjaän Alla na marioor ma susa wenasja. Ma na sendurpai Kristen wura suntiria senbetindia esiat be babapaisiat. Ma sunnadi tuter Kristensiat, sentòpan slamat so siat, ma sunbabur. Inèni sunrot kàpal, sunda so Antiokië na utan Sirië. Ma sundur to tuter kawàsa Kristen, suntòpan usara so siat tanè Sjen tiuter sanu to, ma tanè Sjen diònè kawàsa karwaar kòta sensanëtiaar I.

---

**§ 77. Paulus ria bemonu, ma ria so Filippi, Tèsalonika ma Berea.**

1. Paulus tiò ria ja abo sijoor ja kawàsa Kristen diniau siat to, ma Silas tiuter i. Ma sunsajoor siat ma sunraniau siat to, inèni sunsanèwè-sjeen sunraniau kawàsa karwaar na utan Asië. Bape so Rwanunum Sreen bidjoor sanu, sunda to Troas. Ma na diru Paulus sijoor pi tapè sinjontu Masèdonië diòsa so i ma tiòpan so i: ruama so amat na Masèdonië ma buniau amat! Tapèna Paulus rin pena: Sjen siaaw i ria so Masèdonië, abo diniau Masèdoniësiat na Sjen. So nini sunda, sunrot kàpal. Inèni sundama na Masèdonië to, sunda so aniose Filippi. Ma bwawin Jehudi

esi nia na Filippi, sanò Lidia, didjawa so Paulus ma sanètiaar Sjen, inèni siaaw Paulus ma Silas sunna na niè anio.

2. Ma na Filippi anina women bwawin, bièindèri, ma siat sennè women nini, sensèmua raarpai pau, so bièindèri. Ma bwawin nini sijoor Paulus ma Silas sunda na raarpai na aniose, siaaw: sinjontu sanu nini asianina Alla wàtan niè hamba! sunraniau amat tanè amampa amansèmua slamat! Ma tapèna siaaw raria esasi. Bape Paulus kiëmbèrei nini, diòsa ma tiòpan maso bwawin niè rwanunum kariria: na Sjen Jesus Kristus niè sanò ibeprenta au: bubur bruswa bwawin nini! Ma rwanunum kariria bibur bruswa bwawin. Bape siat sennè bwawin, sensajoor bièindèri mènau to, senkasjo, sentapur Paulus ma Silas, senkoor sanu maso mananirsiat na aniose, sentòpan: sinjontu sanu nini sunrònè amanbekariria! Jehudi sanu! ma sunraniau buwai kariria maso amat Romèamat. Ma kawàsa kòta senkasjo sanu. So nini mananirsiat inèni sensabu sansun beruswa Paulus ma Silas, senbeprenta senrora sanu. Ma senrora sanu to kariria, inèni sensorbedjoor sanu na pandjaran rarò, ma senbeprenta mananir na pandjaran: diabit sanu tuter aipapa. Ma Paulus ma Silas sunroi ranusi na pandjaran rarò, sunsèndik Sjen; ma esiat, senna na pandjaran, sentadjawa so sanu. Ma diru rabwan mundia baba besiri miun aniose, pandjaran minindi tòrò, ma aturèsi wura sitisèban, ma aipapasi simarera. Ma mananir na pandjaran tindo, ma sijoor aturèsi sisèban wura, miteit senna na pandjaran rarò sentapaira senbabur to, piaat niè njoikòroos, tiò miun mitauni. Bape Paulus siaaw to baba so i: Mun mantaunau pènai! amanwura amanmasoi! Ma mananir siaaw padamara, ma sijoor: siri bibur ba, ririorar, ma disan aibu so Paulus ma Silas. Ma kioor sanu so wòrira, diutan so sanu: Tuan rina manu! nani inanari witoi abo isèmua slamat! Ma sundaar so i: sanètiaar Sjen Jesus Kristus, ma nani suèmua slamat, au ma kawàsa na nuè anio! Inèni kioor sanu so niè anio, ma rioram sunnè kaporsi, ma diru sunraniau Sjen niè kabio so i ma niè kawàsa. Ma sunrònè Masi Sreen so i ma niè kawàsa. Ma mananir diònè pisjaan so sanu, ma sanèwèsjeen to baba so mitauni ma niè kawàsa sensanètiaar Sjen pana.

3. Ma kausapa pena mananirsiat na aniose sentarer so mananir pandjaran: ruera sinjontu sanu, sunbabur sarèdjeu. Bape Paulus tiòpan so mananir pandjaran: mojar! senrora sarèdjeu sinjontu Romè nanu, ma sensorbedjoor nanu na pandjaran ma kabò sentòpan: munbabur sarèdjeu? mojar! bape mantaunsiat sendama so nanu ma senkoor nanu! Ma mananirsiat sennè hampa siòbera so siat, tiòpan so siat witoi

Paulus tiòpan to. Sentadjawa kabiosi nini, senmateit, so sentadjawa Paulus ma Silas sinjontu Romè sanu. So nini senda so pandjaran, senkabio rina so sanu, ma sensaaw sanu: sunbabur. Ma sunda sunsajoor Kristensiat ma sunkabio tuter siat, keis, sunda. Ma sunda so aniose Tèsalonika, napa Jehudisiat sennè anio hari esi. Ma tapè ririn pana, Paulus diniau Jehudisiat na surat Refo: tanè Kristus titaar sièmua marioor, ma biòru, ma tindo na biòru. Ma Paulus tiòpan so siat: Jesus anina Kristus. Ma esiat na Jehudisiat sensanètiaar, bape pau senkòrusaar ba, sensaaw kawàsa kariria senmun Paulus. Bape siat sensanètiaar senkoor Paulus ma Silas na diru so aniose Berea. Ma na Berea sunda kòta so Jehudisiat sennè anio hari. Ma Jehudisiat na Berea senrina raiwain siat senna na Tèsalonika, sentadjawa so Paulus, ma tawana sensasèrei tatoa na Surat Refo: Paulus diniau tindia te. Ma pau na siat sensanètiaar pana. Bape Jehudisiat na Tèsalonika sentadjawa: Paulus diniau na Berea kòta, sendama so Berea, ma sentaninau kawàsa karwaar senkasjo Paulus ma Silas.

## § 78. Paulus na Atenë.

1. Inèni Paulus mièser ria so aniose Atenë. Ma tawana diniau Jehudisiat na sennè anio hari ma kawàsa Atenë na pàsar. Ma esiat na kawàsa pande senbarirui tuter Paulus. Ma Paulus diniau siat na Sjen Jesus, ma tanè Sjen tindo; so nini sentòpan: sinjontu kibio sasera, nini tiòpan witoi? diniau na Alla ambeer te? Ma senkoor i so utan esi, sanò Areopagus, napa babapaisiat sendur; ma sentòpan so i: amansanèwèsjeen amantadjawa pi babòru witoi buniau.

2. Ma Paulus diòsa rabwan siat, tiòpan so siat: miat, Atenëmiat! isajoor to: mensanètiaar allasi pau mò! jò! isajoor na mennè aniose wabusoom siri, senbui na i: maso Alla tanrin i ba. Alla nini, menrin I ba, bape mensoom I, jiniau miat na I! So Alla nini nianari to dunja ma pi wura nia na dunja. I anina Sjen na rora ma na utan! nia ba na aniosi tapè kawàsa sennanari si, ma titaar ba kawàsa sensoom I! so mitauni diònè tantenam ma tansasen, ma diònè pi wura so tatat. Na tamani ma sinjani siri wènasja nianari tatat wura abo tanna na dunja betutira, ma biprenta tanna na toi abo tansasèrei Sjen; so misoi na wiariou ba na tatat! So na I tantenam ma tanmasoi! Tapè esiat na

mennè kawàsa pande sendoi to, sendoi: tatat Alla niè usapui! Tatat, Alla niè usapui pana, tansanèpaja pènai: Alla nini tapè karwaar sennanari i na brawen te, na sèrak te, na rëwuki te, na pi esi te, tapè kawàsa senririn sennanari si! Alla kisjo ba pana amamò na papon tanparo I to, so kabò diniau kawàsa wura: sensòbera na sennè tatar, ma direr pana: na raria siri sinjontu siri nani biehukum tindia kawàsa wura na dunja, diria sinjontu nini to, ma bièrwana I to, so diònè tindo to na bièru.

3. Sentadjawa pena bebèru tindo, esiat sensòrèpeso Paulus, ma esiat sentòpan so i: nani raria esi amantadjawa au ja na pi nini! Bape asiana kòta esiat sentuter Paulus, ma sensanètiaar pena; siri na siat mananir esi, sanò Dionisius, ma bwawin siri sanò Damaris.

### § 79. Paulus na auiose Korintë.

1. Inèni Paulus ria so aniose Korintë, napa sièmua Jehudi esi, sanò Akwila tuter bwinieempi Prissilla, sundama na Romë so Korintë, so kaitser Klaudius diatar Jehudisiat bruswa aniose Romë. Ma Paulus misoi, ma nianaripi tuter Akwila, so sanu tukang jaba sisè. Ma raria hari wura diniau Jehudisiat na sennè anio hari, Jehudisiat ma kawàsa Hellas. Inèni Silas ma Timoteüs sundama to so Paulus na Masèdonië. Inèni Rwanunum Sreen diònusaar Paulus diniau Jehudisiat: Jesus anina Kristus! Bape Jehudisiat senbedjoor i ma sensòrèpèso i, Paulus tiòpan so siat: mantaumiat! inè tatar ba! inèni jiniau kawàsa karwaar! Ma bibur siat, ma diniau na Justus niè anio, anio nini diòsa na Jehudi sennè anio hari dirèpai. Bape Krispus, mananir na Jehudi sennè anio hari, sanètiaar Sjen, mitauni tuter niè kawàsa. Ma Korintësiat pau sentadjawa Sjen niè kabio ma sensèmua Masi Sreen. Ma diru siri Sjen tiòpan so Paulus: muteit pènai! asisi au pènai! buniau wènasja! so Ituter au, ma nani siri miun au ba! so Inè kawàsa pau rami na aniose nini.

2. Bape raria esi Jehudisiat senkoo Paulus maso Resident, sanò Gàlio, sentòpan: sinjontu nini diniau kawàsa senkòrusaar Alla, bape pibai tapè amannè prenta. Bape Resident Gàlio tiopan so Jehudisiat: esi nianari pi kariria rëto, idjawa so miat Jehudimiat! Bape menbarirui na kabiosi, ma na sanòpasisi, ma na mennè prenta, ikembèrei idjawa miat! Ma diatar siat, inèni kawàsa Hèlas senrora Sostènes, mananir esi na Jehudisiat, bape Gàlio bidjoor siat pibai.

3. Ma Paulus misoi na Korintë taun siri tamuan to, tiòpan tabea maso kawàsa Kristen, ma i tuter Akwila ma Prissilla sendot kapal, senda so aniose Efèsë, napa ria so Jehudisiat sennè anio hari, ma kibio so Jehudisiat. Ma sensaaw i misoi tuter siat, bape tiòpan so siat: papon ira maso festa na Jerusalem, ma nani Alla miajar te, nani itabera so miat. Ma Paulus diòt kàpal to Kaitsarea, ma ria so Jerusalem. Ma sijoor Sendurpai Sreen to, bibur ja so Antiokië, napa misoi wòroi ba, bape ria ja, sijoor ma kibio so kawàsa Kristen senna na utan Galatë ma Frigië.

---

### § 80. Paulus na aniose Efèsë.

1. Paulus riama so aniose Efèsë, diniau taun mònu na karadjaän Alla; ma Jehudisiat, ma kawàsa Hèlas na Efèsë, ma siat senna na utan Asië sentadjawa na Sjen Jesus. Ma Sjen diònë so Paulus pia nianari pi tandoor pau, ma diònë kòta kawàsa pau sensanëtiaar pana.

2. Ma tukang sèrak esi nia na Efèsë, sanò Demetrius, nianari ma diwajan aniosi katu arari karwaar bwawin Diana niè anio na Efèsë; ma tukang sèrak pau sentuter i, ma sensèmua tapèna pigangèna pau. Ma sensajoor: kawàsa pau sensanëtiaar karwaar ba pana, Demetrius siaaw tukangsiat na pi karwaar, ma sendur to, tiòpan so siat: manèta-miat! mensajoor ma mentadjawa to tanè Paulus diniau kawàsa Efèsë, ma kawàsa Asië wura: karwaarsi asiana Allasi ba! ma tapèna senkem-bèrei si. Bape tapèna nani amanbekariria wènasja ba, bape kòta kawàsa nani sensanëtiaar ba pana Allabwawin baba Diana, to kabò utan wura sensoom i to, nani senbehormat i ba pana! Ma Demetrius kibio tapèna pena, siat wura sendur so i sensanèmaas, sensaaw to baba: Diana na Efèsë biba wàtan! Ma kawàsa wura na aniose sentadjawa siat, esiat kòta sensaaw to baba tapè siat, bape senrin ba sensaaw so, senda sasera, ma sensawaüri, oras mònu sensaaw sarèdjeu: Diana na Efèsë biba wàtan! Bape mananir na aniose Efèsë kibio so siat ma diniau siat, sensisi senbabur pena, mènau to.

3. Inèni Paulus siaaw kawàsa Kristen, sendur so i, tiòpan tabea so siat, ma ria so Masèdonië. Ma sijoor kawàsa Kristen to, inèni ria so utan Hèlas, ma misoi jana sembiai tòru; keis, diot kàpal abo misoi na festa Pentakosta na Jerusalem.

4. Kàpal diboi na Miletè, inèni Paulus direr kawàsa Kristen na Efèsè, tiò sendàma so i. Ma sendama to, tiòpan so siat: ira so Jerusalem pana, ma irin ba nani jau tanè, so na aniose wura Rwanunum Sreen bièrwana nani sentabit ma senbemarioor jau; bape imateit ba, ma isanèpai beja mantaunja ba, abo ipa inanari inè nanaripi to keis tuter sanèwè-sjeen. Bape irin: nani mensajoor jau ja ba, so nini mentaran ma memparo pènai tanè jiniau miat taun tòru, diru ma raria imè nau ba, ma tanè ibemarioor jau kòta. Ma kabò, jò manètamiat! isaaw slamat na Alla maso miat, abo mensanèpaja tawana so Sjen niè kabio. Ma Paulus kibio to mènau, inèni disan aibu tuter siat wura, ma niadi tuter siat. Ma senseis wura, sensanèpai i, ma sentapurtawan Paulus, sensum i, sentòpan tabea so i, senkoor i so kàpal. Ma senbesusa to baba, so tiòpan to so siat: nani sensajoor i ja ba pana!

### § 81. Paulus na pandjaran na Kaitsarea.

1. Paulus riama na Jerusalem, Jakobus ma Kristensiat sennè bapa-paisiat sendur pana. Inèni Paulus tiòpan tabea so siat, ma tiòpan usara so siat witoi Sjen nianari to tuter i rabwan kawàsa karwaar. Ma sentadjava nini to, sensènendik Sjen. Bapa raria esi Jehudisiat na utan Asiè sensajoor Paulus na anio Alla, sentònusaar kawàsa sentapur Paulus, sensaaw so siat: he! sinjontu Israel miat! mendama! sinjontu nini aninini diniau na utan wura, kibio kariria na amannè kawàsa, ma na Torat, ma na Anio Alla! Ma sentadjava nini, sentandoor, sundur, sentapur Paulus, senpapar i so Anio Alla wòrira ma sensoor aturèsa na Anio Alla, sentò senmun i. Bape offisir na kòta didjava sensawaüri, dipaira tuter soldadusiat so siat. Ma Jehudisiat sensajoor offisir tuter soldadusiat sendama, senrora Paulus senmènau pana. Ma offisir biprenta soldadusiat sentabit Paulus tuter rante mònu, ma diutan Paulus: senkasjo au so? Bape so kawàsa sensawaüri beja, didjava tindia ba, ma miteit tòkato kawàsa sentò mamun, biprenta senkoor Paulus so kòta rarò. Ma sensaji atè so kòta, katu senpaba senda, so kawàsa senkepan, senkòtar beja, sensaaw: menmun i! Bape na diru Sjen diòsa tuter Paulus, tiòpan so i: muteit pènai Paulus! tapè buniau to na Jerusalem, tapèna kòta nani buniau na aniose Romè!

2. Ma Jehudi sura be at (40) sendur na kausapa, sentòpan nani senmun

Paulus; sensawora sentaan pi ba ma sentunum pibai to senmun Paulus to biòru to. Bape Paulus anòpai didjawa nini, ria so Paulus ma tiòpan i maso Paulus. Inèni Paulus siaaw offisir esi, tiòpan so i: koor katim nini maso offisir baba, so katim nini tiòpan pi esi so i. Ma offisir koor Paulus anòpai maso offisir baba, tiòpan so i: Paulus, aman-soorbedjoor i, siaaw so jau i koor katim nini maso au. Ma offisir baba koor katim mièser i, diutan i: sanèwèsjeen tuòpan witoi maso jau? Katim riar so i: Jehudisiat nani sensaaw so au: buòñë saar Paulus riana so siat abo sentadjawa i; bape sanëtiaar siat pënai! sentawi wénasja! senpau raiwain sura be at sensawora to: sentaan pi ba ma sentunum ba to senmun Paulus to biòru to. Ma offisir baba didjawa pi nini to, siaaw offisir mònu, biprenta sanu, tiòpan so sanu: na rawiniena oras rimat soldadu sennè sanainjoi senbe utin be mònu (200) ma soldadu biana senbe utin be mònu, ma soldadu senbesa na kuda senbe sura be rimmònu (70) senbemasis siat pena, abo senkoor be wès-jeen Paulus maso Resident Feliks na Kaitsarea! Ma tapèna senkoor Paulus so Kaitsarea maso Resident. Ma Resident diòñë sensorbedjoor i, ma didjawa Jehudisiat to, ma didjawa Paulus kòta, sanëtiaar nani Paulus niè manètasiat senbait kumpang so i abo riera Paulus, ma tapèna Paulus misoi taun mònu na pandjaran na Kaitsarea. Bape niè manètasiat senpa sendama so i, Resident biprenta senbedjoor siat ba sensajoor Paulus.

3. Ma Resident babòru Festus riwani Feliks. Ma Jehudisiat sensaaw so Resident: diòñë Paulus so siat abo senbehukum i. Ma Resident diutan Paulus sanèwèsjeen nini; bape Paulus tiòpan so Resident: Kaitser mitauni behukum jau! bumis jau so Rome maso Kaitser! Ma Festus tiòpan so Paulus: wèsjeen! nani senkoor au so Kaitser.

4. Ma Radja Herodes Agrippa riana so Resident babòru abo tiòpan tabea so i. Ma Festus kibio so radja na Paulus, ma radja tiòpan so Festus: isanèwèsjeen isajoor i. Ma Festus tiòpan so i: saar nani sujoor i. Ma raria saar Agrippa tuter bwiniempi Bernitsè sunmasoi tuter Festus, Festus tiòpan senkoor Paulus maso siat. Ma Paulus riana to, Festus tiòpan so Agrippa: Jehudisiat senkasjo sinjontu nini, bape irin ba senkasjo i so. Jutan i miajar te nani Jehudisiat senbehukum i, bape tiòpan: Kaitser mitauni behukum jau! Bape irin ba nani ibui witoi na i maso Kaitser. So nini i koor i maso au abo budjawa i, inèni tuòpan so jau senkasjo i so. Ma Festus tiòpan so Paulus: kibio wénasja! Inèni Paulus tiòpan so Agrippa: isanèwèsjeen ikabio so au, so ruin buwai Jehudi. Ma Paulus tiòpan usara tanè na papon kiëmbèrei kawasa Kristen,



ma miun siat, bape tanè Sjen mitauni kibio so i na raanpai deriasi Damas-  
kus, ma tanè kiòrusaar Sjen, ma diniau Jehudisiat ma kawàsa karwaar:  
senbetobat, so Sjen biòru to so kawàsa sennè tatar, bape tindo na  
biòru. Ma Festus didjawa pi nini wura siaaw so Paulus: kubio  
sarèdjeu Paulus! pande baba diònè au bepisabir! Bape Paulus riar  
so i: ikabio sarèdjeu ba! bape ikabio na pi wàtan! Radja rin ikabio  
na witoi, so pi nini pi manana ba. Au radja sanètiaar Nabisiat te?  
Jò, irin au sanètiaar siat! Ma Agrippa tiòpan so Paulus: tòkato buònè  
jau kòta ibe-Kristen. Ma Paulus tiòpan: isanèwèsjeen Alla diònè, pibai  
tòkato, bape kabò be wàtan, pibai mèser au, bape esiat wura kabò senta-  
djawa jau, miat wura menbe tapè jau, bape sentabit miat tuter rante  
pènai! Ma Agrippa tiòpan so Festus: sinjontu nini nianari tatar siri  
ba; siaaw ba Kaitsar behukum i pua ruera i.

## § 82. Senkoor Paulus so Rome.

1. Inèni sentonè Paulus tuter esiat senna na pandjaran maso offisir  
na soldadu, sanò Julius, ma sensa kàpal, sentapai so Italiè. Ma kàpal  
disiwar nu Kreta, didiru pana, ma wanapai diteen ba. Paulus tiòpan  
so siat: imateit tantaboi ba nanina to wanapai diteen ma marin, nani  
kapal ma tatat tanbekariria. Bape sentadjawa so i ba, sentò sentapai  
sarèdjeu, so wanapai mirei ma biba ba. Ma sentapai wòroi barami,  
wana kariria besiri miun siat. Ma senpa ba pana, senkapar sèraui,  
sentabarira. Ma kàpal tibabari ma rirasa beja, senpautawan kàpal  
samampai, so senmateit nani kàpal misabu; ma senkai kainam beruswa  
kàpal, so senmateit kàpal mirutu.

2. Inèni raria pau sensajoor wore ma sibèrèresi ba pana, bemamaan  
wora; ma wana kariria miun siat wora, senmateit sennei; ma raria  
esasi to sentaanpi ba pana. Inèni Paulus tiòpan so siat: jò! sinjontumiat!  
mentadjawa so jau rèto! kariria nini tièra tatat ba pana! Bape kabò  
itòpan so miat: menmateit pènai! sinjontu siri nani niei ba! kàpal  
mièser nani niei. Sjen, tei niè jau ma ikòrusaar I kòta, radina dimis  
melaikat esi so jau, tiòpan so jau: muteit pènai Paulus! nani sujoor  
Kaitser, ma Alla diònè so au siat wura sendot kàpal nini, nani siri  
niei ba. So nini menmateit pènai, so isanètiaar Alla! ma pi tiòpan to  
so jau, nini pi wàtan. Nani kàpal tiura na nu katu esi.

8. Ma diru senpiapar utan pena senkai reban, sensèmuai taba

sura be mònu (20); tòkato senkai reban ja, sensèmua taba sura be-mandu rim (15), inèni senkai kamutu, sentò sentaboi to kausapa. Ma porera pana Paulus diniau siat: sentaanpi papon, tiòpan so siat: raria sura at to mentaanpi wàtan ba, kabò itòpan so miat: mentaanpi abo mennei ba! Na miat wura nani siri niei ba! Inèni riut mamani, diòsa rabwan siat, niadi so Sjen, ma diaanpi pena. Ma esiat wura sensanèwèsjeen ja, sentaanpi kòta. Ma sàsaar pena, sensajoor utan; bape sensajoor ririn i ba. Bape sensajoor sawa tuter rubuan, sentòpan sentir kàpal jani, senkutu waisi na kamutusi, sensèrapi sèraui betabaat siri sentapai pena. Bape diorau rami kàpal tiura na jawar siri; wapon tiura to kirakwai, bape wapui rirasa na batasi to diòtu. Ma soldadu-siat senmateit kawàsa rante senbabur, sentò senmun siat. Bape offisir sanèpai Paulus, miajar ba senmun esi, bape biprenta: siat senrin sentaas senkòpas papon, ma esiat sendut ai, pibai wòkatiani esi na kàpal, sentaas tuter i. Ma tapèna siat wura sentaas are so nu, siat wura, kawàsa utin be mònu sura be rimmònu be mandu rimmònu (277) esi na siat biòru ba.

### § 83. Paulus na nu Miletë, ma na aniose Romë.

1. Sentaas are to, sentadjawa nu sanò Miletë (Malta). Miletësiat sensanèpai siat, sendur àdia baba, so djòbera miun siat ma sentanuanam senkaruri siat. Ma Paulus riur kakamani ma kiai i na àdia pena, tawai kiani katu, misoi na kakamani rarò, kiri Paulus niè warakia. Miletësiat sensajoor tawai dibakiri na Paulus niè warakia, sentòpan: sinjontu nini sinjontu mamun! niè tatar sisèrei i! biòru ba na rawanam, inèni miun i na utan! Bape Paulus tiètap tawai na àdia rarò, ma mitauni piòta ba. Miletësiat sensajoor Paulus biòru ba, sentòpan: sinjontu nini Alla esi te? Ma mananir na nu nini, sanò Publius, niè aniò esi deriasi sawa, ma diaum siat raria tòru. Ma Publius tamani bisi, ma niè sanè pòta beja, siara riat, biata. Ma Paulus ria so i ma niadi riwàni i ma waratawan i, inèni pòta mènau pana. Inèni bepòtapai esiat sendama so Paulus, ma siat wura sentateen ja. Ma sensanèpai Paulus, ma bibur, diot kàpal esi, dipai so Romë, sentònè so i witoi biro.

2. Ma Paulus diot kàpal so Putioli, aniose Romë niè sawa. Ma kawàsa Kristen senna na Romë sendama sensajoor Paulus. Ma Paulus sijoor siat, be trimakàsi Alla, ma sanèwèsjeen pena. Ma sendama to

na aniose Romë, offisir Julius koor Paulus maso offisir na soldadusiat sentaran kaitser. Ma offisir nini diònë Paulus misoi na anio besewa tuter soldadu mònu suntaran Paulus. Ma Paulus nia na Romë taun mònu, ma diniau tawana siat sendama so i, diniau siat na Karadjaän rora ma na Sjen Jesus Kristus; miteit pibai, ma senbedjoor i ba.

---

#### § 84. Kaitser Nero, Paulus, Petrus ma Jakobus senbòru.

1. Paulus nia na Romë, Kaitser Nero, sinjontu kariria, biprenta. Nero diònë senmun mantaunniè sinjani, ma bwiniempi, ma Tuan tei diniau i. Nero sanèwèsjeen sijoor àdia baba, ma dimis kariria esiat senkeir aniose Romë, ma biprenta senbedjoor siat sentò senmajoi àdia, to raria be rimat; keis, disjop kawàsa Kristen, tiòpan Kristensiat senkeir àdia baba nini.

2. So nini kawàsa Romë senkasjo ma senkapiap Kristensiat, ma taun at senmun Kristensiat borei, senbemarioor siat beja. Sentawar esiat na pimuna pisabir sinè rawa abo wonasi simun siat, sentitiai kèsi na esiat sennè sansunsi, ma diru senkeir siat tapè maas, na kaitser Nero niè rom mirandin, ma sensòrèpèso siat, sentòpan: tapèna senbesasaar bewàtan kawàsa. Kaitser diònë senmun Paulus ma Petrus sanu. Tanrin pau ba na sanu, pinini wènasja: senperan Paulus tuter njoikòroos; ma senpaku Petrus na aitabat tapè Sjen, bape Petrus tuter aipaisi so babo ma ru so djo. Bape raria kariria riama kòta maso Nero, so Sjen piro ba witoi nianari to maso Kristensiat. Nero miun mitauni, abo niè kawàsa senkasjo i senmun i ba.

3. Jakobus, Sjen Jesus madjawi, biòru na Jerusalem. Mananirsiat na Jehudisiat senkoor i so Anio Alla babo, na festa Paska, ma senbeprenta tiòpan so kawàsa wura: kiembèrei Sjen Jesus. Bape Jakobus diòsa jani, diniau kawàsa na Sjen Jesus, ma tiòpan: mitauni sanèpai Sjen. So nini Jehudisiat sennè mananirsiat senkasjo i, ma sentawapidiaar Jakobus so djo. Bape tiawa to, biòru barami, niadi, tiòpan: Sjen Alla! Jai! inadi so Au riwàni siat, so senrin ba sennanari witoi. Ma imam esi sanèpai Jakobus ma siaaw: mennanari witoi? Sinjontu tindia nini niadi so miat! Bape sentadjawa so i ba; senrora porari Jakobus niè ru tuter ai esi. Tapèna senmun murid nini kòta.

---

## § 85. Aniose Jerusalem niei.

1. Na raria Jehudisiat senmajar Sjen Jesus biòru, sensaaw to so Resident Pilatus: niè riat miun amat ma tannè aantumsiat sarèdjeu! Tapè sensaaw, tapèna kòta sensèmua. Tapèna Sjen Jesus mitauni tiòpan to so Jerusalem, tiòpan: nani rariasi sirama so au, siat senkasjo au sendama senmasoi wariri au! sentaür kakòpa abo sensoordedjoor au! senkepan au na rawa wura! sentòtap au! ma rëwuki siri nani misoi ba babo rëwuki esi, so na mennè raria slamat mentadjawa ba.

Jhudisiat senkembërei senkòrusaar Romësiat rami. So nini Kaitser Nero dimis Fespasianus tuter soldadu borei besiri abo diniau siat. Bape Nero biòru to, inèni kawàsa Romë sentiria Fespasianus biekaitser. Inèni Fespasianus niè aantum baba Titus riwani tamani. Titus miun aniose Jehudi pau, keis ria so Jerusalem deriasi festa Paska. Jehudisiat pau besiri sendur na Jerusalem na festa Paska. Ma Titus tiaür wariri Jerusalem.

2. Inèni bibisi baba miun Jerusalem; kawàsa senbaro pisjaan, senbòru; sentaan samuen kòròsja; sentaan sapi rawa na jawarpaisi; jò sentòpan kòta senrin bwawin esi miun niè aantum, sinana i, inèni diaan i. Kawàsa borei senbòru na babisi, ma esiat senmun mantaunsiat. Ma kawàsa na Jerusalem senkasjo babera siat, ma kaririasiat senmanana, senmun siat senbedjoor siat. Esiat sentò senbemanèta ja tuter Romësiat, bape senmateit sentòpan pinini, so babapaisiat sensanètiaar Mèsias nani riana seira, tiuter siat ma diònè senpa senmun Romësiat. Esiat sensubi na aniose, sentò senmun Romësiat. Bape Romësiat sentapur siat, ma senmun siat, senpaku siat na aitabatsi deriasi Jerusalem, abo na aniose sensajoor sennè kawàsa senbòru tanè.

3. Kawàsa pau senbòru na Jerusalem, bape siat sentenam rami senpaba pana sensëra bebòrupaisiat. Bepapon senkai siat so wòrira bruswa aniose; bepapai sentam si na aniosi sibareri. Ma Jehudisiat senpaba rami; siri sanëpai siat ba to; ma Sjen Alla kisjo siat kòta! Sjen sisërei sennè tatar.

4. Titus kiepan aniose tawana to kariria riwain, to soldadusiat senmun aniose. Titus sanèwèsjeen Anio Alla niei ba, biprenta sentòtap i pënai. Bape soldadu esi kiai maas kèsi na Anio Alla rarò, kieir Anio Alla. Titus sijoor nini, kisjo, tiòpan senmajoi àdia, bape siri didjawa i ba pana. Tapèna riana witoi Sjen Jesus tiòpan to: rëwuki siri nani

misoi ba babo rëwuki esi, sentòtap i wura. Romësiat senmun Jehudi miliun (1.000.000) senbòru. Ma sentapur 97,000 senkoor siat bewomen.

### § 86. Rasul Johannes bemansaar.

1. Aniose Jerusalem niei, kawàsa Kristen senna na i ba pana. Romësiat sendamaba rami Sjen diniau siat: senbabur Jerusalem; ma senda senna na Pella, aniose katu deriasi kambo Jordaana. Rasul Johannes nia na aniose Efësë, diniau kawàsa Kristen: sentenam tindia tapè Sjen miajar. Bape kaitser Domitsianus diònë senmun kawàsa Kristen pau; sentapur Johannes kòta, senkoor i so Romë, ma sentatòpan: senkai Johannes na mararu baba besiri rarò, diònu tuter mani diòtëra. Bape Sjen bidjoor mani niunum Johannes ba, biòru ba.

2. Inèni Domitsianus biprenta senkoor Johannes so nu katu Patmos, nia na i. Na nu nini Sjen diniau Johannes nani sendurpasi Kristen si tanè, ma tiòpan: Johannes biui pinini na surat. Surat nini surat bepui na surat Refo. Surat nini diniau tatat: tantaran ma tannadi, so tanrin ba raria witoi Sjen nani riama ja. Kabio bepui na surat nini anina: Sjen tiòpan: mensajoor! Irama ja seira, ma Ibait kawàsa wura tapè sennanari to! Jau Alfa ma Omega, Ina na bepapon, ma Ina na bepapui, Ina na rètenam, ma Ina na benaipai pana. Slammat siat senkòrusaar Jau! Itòpan bewàtan maso siat wura sentadjawa kabiosi na surat nini: tei riur pi esi tuter kabiosi nini, nani Alla riur so i siksa wura na surat nini. Ma tei diniwar kabio esasi na surat nini, nani Alla kii niè sanò na surat na betenampaisiat na aniose Sreen. Tei tiòpan pinini, tiòpan bewàtan tapèna: wàtan, Irama seira! Amin!

3. Tanrin na Johannes pi esi rami, witoi tanwasja ba na surat Refo. Na sendurpai Kristen deriasi Efësë Johannes sijoor katim siri, sanò Teagënes; ma Johannes sanèpai i, diònë pandita esi diniau i ma diaum i. Bape Teagënes kiwauwaru beja, didjawa ba, bibur so utan rarò, ma nani biemananir rait, nia na sweb na wis tuter niè manètasiat kariria. Inèni Johannes mitauni ria sisërei i, ma diònë rait tipur i, ma tiòpan so siat sentapur i: senkoor i maso sennè mananir. Johannes bemasaar wàtan, niè sunbaburi ma runandau bemamara to. Teagënes sijoor senkoor Johannes so i, miteit to baba so i, dipai bibur. Bapa Johannes siaaw i, siaaw: he! inè aantum! miteit jau, tamamu,

so? ibemansaar to, ma sentapur jau to; muteit pënai! sanëtiaar jau, so Kristus dimis jau so au! Teagènes didjawa witoi Johannes siaaw, diòsa, mimaja beja, ririorar ma sieis to baba. Inèni riauxaar Johannes, ma Johannes misoi tuter i to bietobat ma kiòrusaar Sjen bewàtan to. Tawana Johannes diniau kawàsa Kristen: sensanèpai babera siat. Mitauni piaba pana diniau rami, so bemansaar wàtan to, tiòpan wénasja maso siat: marariamiat! mensanèpai babera miat! Sentutan i: tiòpan tapèna wénasja so? ma riar so siat: asinina prenta Sjen, pi esi Sjen siaaw ba na amat.

4. Rasulsiat esiat senbòru to, Johannes tienam rami; biòru biemansaar wàtan to, ma sijoor pana karadjaän na Kristus riama pena. Na Rasulsiat esiat tanrin pi pau ba. Sentòpan, Bartolomeüs, anina Natanael, ria so utan Indië; Andreas so Skit; Tomas so Pers ma Part; Judas, sentap i Tàdeüs, so Araab, ma Matteüs so Etiopië so radja bwawin Kandaatse. Tapèna Rasulsiat sentaniau na utan pau. Bape to raria nini kawàsa borei na dunja sentadjawa Sjen niè kabio ba rami, senrin ba rami Sjen Jesus riama to so dunja abo siat kòta sennei pibai, bape sensèmua tenampai mènaua.

5. So nini: tei na amat pia tiòpan sanèpai Sjen ma sanèwèsjeen kiòrusaar i, bierwana diawia ba, ma diniau siat sensanèpai Sjen ba rami. Bape amantenam tapè Sjen niè aantumsiat retò, abo kawàsa wura, sensajoor amat, sensajoor kòta: amansanèpai ma amankòrusaar Sjen. Ma amannadi tawana rëto tuter amansanèpai betutira: Sjen! buòné nuè karadjaän riama so utan ma aniose nini kòta!

6. Amansanèpaja kòta tawana witoi Rasul Paulus biui maso Titus: Sjen sanèwèsjeen dionè slamat maso kawàsa wura, ma diniau tatat tankembèrei buwai tatar ma sanemkariria, ma tantenam wèsjeen ma tindia na dunja nini tapè Alla miajar; so tantanòta slamat witoi tansanëtiaar, ma pi diteen wàtan na Alla baba, ma na tannè Djuru Slammat Jesus Kristus, tei diònè mitauni riwàni tatat, abo riera tatat na kariria wura, ma nièwori tatat, ma besreen tatat be niè kawàsa, abo tannanari pi diteen tuter tansanèpai betutira. Amin.